

বিস্মৃতিয়া মণিপুরী  
ছন্দ পরিচয়



ব্রজেন্দ্রকুমার সিংহ





আশামের বরাক উপত্যকার কুলশক্তি কবিরের অন্যতম প্রজন্মকুমার সিংহ। মাতৃভাষা বিষ্ণুপ্রিয়া মণিপুরী ও বাংলা উভয় ভাষাতেই সিক্কাম এই কবি হাইলাকাবির ঐতিহ্যবাহী 'সাহিত্য' পত্রিকার আশিনবর্ষ সহযোগী সম্পাদক হিসেবেও খ্যাতিবীর্ণি থাকি। উপাল বাংলায় বরিত কক্‌থর এই কবি বিষ্ণুপ্রিয়া মণিপুরী সাহিত্যেভরও দক্ষ রূপকার। তাঁর কবিতায় একদিকে আছে নিজস্ব কৃষ্টির প্রতি সীমাহীন অণুরাণ ও আত্মগুলফান আর অন্যদিকে আছে অন্যতম কবি বরকার লিবিভূতপল্যা।

এই কবিই আবার ভাত দিয়েছেন ভূপোবিজ্ঞানের মতো লুপলিঙ্কের বিজ্ঞানমণী বিশ্লেষণে। কবিতার ভূম সে কোল মল কবিরই আরাধ্য বিষয়। বিষ্ণুপ্রিয়া মণিপুরী ভাষার চন্দ্র রূকরণ বিষয়ে এই প্রথম একজন বহুলা কবি তাঁর মাতৃভাষার প্রাণগলার কলীরবরূপে আন্তর্বি কুলশতায় একটি অনালোচিত অম্বর অবল্যল্যি বিষয়ে তাঁর বিজ্ঞানবৃষ্টির বিবেচনাকে সুস্থিযুগর করেছেন। তাঁর বিবেচনা, তাঁর বিশ্লেষণও বাখ্যাতারূপে চরম সিদ্ধিলাভ করেছে।

এই বইয়ের মাকখানে অলংকা উপাধরণের জেতর-জবেলে তিনি বিষ্ণুপ্রিয়া মণিপুরী ভাষার কাব্য জগতকে সুপীঠার মতোই করেছেন বিশুল লংঘলনে আকত ও আকলগাল মাতৃভীতে রঙ্গলভানময়।

বিষ্ণুপ্রিয়া মণিপুরী ভাষার কবি ও কবিতামণী লকল জিজ্ঞাসুকলের কাছে এই বই অপরিহার্য হয়ে উঠুক - এই আশামের কাব্য।

অধ্যাপক সুনসুলান দাস  
কলি ও কলক








778  
20/6/03

বিস্ময়প্রিয়া মণিপুরী ছন্দ পরিচয়



# বিস্মুপ্রিয়া মনিপুরী ছন্দ পরিচয়

ব্রজেন্দ্রকুমার সিংহ



(মনিপুরী তথ্য ও গবেষণা কেন্দ্র)  
তিলকপুর, কমলগঞ্জ, মৌলভীবাজার  
বাংলাদেশ।

<u>পয়লা প্রকাশ</u>	রাস পূর্ণিমা, ২৮ কার্তিক ১৪০৭ ১১ নভেম্বর ২০০০
<u>স্বত্ব</u>	সুখদা সিংহ
<u>প্রকাশক</u>	ডাঃ সুকুমার সিংহ বিমল সভাপতি, পৌরি, কমলগঞ্জ, বাংলাদেশ।
<u>প্রচ্ছদ</u>	অবিনাশ আচার্য
<u>মুদ্রক</u>	মুদ্রণবিদ কম্পিউটার্স কলেজ রোড, শ্রীমঙ্গল।
<u>দাম</u>	রূপা তিনকুড়ি দশহান রূপা তিনকুড়িহান (ভারতে) ডলার দশহান (অন্যদেশে)

BISHNUPRIYA MANIPURI CHHANDA PARICHAY  
[A Treatise on Bishnupriya Manipuri Prosody]

By Brojendra Kumar Sinha



আমেরিকা প্রবাসে থায়াউ  
নিজর সমাজ বার সাহিত্যে না পাহরেছে-  
শ্রীমান উত্তম কুমার সিংহরে  
বানা বার আশিসল ।



লেখকৰ আৰ আৰ লেৱিক

চক্ৰবৰ্ত্তি (নাটক)

লেখাও ফুলগৰে

এলাৰ খুৎতল

ধ্ৰুৱপদ

মেৱাক সেৱাক

কণ্ঠ গিৰো (নাটক)

পুংলল

মেইকেই (নাটক)

বিৱহী বন্ধৰ এলাহান

জিনজিনি

পৌৱেই (যুগ্ম সম্পাদনা)

মেয়েক মেঠেল ১ম ভাগ

বসবিলাস

চিকংলেই

সিকাডেইনি (যাৱি)

Bishnupriya Monipuri Language and Literature (ed.)

ধনঞ্জয় ৰাজকুমাৰৰ লেৱিক

ৰুবাইয়ৎ-ই-ওমৰ খৈয়াম

ডিগল আতহানল মোৰে

মিকুপৰ চেৰি ফুল

হপনৰ বাবুয়ানি

কিমে অয়া আছৎ ইকাইতাপি

লক্ষ্মী গিথানক (নাটক)

ভিক্ষা দেনে এৱে আহিগিতৌ ।

পৌৱি'ৎত প্ৰকাশ অইতই লেখকৰ পিছেকাৰ লেৱিকহান

অনুবাদকল্প





## ভূমিকা

কবিতা এহান মৌলিক গবেষণাগ্ৰন্থহান নাগই। ছান্দসিক অমলাধন মুখোপাধ্যায় প্ৰবোধচন্দ্ৰ  
৩০ বা বরেন্দ্ৰনাথৰ চিন্তাহানৰ আৰম্ভণিই কবিতা বিষ্ণুপ্ৰিয়া মণিপুৰী ছন্দ শিক্ষাথীৰ সালগদ  
ইকৰেছিহান।

ছন্দ এহান কবিতাৰ তুহাল শক্তি আহান। এহানৰ আয়ত্ব বৰ পাবলৈ কবিতাই তুহাল পাংল  
অহান পাব। বাংলা কবিতাৎ ছন্দৰী ত ৩০টা হুদাছে। অসমীয়া ভাষাৰ প্ৰধান কবিতায় বাংলা  
ছন্দাবৃত্তিৰে অনুসৰণ কৰতাবা। ত'নুৰ ছন্দহাছ ঔতা ইবি বাংলা ত'নুৰ ছন্দশাস্ত্ৰ নিউব  
বিষ্ণুপ্ৰিয়া মণিপুৰী ভাষাৰ ছন্দৰ প্ৰকৃতিগোণী বালা ছন্দৰ সাদৰ। বাংলা অসমীয়া বার  
বিষ্ণুপ্ৰিয়া মণিপুৰী এবে ভাষা তিনহানাতৌ স কুতব সাদৰ স্বপাদন'ৰ্থ বা স্বভাব হ'ব স্বব নেই  
ইহান বিষ্ণুপ্ৰিয়া মণিপুৰী ছন্দশাস্ত্ৰ বাংলাৰ সাদৰ অইতই। হিন্দ উৰ্দু, মণিপুৰী (মেইতই  
ভাষাৰ টাকাবণপদ্ধতি নুহাল খাংত তানুৰ ছন্দৰ প্ৰকৃতি বাংলা বা বিষ্ণুপ্ৰিয়া মণিপুৰীৰ লগে না  
হিলব। বাংলা ভাষাৰ ছন্দল আলোচনা কৰলু বা বিভিন্ন কবিতাৰ ছন্দ বাগাদিলু। ইতাকা বা বাংলা  
ছন্দৰ প্ৰবন্ধ ইন্দল ঔবাকা নানান সময়সৰে উদয় থইল। বিশেষ কৰে ম'ৰ আধুনিক কবিতাৰ  
ছন্দ আলোচনাৰ ক্ষেত্ৰে। ঔবাকা ঔতাল ছান্দসিক প্ৰবোধচন্দ্ৰ সেন, কবি অলোকবৰ্ণন দাশগুপ্ত  
বার অন্যান্য ছান্দসিকৰ লগে আলোচনা কৰেছু।

বিষ্ণুপ্ৰিয়া মণিপুৰী ছন্দৰ আলোচনা প্ৰসঙ্গত সহস্ৰতা পান। বা বিতৰ্ক কৰণলৈ সুযোগ দৈত  
ঔহানে নিজৰ পথগ নিজে হুকবাৰি ছ'জা উপায় নেহাছল। পয়লাগদ ছান্দসিক অমলাধন  
মুখোপাধ্যায় বিবকব মতল প্ৰভাতিত অ'ছিল। ঔহানৰ প'ৰিচয় বৰ্জমান লেখক এহানৰ প'ৰিচয়  
অংশত আছ। ঔতাৰ পিছেদে বরেন্দ্ৰনাথৰ ছন্দ লেখিক এহান মোৰ দিন বাহিকাব চিত্ৰ  
মাকপণ অয়া থাইল। ছান্দসিক বাল কবি, দ্বিগণিত্য কৰে নিয়াম গুরুত্ব দেনা। আসলে  
দ্বিগণিবমা প্ৰকৃত বিৰোধ নেই। ঔতাই কবি আগই নিয়াম মানাসোণ পান। থকব।

কিছু আবাক কবি আগ, সত্ৰে নুনাথ দত্তৰ মত আহন গ্রহণ কৰণি হিনাপেইলু। 'বিবকব 'দৈত  
মাত্ৰেব ছন্দ' এহান গ্রহণ কৰলে ছন্দহান শিল্পহান নায। শৃঙ্খলহান অইতই, কবিতাহান নায।  
অইতইতা কবিতাৰ ব্যায়াম। যেতাউ অক, পিছেদে প্ৰবোধচন্দ্ৰয়ে মোবে প্ৰভাতিত কৰেছে  
তিনগ ছান্দসিকবাংত সহজ অইব মত ঔতা গ্রহণ কবিতা লেখক এহানাং দিলু। লেখক এহানৰ  
'ছন্দ প'ৰিচয়' অংশ ঔহানাং ('প'ৰিচয়'ৰ অণ পেগা), লেখক বৰ্জমান অহান নাখা  
কৰেছেতা। 'ছন্দ প'ৰিচয়' অংশৰ ছন্দৰ হাবি ধৰণহানি থাইল। 'প'ৰিচয়' অংশৰ 'অক্ষবপুত  
ছন্দ' প্ৰবন্ধ ঔহানাং অক্ষবপুত সম্পৰ্কে বিতৃত ব্যাখ্যা দেছু। ঔ প্ৰবন্ধ ঔহান শিক্ষাথীৰ সালগদ  
ইকৰেছিহান। ঔপই প'ৰিচয় বৰ্জমান বৰ্জমানৰ চেষ্টা কৰেছু, সিলেবলৰ আলোচনাং নাপেদুগা।  
কিছু ছন্দ প'ৰিচয় অংশ ঔহানাং ছন্দৰ প'ৰিচয় বাৰ ছন্দব্যাকবণব বৈজ্ঞানিক মত ঔহান  
আলোচনা কৰে নেছুগা। যেতাউ অক, লেখক এহানৰ 'ছন্দ প'ৰিচয়' অংশ ঔহান মূল গ্ৰন্থহান  
বার লেখকৰ এবকাব মতহান। ঔতিশ্ৰুতি বাৰ অন্যান্য পাত্ৰকত নিকুলিছিল প্ৰবন্ধ ঔতা  
স্বয়ংসম্পূৰ্ণ নাগই। ঔতা বিভিন্ন সময়ৰ বিভিন্ন চিন্তাৰ ফল। লেখকহান ইকবাতগ ঔতাৰ সূত্ৰ  
ঔতা নুয়া কৰে মূল গ্ৰন্থহানৰ আলোচনাং আহছে। ঔহানে পাঠকে হাৰি হাৰি পুনৰাবৃতি  
দেখতাঙাই।

আমার সাহিত্যৰ আদি নিদৰ্শন ঔতা সুৰ নিৰ্ভৰ ছন্দ নাগই সুৰে ঔতাবে চালিত কৰেছে পয়লা ছন্দৰ আভাস পেয়াবতা পৌৱেইৰ মা। পয়লাগদে ইকৰলা কৰি গিৰক লকেই যথা গীতিস্বামী গোকুলানন্দ, ৰামায়ণ ৰচয়িতা আমুসেনা সিংহ, লেইখমসেনা সিংহৰ বিখ্যাত নাটক মণিপুৰ বিজয়ৰ এলা বা পিছেকাৰ যুগৰ গেষ্ঠবিহাৰী সিংহৰ এলা ঔতা সম্পূৰ্ণ সুৰনিৰ্ভৰ সুৰ নিৰপেক্ষ কবিতা হিসাবে ঔতাবে পাকৰে নুয়াবিয়াৰ। বিষ্ণুপ্ৰিয়া মণিপুৰী ভাষাৰ প্ৰথম ছন্দসচেতন কবিগ অইলতাই ধীৰচন্দ্র চট্টোপাধ্যায়। এইগাৰ ছন্দসচেতনতা এবাকাউ অমাবে মুঞ্চ বাৰ বিস্মিত কৰেব, কিন্তু গীতিস্বামী, আমুসেনা, লেইখমসেনা গাছিৰ প্ৰভাব পিছেকাৰ কৰি এতাবাং নিয়াম কৰে পড়ানিয়ে পিছেকাৰ যুগৰ কবি এতায়ো সুৰ নিৰ্ভৰ কবিতা ইকৰলা ছন্দ অবহেলা কৰিয়া। ঔতাৰ পিছেকাৰ আধুনিক ধাৰাৰ কবিয়ে মুক্তছন্দ বা গদ্য ব্যবহাৰ কৰেছি ৬০'ৰ দশকে ছন্দসচেতন কবিগ আছিলতা চন্দ্রবদন সিংহ। কিন্তু আমাৰ দুৰ্ভাগ্যহান গিৰক দীঘজীৱী নাইল ছন্দসচেতন কবি নাথানিয়ে আমাৰ কাব্যত ছন্দৰ ঐতিহাহান নেয়েছতা অথচ কাব্যৰ প্ৰধান উপকৰণ দুহান, ছন্দ বাৰ অন্ত্যমিল। মুক্তছন্দং যানার আগে আমাবতা দ্বিয়হানাং দক্ষতা অৰ্জন কৰানি লাগতই যেতাই ছন্দ বাগেছি ঔতাবতা ছন্দৰ ডিগল ঐতিহ্য আহান আছে ছন্দ নাজানিয়া ছন্দোহীন অহলে আমি সম্মান নাপেইতাঙাই।

প্ৰতিশ্ৰুতি পত্ৰিকা সম্পাদনা কৰলু ঔবাকা মোৰাং বিভিন্ন কবিতাংত কবিতা আহিল। ঔ ছন্দোহীন কবিতা ঔতা পাকৰিয়া ধাৰণাহান অইলতা ছন্দল প্ৰায় আন্দোলন আহান অকৰানি থক। বন্ধুস্থানীয় বাৰ অনুজপ্ৰতিম দুগ আগ কবিরে ছন্দ বিষয়ে ধাৰণা দেনাৰ চেষ্টা আহান কবলু ঔতাং কতগ উপকৃত অইলা, কতগ নাইলা, কতগই উপহাস কবলা। পথ উগল নাইল আবো প্ৰতিশ্ৰুতিং ছন্দ প্ৰবেশকা বুলিয়া অতি প্ৰাথমিক প্ৰবন্ধ আহান ইকৰলু। ঔহানৰ অতি প্ৰশংসা কবলতা কবি সেনাকপ সিংহই মোহনপুৰৰ শ্ৰী বীবেন্দ কুমাৰ সিংহ গিবকে ঔহান প্ৰায় সম্পূৰ্ণ মুখস্থ মাতল উৎসাহিত অয়া আবাকৌ প্ৰবন্ধ আহান দুহান ইকৰলু ঔতাৰ পিছেদে সাহিত্য সভা আহানাং ছন্দ বিষয়ে বক্তৃতা দেনাবকা আমন্ত্ৰিত অছিল। ঔপেয়ো শ্ৰোতায় বক্তৃতা ঔহান বুলিয়া হাবৌ অছিল। সভাপতি গিবকে অতি প্ৰশংসা কৰেছিল। ঔতাৰ পিছেদে ত্ৰিপুৰাৰ পাঞ্চজনাং 'চাৰিমাএৱ ছন্দ' বুলিয়া আলোচনা আহান ইকৰেছিল। মোৰ অনুজ কবি আগই মোৰাং প্ৰবন্ধ আহান দাবী কৰেছিলতা, শৰ্ত্তহান ছন্দৰ আবিৰ্ভাব প্ৰবন্ধ দেনা না ঔবাকাংত লাজপেয়া অন্য পত্ৰিকাং ছন্দৰ প্ৰবন্ধ না ইকৰবি। পাঞ্চজন্যৰ আলোচনা ঔহান পাকৰিয়া কবি বিশ্বজিৎ সিংহই উপকৃত আছে বুলিয়া মাতানিয়ে বাৰ সাহস পেইলু। প্ৰতিশ্ৰুতি-৭ নুয়া শিক্ষাথীৰকা 'অক্ষৰবৃত্ত বা পয়াৰৰ ছন্দ' বুলিয়া প্ৰবন্ধ আহান প্ৰকাশিত অছিল। ঔহানৰ নিন্দা বা প্ৰশংসা কিংতাউ নাহনেছ। আকাশবাণীংত শৌৰ উপযোগী ছন্দ সম্পৰ্কে কথিকা আহান মাতানিবকা আমন্ত্ৰিত অয়া দশ মিনিটৰ ফামে প্ৰায় ত্ৰিশ মিনিটৰ প্ৰবন্ধ আহান পাকৰলু ঔহান মূলত 'চাৰিমাএৱ ছন্দ'ৰ ('পৰিশিষ্ট' দ্ৰঃ) বিস্তৃত কপহান। পিছেদে আৰ ছন্দৰ প্ৰবন্ধ ইকৰানি মনেয়াও না ইকরেছ।

ঔতাৰ পিছেদে 'বৰাক উপত্যকা বঙ্গ সাহিত্য ও সংস্কৃতি সম্মেলন' ৭৭ত কবি নীৰেন্দ্ৰনাথ চক্ৰৱৰ্তী বাৰ বৰ্তমান লেখকৰে আধুনিক কবিতাৰ ছন্দল বক্তৃতা দেনাৰকা আমন্ত্ৰণ কৰেছিল। ঔবাকাংত বিষ্ণুপ্ৰিয়া মণিপুৰী ভাষাং পূৰ্ণাঙ্গ ছন্দগ্ৰন্থ আহান ইকৰানিৰ খৌৰাংহান মনহানাং জাগিল। ঔহানৰ ফলহান বৰ্তমান লেখিক এহান।

ছন্দ এহান কসরৎহান নাগই, শিল্পহান এবে শিল্প এহান হারনা পেয়া মুক্তছন্দ বার গদ্য ছন্দতৌ দক্ষ শিল্পীগ অনা সঙ্কর নাগই ছন্দ হিকানি কবি আগরতা আবশ্যিক ছন্দল কবি আগই নিজব লগে নিজে প্রতিযোগিতা কবেবতা ছন্দশিল্প এহানাৎ দক্ষ অইলে বহু বিচিত্র বার বিবিধ ধরনব কবিতা ইকরিয়া নিজরে প্রমাণ করে পাবতই ছন্দ নাজানে ঔগই পল্লবরমা পড়িয়া থাইতই সরোবরগর খাম্পাল অনা নুয়ারতই ইহজনমে ।

কিন্তু আমার কবিয়ে এবাকাউ অম্যাটিক ছন্দসচেতন নাগই । ছন্দ হিকানির আরাক উপায় আহান অইলতা কবিতাহান পাকরানি ছন্দহান থয়, এ উদ্দেশ্যল ডাঙর করে দুহান আবৃত্তি প্রতিযোগিতার আয়োজন করেছিলু পশ্চিমবঙ্গ বার আকাশবাণীত বিচারক আনিয়া । ঔহানাৎ কোন কবি আগ যোগ নাদেছিল ।

আমার কবি বিশেষ করে কনাক দাপা এহানে ছন্দব বারাদে আকৃষ্ট একা বুলিয়া লেরিক এহান তানু ছান্দসিকব লেরিক ঔতা পাকরিয়া ছন্দবিক্রপ অইতাই বিভিন্ন বিশ্ববিদ্যালয়ে অমূল্যধন বার প্রবোধচন্দ্রর ছন্দোগ্রন্থ ঔতা পাঠ । কিন্তু দুঃখর বিষয়হান লেরিক ঔতা অধ্যাপক বার ছাঃছাত্রীয়ে হারপানি হিনপেইতাবা ঔ বিষয়ে প্রাচলিত টীকাগ্রন্থ নির্ভুল নাগই । বর্তমান লেখকব উদ্দেশ্যহান অতি সহজে কবিয়ে নির্ভুল ছন্দ হিকে পায়নি । কবিয়ে লেরিক এহান পাকরিয়া ছন্দব বাবাদে আকৃষ্ট অইলে, ছন্দসচেতন অইলে লেখকব শ্রম সার্থক অইতই কবিতা ইকরতে ইকরতে ছন্দল নানা পরীক্ষা কবতাই, নুয় নুয়া সমস্যা নিকুলতই ঔতা তানু সমাধান করতাই ঔতা ভবিষ্যতর ছান্দসিকব বিষয়হান অইতই ।

## পরিভাষা

বাংলা ছন্দশাস্ত্রর প্রধান ক্রটিহান পরিভাষা দুগ ছান্দসিকব পরিভাষা তিল নেই । এবে পরিভাষার নিত্তর জঙ্গল এগৎ ছন্দশিক্ষার্থীয়ে পথ মাংকরিয়া বিবুলা অইতাবা সর্বজনমানা পরিভাষা অহান নাথাইলে শাস্ত্র আহানব বৈজ্ঞানিক ভিত্তিহান লেপনি হিনপার, পরিভাষাহান সহজ বার ভরি অনা থকর । লেরিক এহানাৎ প্রবোধচন্দ্র সেন গিবকে ব্যবহার করেছে ছন্দোবীতির নাঙ ঔহানি গ্রহণ করেছি যথা মাত্রাবৃত্ত, স্বরবৃত্ত বাব অক্ষরবৃত্ত । নাঙ এহানি শ্রদ্ধেয় কবি শঙ্খ ঘোষ বার আরতায়ো গ্রহণ করেছি । নাঙ এহানি উচ্চারণ করানি নুঙেই বার হবাউ লাগের

হাবিৎত ডাঙর সমস্যাহান সিলেবল্ শব্দ এগব পরিভাষাল অমূল্যধনে অক্ষর বুলের, প্রবোধ চন্দ্রই দল বুলের কিন্তু দ্বিঃহানিঔ ক্রটিমুক্ত নাগই । দল শব্দ এগ পরিভাষাহান হিসাবে ভবি নাগই ।

লেরিক এহানাৎ সিলেবলর প্রতিশব্দ ব্যবহার নাকরিয়া মূল ইংরেজি শব্দ ঔগ ব্যবহার করলাৎ । আমার কবি বার সূমালোচকে সনেট শব্দ এগ গ্রহণ করেছি । ঔসাদে সিলেবল্ শব্দ এগ গ্রহণ কবতেউ আপত্তি থানা থক নেই কবি শঙ্খ ঘোষ গাছিয়ে এবাকা সিলেবল ব্যবহার কবতারা ।

মূল লেরিকাহানাৎ (ছন্দ পরিচয়) ব্যবহার করেছি পরিভাষা ঔতা বর্তমান লেখকে গ্রহণ করেছেতা বুলিয়া নিংকরেদিবাং পরিশিষ্টর পরিভাষা এবাকা আর ব্যবহার নাকরুরি ।

## কৃতজ্ঞতা স্বীকার

লৈরিক এহান প্রকাশ অনাৰ কোন সম্ভাবনা নেয়ছিল, বাংলাদেশৰ 'পৌরি' সংস্থাই প্রকাশৰ দায়িত্ব নেনাই লৈরিক এহান পাঠকৰ আতে ফৌঅনি পারল 'পৌরি' কর্তৃপক্ষৰে কৃতজ্ঞতা প্রকাশৰ ভাষা বর্তমান লেখকৰাং নেয়ছে, শ্রীমান সুশীল কুমার সিংহ বার কবি শুভাশিস সিংহ সমীৰে না থৌকরলে পাণ্ডুলিপিহান এ জনমে লই নাইলইছ ঔতার গজে শ্রীমান সুশীলে এহানৰ মুদ্রণৰ দায়িত্বৌ গ্রহণ করেছে। তারে স্নেহাশিস দিয়ৌরি। শ্রী বরুণ কুমার সিংহ বার শ্রী সুধন্য সিংহই মোর পুরানা প্রবন্ধ দুহান আহান সংগ্রহ করে দিলা। শ্রী নিশিকান্ত সিংহ (অভিনেতা), শ্রী হেমকান্তি সিংহ, ডাঃ অশোক সিন্হা, শ্রী নীলকান্ত সিংহ গাছিরে নিঃশিৎ অনা মনাউরি। 'দিলীপ কুমার সিংহ বার 'উত্তম কুমার সিংহই লৈরিক এহানি না দেখলা ঔহান ডাঙর দুঃখ আহান।

বাংলাদেশৰ বাবু পদ্মাসেন সিংহ, শ্রী চন্দ্র কুমার সিংহ, শ্রী নীলমণি সিংহ (জনকল্যাণ কেন্দ্র), শ্রী রাজকান্ত সিংহ, শ্রী কৃষ্ণ কুমার সিংহ, শ্রী সুরেন্দ্র কুমার সিংহ, কবি অধ্যাপক শ্রী রণজিৎ সিংহ, শ্রী মণিলাল সিংহ গাছিয়ে দিতারা উৎসাহ বার পাংলাক ঔতার ঋণ এ জনমে হজে নুয়ারতৌ। বাংলাদেশৰ মণিপুরী সমাজৰাং মোর কৃতজ্ঞতাৰ অন্ত নেই। হাবির নাঙ যৌকরলে ঔহানে তত্তাল লৈরিক আহান অইতই।

বাংলাদেশদৰ্শন মোরাং এ জনমৰ তীৰ্থদৰ্শনহান বাংলাদেশৰ মণিপুরী সমাজৰে হমা দিয়ৌরি।

আশ্রম রোড, হাইলাকান্দি  
আসাম, ভারত

ব্রজেন্দ্রকুমার সিংহ  
৮ কার্তিক ১৪০৭ বাংলা



## ছন্দোবীতির নাঙ

স্বরবৃত্ত	রবীন্দ্রনাথ	ঃ বাংলা প্রাকৃত
	সত্যেন্দ্রনাথ	ঃ চিত্রা
	দ্বিজেন্দ্রলাল	ঃ মাত্রিক
	অমূল্যধন	ঃ স্বাসাঘাত প্রধান
	প্রবোধচন্দ্র	ঃ স্বরবৃত্ত, বর্তমান নাঙহান দলবৃত্ত
মাত্রাবৃত্ত	রবীন্দ্রনাথ	ঃ সাধু, নূতন
	সত্যেন্দ্রনাথ	ঃ হৃদয়া
	দ্বিজেন্দ্রলাল	ঃ মিতাক্ষর, নূতন
	অমূল্যধন	ঃ ধ্বনিপ্রধান
	প্রবোধচন্দ্র	ঃ মাত্রাবৃত্ত, বর্তমান নাঙহান কলাবৃত্ত
অক্ষরবৃত্ত	রবীন্দ্রনাথ	ঃ সাধু, পুরাতন
	সত্যেন্দ্রনাথ	ঃ আদ্যা
	দ্বিজেন্দ্রলাল	ঃ মিতাক্ষর, পুরাতন
	অমূল্যধন	ঃ তানপ্রধান
	প্রবোধচন্দ্র	ঃ অক্ষরবৃত্ত, বর্তমান নাঙহান মিশ্রবৃত্ত



## সূচীপত্র

প্রস্তাবনা ১৭

### ছন্দ পরিচয়

গদ্য বার পদ্য ১৯

চরণ ২০

যতি বার পর্ব ২১

ছেদ, ভাবযতি বা অর্থযতি ২৪

সিলেবল্ ২৫

মাত্রা নিরূপণ ২৮

### ছন্দোন্নীতি

স্বরবৃত্ত ছন্দ ২৯

মাত্রাবৃত্ত ছন্দ ৩০

অক্ষরবৃত্ত ছন্দ ৩৯

অক্ষরবৃত্ত ছন্দের মাত্রা লেহানি ও সমস্যাহান ৪৩

মুক্তক ৪৭

মুক্তি ৫০

### পরিশিষ্ট

কবিতার ছন্দ প্রবেশিকা ৫১

চারিমাত্রার মাত্রাবৃত্ত ছন্দ ৬১

স্বরবৃত্ত ছন্দ ৬৫

অক্ষরবৃত্ত ছন্দ ৭২

অক্ষরবৃত্ত ছন্দের বিতর্ক আহান ৮১

অন্ত্যমিল ৮৫

গ্রন্থপঞ্জী ৯৫





## প্রস্তাবনা

(১)

“হৌ ছয়াৎ নাছে” অথবা “বরনহান পড়িল” কথা এতা নিক্কাকার কাম কাজর ধূলি লাগিয়া মতছে। এতা কথারে আমি চিরকালর কথা বুলিয়া গ্রহণ করে নুয়ারিয়ার। কারণ কথা এহানিৎ যেহানি মাতিলতা মাতিয়া লয়ইল। শব্দ এগিয়ে অচেতন অন্তরগর ঘুমহান বাগিয়া হজাক করে নুয়ারল আমারে চৈতন্যরে চঞ্চল নাকরল। কিন্তু কবিতাৎ মাতিল কথাহানি মাতিয়া লইনার, বারে বারে আঘাত করিয়া অচেতন চিত্তর দুয়ারহান আংকরিয়া বর্তিগ লাগাদিয়া ঙালকরেদের আমারে। ভাবর লগে মনহানর মিলন-ঔহানেই শিল্প সাহিত্যর মূল কথাহান।

ভাবর অভিসার নিয়াম মৃদু, কোমল বার নম্র। আটানিহান লাজহানে তাপ। মেইথংহান গোপন। ভাবরে বরণ করানিরকা সদা প্রস্তুত নাগৈ মন এহান নানান অকিঞ্চিৎকরতাল বিভূলা মনহানে পাহুরিয়া না মাতেইলে ভাব গিথানক অভিমানর আহির পানি সিটাল আলথক অয়া যেইরিগা।

ভাবর জাঙে নূপুর, আতে কঙ্কণ, কানে কুণ্ডল -এসাদে করে অলংকারুল সাজাদিলেতে তেইর পারাহানলেহে রুনুঝনু শব্দ অইতৈ, আতহানর আন্দোলনে কঙ্কণ কন্ কন্ করে রহিতৈ, কিঙ্কণী কিনি কিনি ধ্বনিল আমার মনহানিরে মাথৈত - ঔরে কোমল কঙালা মৃদুগমনী ভাব আহিরি - তেইরকা প্রস্তুত অই, অন্তরগৎ তেইরে বরণ করানিরকা সংসারর আর হাবি কামেৎত বিমুক্ত অয়া দুয়ারহান আংকরিয়া বাসেয়া থাই। তেই আয়া আচ্ছন্ন করক আমার অন্তর। মনহানাৎ লাগাক বর্তিগ।

কবিতার ভাবরে ছন্দর ধ্বনিল সাজাদিলে মনহানে প্রসন্ন অয়া, প্রস্তুত অয়া থার গ্রহণ করানিরকা। ছন্দর তালে তালে অভিসারিকা ভাবর পারাহান পড়িয়া আগেৎত আন্দোলিত করের আমার ইন্দ্রিয় এতারে উৎসুক অর মনহান ঔহানলেহে কবিতাৎ ছন্দর প্রয়োজন। ভাবর স্বভাবহানর পরিচয় দের ছন্দই

(২)

ছন্দ মানে শিল্পর শাসন আহান। নিয়মর নির্দেশ আহান। আমার মনর আবেগ এতারে প্রকাশ করতেগা সর্বদা আমি নিয়মর শাসনল না বাধিয়ার। ঔ অসংযমী ভাব প্রকাশ ঔতা শিল্প নাগৈ। ভাবরয়া নিত্যকালর গভীর সৌন্দর্য আহান আছে, ঔহানরে প্রকাশ করানি ঔহান শিল্পকর্মহান। আবেগর হাদিৎ যে চিরকালীন সত্য আহান আছে ঔ সত্যরে শিল্পীর ধ্যানর আহিগল দেহানি বার ঔহানরে মূর্তি পালকরানি ঔহান শিল্পহান

আমার অন্তরে দুঃখ, বিষাদ, শোক এতা উৎপন্ন অয়া বার বিলীন অর। ঔতা ব্যক্তিগত, নিজস্ব বারো অস্থায়ী; সমগ্র পৃথিবীর ভাবুকর সম্পত্তি নাগৈ। কিন্তু ক্রৌঞ্চমিথুনর দুঃখ ঔহানাৎত উৎপন্ন অইল শোক ঔহানরে ছন্দর সংযমল বাধিয়া বাল্লীকিয়ে যে শ্লোকহান

রচনা করেছিল ঔহান আজি পেয়াউ সমগ্র পৃথিবীর সম্পত্তিহান অয়া আছে । বাল্লীকিয়ে ঔবাকা অসংযমী শোক প্রকাশ করিয়া চিকারি-মিকারি দিয়া নিষাদ ঔগর লগে কৌলি আহান লাগিলইহুতে তার দুঃখ ঔহান আমারাং তুচ্ছ অইলইহু । হাবি সৌন্দর্যৌ শাসন আহানঙ্গ সংযত ।

বিশ্বব্রহ্মাণ্ডর চলন এহানৌ নিয়মর শৃঙ্খল আহান পিদেছে । কিন্তু ঔ শৃঙ্খল ঔহান হনার নূপুর অলছে বিশ্বনিয়মর জাংহানাং । কবিতারমাউ ছন্দর সুনির্দিষ্ট নিয়ম আহান আছে যেহানর তালে তালে মনর তন্ত্রী এতা রহের । সাধারণতঃ আমার দুঃখ, বেদনা, হারৌ পিয়মর প্রকাশ এতাং শাসনর কৃত্রিমতা নেই । কিন্তু নৃত্যল যেবাকা শিল্পময় করিয়ার ঔবাকা তালর কৃত্রিমতা আহান থয়ার । কথারে কবিতার শিল্প আরোপ করলেউ ছন্দর সংযম আহান থয়া — সৃষ্টি করানি নিত্যকালর বিশ্বমানবর ধ্যানর মূর্তিগ ।

## ছন্দ পরিচয়

### গদ্য বার পদ্য

গদ্য বার পদ্যর পারেঙ আহান পাকরতে আমি হাদি হাদিৎ খাময়ার। পাকরিয়ার বেগ ঔহান বার খামনি ঔহানাৎ উথান-পতনর তরঙ্গভঙ্গী আহান সৃষ্টি অর। উহানরে ছন্দস্পন্দ (rhythm) বুলতারা। পারেঙ আহান পাকরতে হাদি হাদিৎ খামনি ঔহানরে যতি বুলতারা। গদ্য বার পদ্যর পার্থক্যহান যতির অবস্থানর গজে। গদ্যর যতি অনির্দিষ্ট বার অনিয়মিত।

উ (১) আকদিন \* মাদানেৎত \* সিংগারেইর'গৎ পানা অকরলু \*\* হারৌ আহানে বুজিল  
মন এহান। \*\* গরর কামে মনহান না বহের \* আকগর কথাউ হুনানি নাহের।  
\*\* মি কুং! \*\*\*

অথবা

উ (২) হাকহানর ফুতি চুটিগৎত \* কেলয়া পড়িল \* খানিপ্পারা মিঙাল, \*\* লেইরাপা  
প্রকৃতির মুঙহানাৎ \* বাত কুপাঙহানর সাদে \*\*\*

গজর উদাহরণ দ্বয়হানিৎ (\*) চিহ্ন এহানল লঘুযতি, (\*\*) চিহ্ন এহানল দীর্ঘযতি বার (\*\*\*) এহানল অতিদীর্ঘযতি হারপুয়ানি অইল। উদ্ধৃতি দ্বয়হানিৎ যতি ঔতা নিয়মিত বার সুনির্দিষ্ট অয়া না পড়েছে। অর্থবোধ অনারকা ভাব প্রকাশর সুবিধা অনুযায়ী যতি ঔতা পড়েছে। এতা গদ্যর পারেঙ। গদ্যর পারেঙে সুনির্দিষ্ট ফামে যতি না পড়ের। গদ্যর পর্ব মান্না নাগই। অপরিমিত, অসমান পর্বল সৃষ্টি অরতা গদ্য। পাঠকর অভিরুচি অনুযায়ী গদ্যৎ যতির ফাম তঙাল করানি যাকরের।

উ (৩) হুরুবাউ \* গরে যাগানে \*\*  
এসাদে মাতানি যাকরের বার

উ (৪) হুরুবাউ গরে যাগানে। \*\*

এসাদেউ মাতানি যাকরের। এপেই প্রবোধচন্দ্র সেনর কথা আহান উদ্ধৃত করানি যাকরের।

"গদ্য বার পদ্যর ছন্দর রূপহান আকহান নাগই। গদ্যভাষার ছন্দ কোন সময়ৌ অতিনির্দিষ্ট রূপ আহান নানেরগা। এরে অনতিনির্দিষ্ট বা অনতিনিরূপিত গদ্যছন্দরে মাতে পারিয়ার বাক্‌ছন্দ (speech rhythm)। বেগ বার বিরতিজাত উথানপতনময় তরঙ্গভঙ্গী, ঔহানর সাধারণ নাঙহান ছন্দস্পন্দ (rhythm)। এরে ছন্দস্পন্দ গদ্য বার পদ্য দ্বয় ভাষাতৌ আছে।" (নূতন ছন্দ পরিক্রমা)

সুপরিমিত পর্বল উৎপন্ন অরতা পদ্যস্পন্দ।

উ (৫) জলসিটা না | পানি সিটা | কিতা দিতেই | মোরে : ॥  
 ছেয়াগ না | বরন আহান | দিতেই ভিটা | গরে ॥

এপেই পারেঙহানির হাদিৎ পড়েছে যতি ঔতা অতিনির্দিষ্ট, সুনিয়ন্ত্রিত বার নিয়মিত ঔহানে এতারে আমি পদ্য বুলিয়ার। পদ্যর মূল কথাহান যতির নির্দিষ্টতা। পদ্যছন্দর পর্ব দুহানর যতি পরিমিত। যতি সুপরিমিত নাইলে ছন্দপতন দোষ বুলতারা পদ্যরচনার যতি বা পর্ব কিসাদে পরিমিত অর ঔহান নির্ণয় করানিহানেই ছন্দ শাস্ত্রর প্রাথমিক কামহান। যতি বা পর্বর আলোচনাৎ যানার আগে পদ্যর চরণ কিহানরে মাৎতারা ঔহান হারপানি থকর।

### চরণ

আগেদে মাৎলাঙ, গদ্য বার পদ্য তঙাল অবতা বিরামস্থলর ব্যবধানল। পদ্যরমা বিরামস্থলহানি (যতি) নিয়মিত বার সুনির্দিষ্ট

উ (৬) কুংগই আয়া | মাৎল বকুল বসন্ত আহি | তই ॥  
 হে মধুমালতী | অছ এমাটিক গই ॥

উ (৭) পৃথিবী এহানে , নাদেছে আমারে | কথা ॥  
 কিহানল তোরে | বিরহ কাৎক রানি ॥

উ (৮) বসন্ত রাতি ইঙাল মিঙালে | গৎ ॥  
 মায়াৎ বাহিয়া | ইঙ্গিতে ডাক | লতা ॥

উ (৯) দলর মানু — নেয়া আজি | বলর বাপক | কলছে ॥  
 এমাটিকর বেকা এগই মেকা বাতগ , অলছে ॥

গজর উদাহরণ এহানিৎ দেহিয়ারতা পারেঙহান লয়ছে ঔপেই পূর্ণ বিশ্রাম বা পূর্ণযতি পড়েছে। পূর্ণযতিল নির্দিষ্ট ছন্দোবিভাগর নাঙ চরণ বা পংক্তি। উদ্ধৃত উদাহরণ এতাৎ দ্বিধিহান করে চরণ আছে।

এপেই আরাক কথা আহান মাতানি থক ছন্দর চরণ বার লিখিত বা মুদ্রিত পারেঙ আকতা নাগই ছন্দর চরণ আহানরে মনেইল ঔসাদে আহান বা আহানাৎতৌ নিয়াম পারেঙল ইকরানি য়াকরের। অবশ্য ঔতা ইকরানিঔ পর্বযতির গজে নির্ভর করে। মনেইল ঔসাদে চরণ বাগিয়া পারেঙ হংকরানি নাকরের।

উ (১০) আহিলে মেঘে মেঘে | বরন বাদলে তি | বিজুলি ঝলকিয়া বায়ে বায়ে ॥  
 নিক্করের এরে | গারিগ হাবিগউ | ঠইগ ঝলকিয়া | আজি থাকে ॥

এরে দ্বিচরণরে বাগিয়া চারি পারেঙেউ ইকরানি য়াকরের



উ (১১) আহিলে মেঘে মেঘে | বরন বাদলে তি ,  
 বিজুলি ঝলকিয়া | বারে বারে ॥  
 নিককরের এরে গারিগ হাবিগউ ,  
 ঠইগ খলকিয়া | আজি থাকে ॥

কবিগই দৃষ্টিনন্দন করানিরকা মনেইব ঔসাদে পারেঙ নিয়াম করিয়া চরণ আহান সাজা  
 পারের চরণহান লয়ছে চিহ্ন উহান ॥ এসাদে দিতারা ,

## যতি বার পর্ব

লক্ষ করলে দেখতাঙাই উদাহরণ (৬)র চরণ দ্বিয়হানি মান্না নাছে । উ(৬)র ২য় চরণ  
 ঔহানাৎত প্রথম চরণ ঔহানে ডিগল আছে । তলর উদাহরণ ঔহানি চেইক ।

উ (১২) ছেয়া এগ | জনম এহান | পিঠিৎ অয়া | বুকগ ছকর ॥  
 কিগ থকর ॥

উ (১৩) রূপা খানি , পেইলে মিতে বিদেশ থকইং ॥  
 তোরে সকইং ॥  
 বকচা এহান , আই তুলেদে ॥  
 তোর দ্বি আতে ॥  
 ঠইগ বুজে | হাতে হাতে ॥

উ (১৪) আধারে আধারে গেলেগা লালয়া | থয়া বানা হাবি গদে ॥  
 খৌরাঙে ফুল | আছে ঠইগর লতে ॥  
 বাজের বিরহ | বিয়ানর পরে ॥  
 উতা পিদাদিয়া | মিঙাল হানরে ॥  
 অউ সুরগল | সালছে এ দিন | আধারহানর পথে ॥

গজর উদাহরণ এহানিৎ দুহান পূর্ণযতির বা চরণ দুহানর দৈর্ঘ্য মান্না নাছে । ঔতাউ  
 ছন্দর গুণহানি নষ্ট নাছে । এরে উদাহরণ এহানিৎত হারপেয়ারতা পূর্ণযতি বা চরণর  
 দৈর্ঘ্য ছন্দর ভিত্তি নাগই । ছন্দর ভিত্তিহানতে কুরাং? পদ্যর চরণ আকেইহান বিশ্লেষণ  
 করলে পেয়ারতা চরণর হাদি হাদিৎ লঘু বিরামস্থল আকেইহান আছে ।

উ (১৪)ৎ দেহিয়ারতা— আধারে আধারে | \* বুলিয়া জুহানে ক্ষণিক বিশ্রাম আহান  
 লয়া বার— গেলেগা লালয়া | \* বুলিয়া ক্ষণিক বিশ্রাম আহান লর । ঔতার পিছেদে—  
 থয়া বানা হাবি | \* বুলিয়া ক্ষণিক বিশ্রাম আহান লয়া— গদে ॥ \*\* বুলিয়া পূর্ণ বিশ্রাম  
 গ্রহণ করের । এসাদে অকরানিৎত বিশ্রাম আহান পেয়া ব্যবধান আহানরে অর্ধযতি,  
 উপযতি, হ্রস্বযতি বা যতি বুলতারা । চরণর আদিৎত বার যতি আহানাৎত আরাক

যতি আহানর নাঙ পর্ব। পর্ব এহানই ছন্দর প্রাণহান, পর্ব আহানাং ছন্দর পরিচয়, চরণহানাং নাগই। চরণর দৈর্ঘ্য ডিগল করলে বা কমেইলে ছন্দোভঙ্গ নার।

উ (১৫) খৌরাঙে ফুল | আছে ঠইগর | লতে ॥

চরণ এহানরে ডিগল করিক —

উ (১৬) খৌরাঙে ফুল | শাতয়া বাসেয়া | আছে ঠইগর | লতে ॥

এপেই — শাতয়া বাসেয়া | বুলিয়া পর্ব আহান নিয়াম করলাং থাঙো ছন্দপতন নাইল।

এখুরুম চরণ এহানরে হ্রস্ব করিক।

উ (১৭) আছে ঠইগর | লতে ॥

এপেই পর্ব আহান যাত্‌করলাঙ থাঙো ছন্দোভঙ্গ নাইল। কিন্তু পর্ব আকেইহানর দৈর্ঘ্য নিয়াম করলে বা যাত্‌করলেতে ছন্দোভঙ্গ আইতই।

উ (১৮) খৌরাঙে কুসুম | আছে ঠইগর | লতে ॥

এপেই চরণহানর ১ম পর্বং মাত্রা আহান নিয়াম অয়া উচ্চারণকালহান ডিগল আইল থাংতে ছন্দপতন আইল।

উ (১৯) বানাল ফুল | আছে ঠইগর | লতে ॥

এপেয়ো চরণহানর ১ম পর্ব হানাং মাত্রা আগ কমিয়া উচ্চারণ কালহান হ্রস্ব আইল থাংতে ছন্দপতন আইল। প্রথম পর্ব শিচ্চিল নাগই, চরণহানর যে কোন পর্ব আহানর মাত্রা সংখ্যা কমেইলে বা নিয়াম করলে ছন্দপতন আইতই। কিন্তু হাবিগি পর্বং সমান করে মাত্রা সংখ্যা নিয়াম করলে বা যাত্‌করলে নুয়া ছন্দ আহান আইতই, ছন্দোভঙ্গতে নাইতই। উ (১৫) ঔহানর পর্বং লেহে ৬ হান করে মাত্রা আছে। ঔহানরে—

উ (২০) আছেতা খৌরাঙে | ফুলগি ঠইগর | লতে ॥

এসাদে করে মূল পর্বগিং আকেইহান করে মাত্রাবৃদ্ধি করিয়া সপ্তমাত্রিক মাত্রাবৃত্ত ছন্দহান আইল। কিন্তু হাবি মূল পর্বগির মাত্রা সংখ্যা মান্না অনাই ছন্দোভঙ্গ নাইল। উ (১২)ং প্রথম চরণে ৪ হান পর্ব, দ্বিতীয় চরণে ২ হান পর্ব। উ (১৩)ং ১ম পারেঙে তিনহান পর্ব, ২য় পারেঙে আহান পর্ব, ৩য় পারেঙে ২ হান পর্ব, ৪র্থ পারেঙে আহান পর্ব, ৫ম পারেঙে দুহান পর্ব। উ (১৪)ং প্রথম পারেঙে ৪ হান পর্ব, পয়লাকার ৩ হান পর্বং ৬ হান করে মাত্রা আছে, ৪র্থ পর্বং ২ হান শিচ্চিল মাত্রা। ১ম চরণহান বিশ্লেষণ করলে ৬ + ৬ + ৬ + ২ এসাদে পেয়ার। পয়লাকার তিনহান পর্বরে মাতিয়ারতা পূর্ণপদী পর্ব বার যাত মাত্রার ৪র্থ পর্ব ঔহানরে মাতিয়ারতা অপূর্ণপদী পর্ব। পূর্ণপদী পর্ব ঔতাল ছন্দর পরিচয়। ছন্দর বিচারে অপূর্ণপদী পর্বর গুরুত্ব নেই। অপূর্ণপদী পর্ব ঔতা চরণহান স্বামনিরকা দিতারাতা। পূর্ণপদী পর্বং কইহান মাত্রা আছে ঔতাল ছন্দহান সৃষ্টি অরতা।

উ (২১) এরে মিঙাল হানাং | লুকেয়া থাইলে | কিয়া ॥

এপেই 'এরে' পর্ব এগ ছন্দর হিসাবর অতিরিক্তগ, এগরে তঙাল করে উচ্চারণ করিয়া  
পিছেদে মূল চরণহান পাকরানি এসাদে চরণহান অকরতে আগে থার যাতমাত্রাব  
অতিরিক্ত পর্ব ঔগরে অতিপর্ব বুলতারা ।

উ (২২) তোর জাঙর পারার | তালে তালে | নুপুরে র | হের ॥

এপেয়ো 'তোর' শব্দ এগ অতিপর্বগ । পর্বরে নানান নক্সাল সাজেয়া নানান আকৃতির  
পারেঙ বার স্তবক লেংকরানি যাকরের ।

উ (২৩) এলাল আছিল , খেলাল আছিল |  
কঙালা লেহাও | ফুল ॥  
পাতার হাদিং | বাসেয়া আছিল |  
পানারকা তোর | চুল ॥

উ (২৪) বরনে বরনে আধারে মেঙছে | পথ ॥  
ডেঙে ডেঙে কুড়ি লাজে নিক্কর | তারা ॥  
তোর চুলে আজি কই জনমর | গং ॥  
মোর হুদিগরে থায়া থায়া দেব | লারা ॥

উ (২৫) পাগালা মিঙালে | ডাহেরতা লৌ | দিয়া ॥  
পথগ কইতে | কই ॥  
ডেই ডেই হারা | দেছে এরে রাগ , এগ ॥  
ডালে দেই বুজে | ঠই ॥

উ (২৬) ঠইগং তিতে | লুকেয়া আছং | কি বর্তিগল | চেইতৌ ॥  
আহির পানির | বরিষা লালয়া | কিসাদে তোরে মি | পেইতৌ ॥  
বিরহ বাদলে | আধারে মামছে | পথ ॥  
তি কোন মিলন | যমুনার পার | গং ॥  
এ মাম রাতিং | হুদির নৌগ | কিসাদে করে মি | বেইতৌ ॥

উ (২৭) কিয়াকা মালতী | মাদানে শান্তছে ।  
কামিনী কুসুম | পথেদে নঙেছে | তোর ॥  
বসন্ত বনে | মৃদঙ্গ ধ্বনি ।  
নুয়া রাগহান | বাজেয়া বিরুলা | অর ॥  
আকখুলা দিন | নেই তোর চিন | হান ॥  
আহির পানিং | জঙেছিল অতি | মান ॥  
দিনহান থায়া | এবাকাতে কিয়া |  
নুংশি গংল | উতলা মাদান | পর ॥

এরে উদাহরণ এহানির (উ ২৩, ২৪, ২৫, ২৬, ২৭) ছন্দোবীতি আকহান। ছয় মাত্রার মাত্রাবৃত্ত। কারণ এতা হাবিতৌ পর্বহান লেহে ৬গ করে মাত্রা আছে। এরে ৬ মাত্রার পর্ব এতারেল নানান আকৃতির স্তবক সাজাছিতা শিচ্ছিল।

## যতি লোপ

ছন্দর ক্ষেত্র পর্ব যতি এহান হাবিত্ত গুরুত্বপূর্ণ বিষয়হান অইলেরগায়ো হাদি হাদিৎ যতির লোপ অর।

উ (২৮) দিনরাতি | পথে ধার | গরে যানা | নেই ॥  
কাম দুম | নেই তার | ঘুম খানা | নেই ॥

উ (২৯) চন্দন | মাতুহান | অছে জোনা | কর ॥  
ঙালে ঙালে | রাতিহান | বিবুলাগ | অর ॥

এরে উদাহরণ এহানির (উ ২৮, ২৯) ছন্দোবীতিহান আকহান। চারি মাত্রার মাত্রাবৃত্ত। পাকরিয়া সংশয় অনার সম্ভাবনা নেই। কিন্তু-

উ (৩০) বরনে তি : ঙের রাতি | লপুকেদে | থায়া ॥  
হাদিৎ ডা : হের কারে | গরে গরে | আয়া ॥

উ (৩১) জনমর | দিন রাতি | মিঙাল আ : ধার ॥  
হারৌ পি : যম বার | বিরহ আ : মার ॥  
তোর রূপ | তোর রঙে | আছেতা বু : জিয়া ॥  
উতাউ তো : রেতে মুঙে | নাদেহরি | কিয়া ॥

এরে উদাহরণ এহানির (উ ৩০, ৩১) ছন্দোবীতিও আগেকার উহানির সাদেতা। ঔতাউ উ ২৮, উ ২৯র সাদে যতি ঔতা নির্দিষ্ট ফামে না বহিয়া হাদি হাদিৎ লুপ্ত আছে। 'হারৌ পি : যম বার' বুলতে, 'হারৌ পি' – বুলিয়া জুহানে না খামর। আকসাটে 'হারৌ পিয়ম বার' – বুলিয়া খামরগা। এপেই পর্বর হাদির বিরামস্থল ঔতা লুপ্ত আছে। এসাদে হাদিৎ হাদিৎ যতিলোপ করলে ছন্দরমা বৈচিত্র্য আহান আহের বার কষিগরতাউ ভাব প্রকাশর সুযোগহান নিয়াম অর। যেপেই যতিলোপ আছে ঔপেই আগেকার বার পিছেকার পর্বহানি যুক্ত অয়া যুক্তপার্বিক পদ উৎপন্ন অর।

## ছেদ, ভাবযতি বা অর্থযতি

গদ্য বার পদ্য যেহানাতৌ আমি খামো খামো উচ্চারণ করিয়ার। বিশিষ্ট অর্থবাচক শব্দসমষ্টি যেপেই লয়র ঔপেই খানি খাময়ার ঔহানরে ছেদ, ভাবযতি বা অর্থযতি

বুলতারা। ভাবযতি নাদিয়া পাকরলে অর্থবোধ নার। সাধারণতঃ যতি চিহ্ন দিয়া ভাব যতিরে খেইকরিয়া দেহেয়ার

উ (৩২) কুরাং দূরেয়ে \* আছত্তা \* কাদা অয়া \* \* ॥  
বেয়ক, \* মারুপ \* মোর \* \* ॥

এপেই (\*) চিহ্ন এহানল ছেদ বার (\*\*) চিহ্ন এহানল পূর্ণছেদ দেহয়েইলাং।  
হাবি ফামে ভাবযতি বার ছন্দযতি আকপেই নাপড়ের  
গজর চরণ দ্বিয়হানির ছন্দযতি এসাদে অইতই—

উ (৩৩) কুরাং দূরেয়ে | আছত্তা কাদা অয়া ॥  
বেয়ক মারুপ | মোর ॥

## সিলেবল্

ইংরেজি সিলেবল্ (Syllable) শব্দ এগর প্রতিশব্দ আমার ভাষাৎ নেই। বাংলা ভাষাৎ অক্ষর, দল, ধ্বনি, বর্ণনির্মাণ ইত্যাদি বিভিন্ন পরিভাষা ব্যবহৃত অর। কোন কোন ছান্দসিক কবিয়ে ইমে সিলেবল্ শব্দ এগরে ব্যবহার করেছি নির্দিষ্ট পারিভাষিক শব্দ নাথানিয়ে এগল অযথা বিতর্ক বার বিভ্রান্তির সৃষ্টি আছে বর্তমান লেখকে আগেদে অমূল্যধনর মতহান অনুসরণ করিয়া সিলেবল্ অর্থাৎ 'অক্ষর' শব্দ এগ ব্যবহারর পক্ষপাতী আছিল। সংস্কৃতৎ 'অক্ষর' শব্দ এগ সিলেবল্ অর্থতৌ ব্যবহৃত অর কিন্তু অক্ষর শব্দ এগর আরাক অর্থ আহান 'মেয়েক'। ঔহানে বিভ্রান্তির সম্ভাবনা থার, বিভ্রান্তি ঔহান নেয়ক বুলিয়া আমার ভাষাৎ সিলেবল্ শব্দ ব্যবহার করানি মনেয়ার। কবি ছান্দসিক শব্দ ঘোষ গিরকেউ সিলেবল্ শব্দ এগ ব্যবহার করের। বিষ্ণুপ্রিয়া মণিপুরী চিন্তাবিদ গিরক আগয়ো বর্তমান লেখকরে সিলেবল্ শব্দ এগ ব্যবহার করানির পরামর্শ দেছিল ঔহানে আমি সিলেবল্ শব্দ এগ থইলাং

বাগ্যন্তর স্বল্পতম প্রয়াসল উৎপন্ন অর ধ্বনি ঔহান সিলেবল্। সিলেবল্হান লেহে স্বরবর্ণ আগ থার। স্বরর উচ্চারণর লগে ব্যঞ্জনবর্ণ আগ বা দুগ থানা যাকরের।

খা, দে, মৌ, শৌ ইত্যাদি শব্দ এতাৎ সিলেবল্ আকগ। আত্, বাত্, মাত্, কর্, খার্, দের্, শব্দ এতাতেই সিলেবল্ আকেইগ করে আছে বাগা, যাগা, খাগা ইত্যাদি শব্দৎ বা, গা|যা, গা|খা, গা এসাদে দুগ করে সিলেবল্ আছে। যারগা, খারগা, দের্গা ইত্যাদি শব্দতৌ দুগ করে সিলেবল্, যথা- যার, গা|খার, গা|দের্, গা শব্দএতার পয়লাকার সিলেবল্ যার ব্যঞ্জনান্ত, ২য় সিলেবল্ গা— স্বরান্ত। কারণ যার— সিলেবলর লয়ইলগা বর্ণগ ব্যঞ্জনগ(য)। গা সিলেবলর লয়ইলগা বর্ণগ স্বরবর্ণগ (আ)। ঔহানে গা— সিলেবল্ এগ স্বরান্ত সিলেবল্গ।

অমর, চামর ইত্যাদি বর্ণতৌ দুগ করে সিলেবল্ অ, মর্ | চা, মর্ | এপেইৎ পয়লাকার সিলেবল্গি স্বরান্ত (অ, চা), দ্বিতীয় সিলেবল্গি (মর্) ব্যঞ্জনান্ত।

সেংসেং, নংসাং, ইঞ্চিক, শব্দ এতাতৌ দুগ করে সিলেবল আছে সেং, সেং নং, সাং ইন্, চিক | দ্বিগিয়ৌ ব্যঞ্জনাত্ত ।

যে সিলেবলগর অন্তঃ স্বরবর্ণ থার ঔতারে স্বরান্ত সিলেবল বুলতারা । যথা চা, দে, অ, মি ইত্যাদি সিলেবলর অন্তঃ আ, এ, অ, ই এরে স্বরবর্ণ এতা আছে । ঔহানে এতা স্বরান্ত সিলেবল ।

যে সিলেবলরে আশ্রয় করিয়া অন্তঃ ব্যঞ্জনবর্ণ থার বার ঔ ব্যঞ্জনবর্ণর উচ্চারণ হসন্ত অর অর্থাৎ স্বরবর্ণ নেয়র ঔতারে হসন্ত বা হসন্ত সিলেবল বুলতারা যথা তিক্, নখ্, বাঘ্, দিছ্, কট্, মঠ্, পাপ্ ইত্যাদি সিলেবলে ক্, খ্, ঘ্, ছ্, ট্, ঠ্, প্ ইত্যাদি লয়নির ব্যঞ্জনবর্ণ ঔতার অন্তঃ স্বরবর্ণ নেই ।

ললিতা, বিশাখা শব্দ এতাং ল, লি, তা | বি, শা, খা | এসাদে তিনগ করে সিলেবল আছে তিনগিয়ৌ স্বরান্ত সিলেবল ।

ইন্দুরেখা, তুঙ্গবিদ্যা শব্দ এতাং চারিগ করে সিলেবল আছে । ইন্, দু, রে, খা | ইন্ হসন্ত, দু স্বরান্ত, রে- স্বরান্ত, খা- স্বরান্ত । তুং- হসন্ত, গ- স্বরান্ত, বিদ্- হসন্ত, দা- স্বরান্ত

রবীন্দ্র (তিনগ সিলেবল) র,- স্বরান্ত, বিন্- হসন্ত, দ্র- স্বরান্ত ।

ইন্দ্রজিৎ (তিনগ সিলেবল) ইন্- হসন্ত, দ্র স্বরান্ত, জিৎ- হসন্ত

কলঙ্ক (তিনগ সিলেবল) ক স্বরান্ত, লং- হসন্ত, ক- স্বরান্ত ।

অর্বাচীন (তিনগ সিলেবল) অর্- হসন্ত, বা স্বরান্ত, চীন হসন্ত ।

জ্যোৎস্না (দুগ সিলেবল) জ্যোৎ- হসন্ত, স্না- স্বরান্ত ।

মিলন (দুগ সিলেবল) মি- স্বরান্ত, লন্ - হসন্ত ।

স্বরান্ত সিলেবলরে মুক্ত সিলেবল বার হসন্ত সিলেবলরে রুদ্ধ সিলেবল বুলানি যাকরের । 'জ্যোৎস্না' শব্দর জ্যোৎ- রুদ্ধ সিলেবল বার স্না মুক্ত সিলেবল্গ । 'জনক' শব্দর জ- মুক্ত সিলেবল্গ, নক্- রুদ্ধ সিলেবল্গ ।

এপেই আরাক কথা আহান মাতানি থক । সিলেবল খেইকরানি এহান বর্ণ বিশ্লেষণ করানিহান নাগই শব্দ আগর স্বাভাবিক উচ্চারণবিভাগ ঔহানরে দেহ্যানিহান ।

বিষ্ণুপ্রিয়া মণিপুরী ভাষার উচ্চারণে হাদি হাদিৎ দুগ স্বরবর্ণ তিলয়া উচ্চারিত অইলে স্বরবর্ণ আকগ শিচ্চিলর ধ্বনিহান পেয়ার । 'তাও গরে গেলগা'- বাক্য এহানাৎ তাও আকগ স্বর । কিয়া বুললেতে আগেকার আ-কার উহানর লগে ও- ধ্বনি এহান তিলয়া আছে । ঔহানে 'তাও'- সিলেবল আকগ

‘তিও মাদানে আহিছ’ এপেই তি- বার ও রে আমি তঙাল করে উচ্চারণ করিয়ার।  
 ঔহানে তি (ই), ও, দুগ স্বর বার দুগ সিলেবল্।

বিষ্ণুপ্রিয়া মণিপুরী ভাষাৎ সংস্কৃতর সাদে নিতাহ্‌স্ব বার নিত্যদীর্ঘ স্বর নেই। ঔতা  
 বুলিয়া স্বরর দীর্ঘ হ্‌স্বতা নেইতা নাগই। -‘গিদেই! তোরে মি না চিনেছুগ নাগই’  
 এরে বাক্য এহানাৎ ‘গি’ হ্‌স্ব বার ‘দেই’ দীর্ঘ উচ্চারণ অর। ‘আইতা গিদেই, চাংতা  
 তোরে’- বুলতে গি- বার দেই- দ্বিগি সিলেবলৌ হ্‌স্ব উচ্চারণ করিয়ার। আমার  
 ছন্দশাস্ত্রর আলোচনাৎ সংস্কৃতর হ্‌স্ব দীর্ঘ ঔহান গ্রাহ্য নাগই। আমার স্বাভাবিক দীর্ঘ  
 হ্‌স্ব ঔহানলহে ছন্দহান স্বাভাবিক অইতইতা। ‘পানি’ শব্দ এগর পা- সংস্কৃত মতে দীর্ঘ  
 নি- হ্‌স্ব। আমারতাতে দ্বিহানিয়ো হ্‌স্ব। কিন্তু গাঠি লাগলে পানির গুরুত্বহান  
 হারপুয়ানিরকা দ্বিগিরৌ দীর্ঘ করে পা-নি-এসাদে উচ্চারণ করিয়ার।

‘কিয়াকা’ শব্দ এগরে আকতাই ‘ক্যাকা’ বুলিয়া উচ্চারণ করতারা কিয়াকা- তিনগ  
 সিলেবল্, ক্যাকা- বুললে দুগ সিলেবল্। আমার মতহান অইলতাই ক্যাকা- উচ্চারণ  
 করলে বানান হানৌ ঔসাদে ইকরানি থক। কিয়াকা- ইকরিয়া ক্যাকা পাকরানি থক  
 নেই।

ছন্দর আলোচনাৎ সাধারণতঃ স্বরান্ত সিলেবল্ হ্‌স্ব বার হ্‌সন্ত সিলেবলরে দীর্ঘ  
 ধরতারা। ঔতা বুলিয়া স্বরান্ত সিলেবল্ দীর্ঘ নারতা নাগই। তলর উদাহরণ এহান  
 চেইক।

উ (৩৪) খেইলতা মুঙে | দেখলে মাতের | দে দে | দে ॥  
 লেরিক চানার | পরে দেখতেই ঘুমে জাতা | ছে ॥

এপেই ১ম চরণর ৩য় পর্বর দে - দে - দীর্ঘ উচ্চারিত আছে

উ (৩৫) ইচুদিনর | পিছে আজি | তি - আইলে | থাং ॥

এপেই তি- উচ্চারণ দীর্ঘ।

হসন্ত সিলেবলৌ হাদিৎ হ্‌স্ব বার হাদিৎ দীর্ঘ উচ্চারিত অর-

উ (৩৬) হপন দেহিং | আহি বগিং | ঘুম আনে | দে ॥

এপেই ঘুম- সিলেবল্ এগরে অস্বাভাবিক দীর্ঘ উচ্চারণ করিয়ার। কিন্তু-

উ (৩৭) ঘুমহান মোর | বাগেছে বাদল | রাত্তি ॥

উ (৩৭)র ঘুম- সিলেবলর উচ্চারণ উ (৩৬)র ঘুম সিলেবলর উচ্চারণেত হ্‌স্ব।  
 এতারে সাধারণ নিয়ম বুলিয়া ধরানি থকনেই। কবিয়ে হাদি হাদিৎ হ্‌স্ব দীর্ঘর খেলা  
 খেলতারা। ঔবাকা কবির অভিপ্রায় অনুযায়ী পাঠকে হ্‌স্ব সিলেবলরে দীর্ঘ করে  
 পাকরতারা।



## মাত্রা নিরূপণ

মীম্বতে অনয়া ইতি মাত্রা । যেহানল পরিমাপ করানি যাকরের ঔহানরে মাত্রা বুলতারা মাত্রার মূল কথাহান কাল পরিমাণ সিলেবল্ আগ উচ্চারণ করতে সময়র যে পরিমাণহান লাগের ঔ অনুযায়ী মাত্রা পরিমাপ করতারা । ছন্দর রীতি ইলয়া মাত্রা স্থির অর সংস্কৃতৎ সিলেবলর মাত্রা নির্দিষ্ট । হ্রস্বস্বর একমাত্রা, দীর্ঘস্বর দ্বিমাত্রা আগেদে মাতেছি, বিষ্ফুপ্রিয়া মণিপুয়ী ভাষাৎ নিতাহ্রস্ব বা নিত্যদীর্ঘ স্বর নেই, 'কিগ'— শব্দৎ সিলেবল্ দ্বয়গিরমাউ হ্রস্বস্বর আছে । সংস্কৃত রীতি অনুযায়ী দ্বয়গিঔ হ্রস্ব বা একমাত্রা করে উচ্চারণ করানি । আমারতাউ একমাত্রা করে উচ্চারণ করানি । কিন্তু আমিতে হাদি হাদিৎ দ্বয়গিঔ দীর্ঘ করে উচ্চারণ করিয়ার কি— গ—, এসাদে করে । ঔতাউ সাধারণত আমি 'কিগ' শব্দ এগর সিলেবল্ আকেইগিরে মাত্রা আকেইহান করে উচ্চারণ করিয়ার । 'সীতা' শব্দর সিলেবল্ দ্বয়গিতৌ সংস্কৃত উচ্চারণ অনুযায়ী দীর্ঘস্বর আছে । ঔহানে সী দ্বি মাত্রা তা— দ্বি মাত্রা কিন্তু আমিতে সীতা শব্দর দ্বয়গি সিলবলরেউ হ্রস্ব উচ্চারণ করিয়ার । ঔহানে আমরাং সী— মাত্রা আহান তা— মাত্রা আহান, হাবিতাই দ্বিমাত্রা । সংস্কৃতর উচ্চারণর লগে আমার উচ্চারণ মান্না নেই । আমার উচ্চারণে হ্রস্ব দীর্ঘ অমাতিক নির্দিষ্ট নাগই । ছন্দর ক্ষেত্রৎ ছন্দর রীতি অনুযায়ী মাত্রা স্থির অর ।

'ইন্দ্রজিৎ' শব্দ এগৎ তিনগ সিলেবল্— ইন্ (হসন্ত), দ্র (স্বরান্ত), জিৎ (হসন্ত) । অক্ষরবৃত্ত ছন্দৎ 'ইন্দ্রজিৎ' শব্দ চারিমাত্রা অইতই । কারণ অক্ষরবৃত্ত ছন্দৎ শব্দমধ্যস্থ হসন্ত সিলেবল্ (ইন্) মাত্রা আহান, স্বরান্ত (দ্র) মাত্রা আহান বার শব্দান্তস্থ হসন্ত (জিৎ) দ্বি মাত্রা । অর্থাৎ অক্ষরবৃত্ত ছন্দৎ হসন্ত বা রুদ্ধ সিলেবল্ আগ শব্দগর হাদিৎ থাইলে মাত্রা আহান, শব্দগ লয়ইতেগা থাইলে মাত্রা দুহান । হাবি স্বরান্ত বা মুক্ত সিলেবল্ য়েপেয়ো থাক মাত্রা আহান ।

উ (৩৮) সংসার হানাৎ তোর সং নেয়ছিতা ॥

এপেই 'সংসার'র সং সিলেবল্ এগ সংসার শব্দর হাদিৎ আছেথাংতে মাত্রা আহান । লয়ইতেগা আছে সং— সিলেবল্ এগ শব্দর অন্তৎ আছে থাংতে এগরে মাত্রা দুহান লেহানি । জিৎ— শব্দৎ দ্বিমাত্রা জিংতা— শব্দৌ দ্বিমাত্রা ।

মাত্রাবৃত্ত ছন্দৎ ইন্দ্রজিৎ শব্দর পাচহান মাত্রা অইতই ইন্ (হসন্ত) দ্বিমাত্রা, দ্র (স্বরান্ত) মাত্রা আহান বার জিৎ (হসন্ত) দ্বিমাত্রা । মাত্রাবৃত্ত ছন্দৎ হসন্ত দ্বিমাত্রা স্বরান্ত মাত্রা আহান । জিৎ দ্বিমাত্রা, জিংতা— তিন মাত্রা । হসন্ত সিলেবল্ য়েপেয়ো বহক দ্বিমাত্রা

স্বরবৃত্ত ছন্দৎ ইন্দ্রজিৎ ইন্ — দ্র — জিৎ তিনগ সিলেবল্ তিন মাত্রা । স্বরান্ত সিলেবল্ মাত্রা আহান, হসন্ত সিলেবলৌ মাত্রা আহান । অর্থাৎ সিলেবল্গ লেহে মাত্রা আকেইহান লেহানি । 'পারা' শব্দৎ দুগ সিলেবল্, দ্বিমাত্রা । অঙ্গদ অং গ দ তিনগ সিলেবলর তিনহান মাত্রা ।

## ছন্দোন্নীতি

### স্বরবৃত্ত ছন্দ

ছন্দোন্নীতিহান লেপরতা মাত্রা বিন্যাসর পদ্ধতিল। যে ছন্দে সিলেবল্ আগরে (স্বরান্ত, হসন্ত) মাত্রা আহান লেহেইতারা ঐ ছন্দ ঐহানরে স্বরবৃত্ত ছন্দ বুলতারা। এরে ছন্দ এহানাৎ সিলেবল্ আগরে মাত্রা আহান ধরিয়া চারিগ সিলেবল্ পর্বহান গঠন করতারা। বাংলা ছড়ারমা এরে ছন্দ এহান ব্যবহৃত অর বাংলা ছড়াৎ ছন্দ এহানর প্রথাগত রূপহান চরণহানাৎ চারিগ পর্ব। পর্ব ঐতা ৪+ ৪ + ৪ + ২ এসাদে করে সাজেইতারা অবশ্য ৪ + ৪ + ৪ + ১ এসাদৌ অর। ৪ + ৪ + ৪ + ৩ এসাদৌ অর।

উ (৩৯) আহি ছগির | পানি হানাৎ | হাতুরলে তি | আয়া।  
ছনা রঙহান | অলরতানাই | হুদি এগৎ | থায়া ॥

এরে উদাহরণ এহানাৎ (উ ৩৯) মূল পর্বহান লেহে চারিগ সিলেবল্ বা চারিমাত্রা, অপূর্ণপদী পর্ব ঐগ দ্বিমাত্রারগ। চরণ আকেইহানাৎ ৪+৪+৪+২ করে পর্ব যোজনা করেছি।

উ (৪০) লপুক বুজে | হাওন মাহার বরন আহে | ছে ॥ ৪+৪+৪+১  
ধলেশ্বরীর, পার দিয়গি | চপপ পাহে | ছে ॥ ৪+৪+৪+১

উ (৪১) দরা আছে বরাচাউবা, আহির পানি ফুটি নেই ॥ ৪+৪+৪+৩  
এলা এতা হেলা করের লগে প্রেমর | ফুতি নেই ॥ ৪+৪+৪+৩

ছন্দ এহানল বিভিন্ন পর্বসংখ্যার চরণ, বার বিভিন্ন পারেঙর স্তবক রচনা করানি যাকরের।

উ (৪২) দুঃখহানাৎ | পুড়িয়া তি  
তোর মাটিকর | কর ॥  
বিরহল | দেনে নিংসিং |  
হে মোর প্রিয় | বর ॥

উ (৪৩) আহি ছগিং | আহিলে ঘুম | হান ॥  
যাউরিগা মি | হপন হানর | লামে ॥  
কুরাৎ কুরাৎ | গিয়া বুলা | নিৎ ॥  
ইমার কাদাৎ | নাথাউরি নাই | ফামে ॥

উ (৪৪) কনাক কালে পাহিয়াগ  
অছিলুতা | পাউরি ॥  
লেহাও জারিৎ | আয়া মিতে ॥  
এলা হানি | দিতে দিতে ॥  
কিসাদে থাৎ | গরে আইলু।  
উহান নিংসিং | নাউরি ॥

গজর উদাহরণ এতৎ দেহিয়ারতা স্বরবৃত্ত ছন্দঃ পর্বহান লেহে চারিহান করে মাত্রা সিলেবল্ দিয়া স্তবক চরণ ঔতারে বিভিন্ন আকৃতিল সাজাছি। উ (৪৪) চেইক প্রথম পর্বৎ ক- নাক কা লে, চারিগ সিলেবল্। ক- এরে স্বরান্ত সিলেবল্ এগরে যেসাদে মাত্রা আহান লেহাছি, নাক্- এরে হসন্ত সিলেবল্ এগরৌ মাত্রা আহান লেহাছি। স্বরবৃত্ত ছন্দর হাবি উদাহরণেউ এহান পেয়ার।

এরে ছন্দোন্নীতি এহানাৎ পর্বগৎ চারিগ সিলেবল্ বা চারিগ করে মাত্রা থার। এহান সাধারণ নিয়মহান। হাদি হাদিৎ নিয়ম এহানর ব্যতিক্রম দেহিয়ার (দ্রঃ পরিশিষ্ট, স্বরবৃত্ত ছন্দ)।

উ (৪৫) জাম জার না | গাটর পানি ॥  
কুংগইতে | উহান জানি ॥  
বিয়ান মাদান | মন এহানে।  
খালকরিয়া | থারতা ॥

এপেই উ (৪৫) প্রথম বার দ্বিতীয় চরণর ১ম পর্ব ঔগিৎ জাম্- জার- না বার কুং গই- তে এসাদে ত্রিনগ করে সিলেবল্ বা তিনগ করে মাত্রা আছে।

উ (৪৬) বিরহী ডেঙে আহিলতা পৌ, প্রিয় আহি | তই ॥

এপেই ১ম পর্বৎ বি- র- হী- ডে- ঙে- পাচগ সিলেবল্ বা পাচ মাত্রা আছে। এহানৌ হাদি হাদিৎ যাকরের। স্বরবৃত্ত ছন্দর স্বাভাবিক রূপহান পর্বগৎ চারিগ মাত্রা থানা।

স্বরবৃত্ত ছন্দর পর্বর অকৃতিহান নির্দিষ্ট বুলিয়া এরে ছন্দ এহানাৎ মূল শব্দ আগরে বাগিয়া পর্ব দুগৎ দেনা যাকরের।

উ (৪৭) চাকামে হ | মেয়া আজি দেখলু ইমার দৌ ॥

উ (৪৭) এ 'হমেয়া' শব্দ এগরে বাগিয়া দুগ পর্বৎ নেছিগাতা 'চাকামে হমেয়া'- এরে শব্দ দ্বিগারে পর্ব আগৎ নেনা সম্ভব নাইল থাংতে কারণ চাকামে- তিন মাত্রা। ১ম পর্বৎ আরাক মাত্রা আগ লাগেরতা চারি মাত্রা ফাকরানিরকা। হমেয়া- শব্দৎত মাত্রা আগ আনিয়া ১ম পর্বর চারি মাত্রা ফাকরিয়া অতিরিক্ত থাইল ঔতা দ্বিতীয় পর্বৎ গেলগা

## মাত্রাবৃত্ত ছন্দ

মাত্রাবৃত্ত ছন্দরে বিভিন্ন ছান্দসিকে আধুনিক মাত্রাবৃত্ত ছন্দউ বুলতারা। সংস্কৃতৎ মাত্রাবৃত্ত ছন্দ আছে। কিন্তু আধুনিক মাত্রাবৃত্ত এহানর রূপহান সংস্কৃত মাত্রাবৃত্তৎত সম্পূর্ণ তঙাল। আমি অবশ্য মাত্রাবৃত্ত বুলতে আধুনিক মাত্রাবৃত্ত ঔহান হারপেইতাঙাই।

মাত্রাবৃত্ত ছন্দঃ স্বরান্ত বা মুক্ত সিলেবলগরে মাত্রা আহান লেহেইতারা। হসন্ত সিলেবলগরে দ্বিমাত্রা ব্রত- ব্র স্বরান্ত ত স্বরান্ত ঔহানে মাত্রা আকেইহান করে দ্বিমাত্রা লেহানি। সুব্রত- শব্দঃ সুব্- (হসন্ত) দ্বিমাত্রা, ব্র- স্বরান্ত ১ মাত্রা, ত স্বরান্ত ১ মাত্রা। এরে ছন্দোরীতিঃ যুক্তবর্ণর আগেকার বর্ণগরে দ্বিমাত্রা লেহানি ঔহান নিয়মহান দুঃখ (উচ্চারণ-দুঃখ) দুক্- হসন্ত দ্বিমাত্রা, ঋ-স্বরান্ত মাত্রা আগ। অংতা- অং হসন্ত দ্বিমাত্রা, তা- স্বরান্ত মাত্রা আগ। জ্যোৎস্না- জ্যোৎ- হসন্ত, মাত্রা দুগ, স্না- স্বরান্ত মাত্রা আগ। ঐ - (অই) বা ঔ (অউ) স্বরবর্ণ দ্বয়গিরে দ্বিমাত্রা করে লেহেইতারা। এপেই আরাক কথা আহান মাতানি থক। 'অমৃত' শব্দ এগরে আকতাই 'অম্রিত' উচ্চারণ করিয়া চারিমাত্রা ধরতারা। ঔহান নাগইহান, ঋ-কার এহান আসলে স্বরবর্ণগ ঔহানে অমৃতর উচ্চারণ অ- মৃত, তিন মাত্রা অইতই। এহান ডাঙর কবিয়ে পেয়া ভুলকরতারা মাত্রাবৃত্ত ছন্দর পর্ব আহানাঃ চারিগ, পাচগ, ছয়গ বা সাতগ করে মাত্রা থার।

### চারিমাত্রার বা চতুর্মাত্রিক মাত্রাবৃত্ত

উ (৪৮) ঝলকার জমকাগি , তোর দ্বয় | কানে ॥  
বুকগর | বেরুনিয়ে , বানাহান | জানে ॥

উ (৪৯) আয় আয় | ডিল নাক এখুরুম | তোর ঠুম লাগলে ॥  
হাবি বানা পুন্নাপে দেনা তোরে আয়া তিতে ডাকলে ॥

উ (৫০) বসন্ত | পঞ্চমী তিথিঃ কু : মেই ॥  
ঝলমল | করেছেতা | আহো আজি | চেই ॥

উ (৫১) দুঃখর , নুঃশিঃ |  
তোর মায়া | হান্  
হদিগৎ | বুজে দিয়া  
দের তোরা | দান ॥

উ (৫২) জম জম বরনর সময়র | গই ॥  
দশরথ | কমলর | মহনক | কই ॥  
থক থক , ধর ফল | সর সর | মজ ॥  
পড় পড় | টপ টপ | গরগর গজ ॥  
আয় আয় , হবা পাতা কঙালাতা | অয়া ॥  
গাছ জার | সাজা সাজা | বানাহান থয়া ॥  
বাদলর | মাম মাম | মাদানর | পর ॥  
জাম জার | কালা অয়া | মজা ফল ধর ॥  
ইঙ ইঙ | দিনহান | কতি কালি | রাতা ॥  
খঙ বিল | পানিগই | টিপ টিপ | চাতা ॥

পিনপিনি , পিনপিনি | বার জম | জম ॥  
 দিনহান | তিঙাতিঙা | পাহিয়ার জম ॥  
 শচীরানী | লাতলর পাতাখানি | আন ॥  
 সীতা আন | ভারতীর | হবা চাতি | হান ॥  
 মালতীর | নীল নীল | ইনাফির | সাজ ॥  
 বীণা আজি | যারি দিরি | থয়া কাম | কাজ ॥  
 উঠানর | বকুল | হুকহুক | ফুল ॥  
 পুলকর আগ দুগ জাকাগৎ তুল ॥  
 উমফুতি উরানির | আজি দিন | হান ॥  
 উঠ উঠ | হনামানু | শালহান | আন ॥  
 চুড়ামণি | ফলমূল | থয়া থয়া | আন ॥  
 রূপবতী | ধূপ দিয়া | কর পূজা | হান ॥  
 উষারানী | যুথিকার | নূপুর গি | কই ॥  
 রূপা দিয়া | লছিলুতা | নাকরিয় | চই ॥  
 মাতৃভূমি | ভারতর | নাঙহান | কাক ॥  
 কৃতি জিপু : তর কথা | পাহুবানি | নাক ॥  
 ভারতর | হাবিতাউ | অমৃত আ : মার ॥  
 হুদিগ পা : হিয়া পাছি | বানাউ অ : পার ॥  
 সেনাতলে , খেলা খেলা | আছেহান | চেই ॥  
 বেলা ইচে | বুলে বুলে | আছে লেই , কেই ॥  
 এলা দেতা | বাবুসেনা | কাদিরি সে : বাই ॥  
 ডাকগল | মেরা তিতে | নাছে নাছে | আই ॥  
 মৈ তোর খৈ | খার | ছাগল আ : গই ॥  
 মৈরাঙে | লাহলেদে | করেরতা | গই ॥  
 খৈনাঙ | জারে কয়া | ঠৈরব | চান ॥  
 লামে নুয়া | রিয়া আছে | লৈলাট | হান ॥  
 সোমবারে | মোহিনীর | গরে মহা | রাস ॥  
 শোভারানী | বিসারেয়া | আছে হবা | সাজ ॥  
 গোপীগির | অজাগতে | গোলোকর | দাদা ॥  
 বাবুলোক | জুত কর | দিন আছে | কাদা ॥  
 গৌরর | মৌহান | মৌরই | খার ॥  
 চৌরিয়া | শৌগই | পাক্দিয়া | চার ॥  
 লৌদের | গৌরই | সাজৌতে | কই ॥  
 হুন্যশৌ | মৌহান | রাহে রাহে | থই ॥

এরে উদাহরণ এতাং পর্বহান লেহে চারিহান করে মাত্রা আছে। এপেই অমৃত, মাতৃভূমি প্রভৃতি শব্দর 'ম্' মাত্রা আহান করে লেহাছি।

এখুরম আরাক দৃষ্টান্ত আহান চেইক।

উ (৫৩)	কালচানে   বালা নয়া   বিসারার   তালাগ ॥	৪+৪+৪+৩
	পালা উলি   বয়া আছি   বছে ফিজাঙ   আলাগ ॥	৪+৪+৪+৩
	দারা নালা   নেয়া তার   কর্মউ , তা করেয় ॥	৪+৪+৪+৪
	বালা না আ : টিয়া চানে , তার   কিরা   তা ধরেয় ॥	৪+৪+৪+৪
	কানে কানে   মাতের তা   - জামিরালা   যেইগা ॥	৪+৪+৪+৩
	হালাক উগ   আছে নেই   বিসারেয়া   চেইগা ॥	৪+৪+৪+৩
	কালাপানি   নাগইক   ইমে এরে , কাদাগ ॥	৪+৪+৪+৩
	জালা এগি   উপুগৎ   থঙ, হনা   দাদাগ ॥	৪+৪+৪+৩
	আলা সালা   কাম এতা , নুয়াররি   জারানি ॥	৪+৪+৪+৩
	শরাতর   আগে মোরে   মনাহতা   মারানি ॥	৪+৪+৪+৩

এহানর ছন্দ বিশ্লেষণ করিয়া চেয়ারতা এহান চারি মাত্রার মাত্রাবৃত্তল লেংকরেছি কবিতাহান। কিন্তু দ্বিতীয় চরণর তৃতীয় পর্বৎ 'বছে ফিজাং' বার ৬ষ্ঠ চরণর ১ম পর্বৎ 'হালাক উগ'— পাচগ মেয়েক। দৃষ্টিগ্রাহ্য পাচগ মাত্রা। ওতাউ ছন্দ বিশ্লেষণ করতে ৪গ মাত্রা ধরেছি। ছন্দেউ ছন্দপতন নাহে। এপেই 'ফিজাং আলাগ' সন্ধি করিয়া ফিজাঙালাগ পাকরানি। এসাদে—

উ (৫৪) পালা উলি | বয়া আছি | বছে ফিজা , জালাগ

৬ষ্ঠ চরণর ১ম পর্বউ এসাদে অইতই— 'হালাক উগ' সন্ধি করিয়া করেছি তা হালাকুগ

উ (৫৫) হালাকুগ | আছে নেই | বিসারেয়া | চেইগা।

'ওয়া' এরে মেয়েক দ্বিগিয়ে তিলয়াও সিলেবল আহান উচ্চারিত অর।

উ (৫৬) হাওয়া ফুটি | আনেদেগা | মওয়া নেই , গরেদে ॥

কিসাদে আ : ধারে থানা | এ দওয়ার | পরেদে ॥

পাঙ সায়া | আওয়া অয়া , নাথাই তি | বহিয়া ॥

খওয়া নুয় : রিয়া বাত | আছু মিতে | ডহিয়া ॥

এপেই হাওয়া, মওয়া, দওয়া, আওয়া, খওয়া শব্দ এতাং দৃশ্যমান তিনগ করে মেয়েক থাইলৌ দ্বিগি করে স্বরান্ত সিলেবল আছে, হা—ওয়া, ম—ওয়া, দ—ওয়া, আ—ওয়া, ওয়া। 'ওয়া' এগ হিন্দি বার অসমীয়াং বর্ণ আগল ইকরতারা ; এপেই বর্ণ দুগ অয়াও আগ করে সিলেবলর মূল্য পাছে।

## পাচ মাত্রার বা পঞ্চমাত্রিক মাত্রাবৃত্ত ছন্দ

উ (৫৭) মধুর রাতি বিধুর অয়া | ছেয়ায় ডালে | পালয়া ॥  
 মধু মাহান | আহেছে কোন | অমরাবতী | লালয়া ॥  
 কুমেই তার | বরিয়া লই | এপেই আহো | হাবিয়ে ॥  
 ঋতুরাজা | রে কলকরগা , যুবতী লেই | সাবিয়ে ॥

এপেই ৫+৫+৫+৩ এসাদে করে চরণহান লেহে মাত্রা যোজনা করেছি ।

উ (৫৮) তোর সালেদে | দুঃখ জ্বালা | হাবিতা পানা ॥  
 তোর সালেদে | মোর বুকদে , পুলর বানা ॥  
 তোর সালেদে | জনমহান | মাংকরানি ॥  
 তোর সালেদে | আহি ছিয়গি , মামকরানি ॥  
 তোর সালেদে | হারৌ অনা | নাকরলু মি ॥  
 তোর সালেদে , নুঙেইহান , পাহরলু মি ॥  
 তোর সালেদে নেয়ছে মোর | রাতির ঘুম ॥  
 তোর সালেদে | মরণহান | অরতা ঠুম ॥

উ (৫৯) লুকেয়া তিতে | কলিরা মেখে | এ হাক বুজে | থাইলেতা ॥ ৫+৫+৫+৪  
 বিজুলি অয়া ইসারা দিলে | অন্তরে তি , নাইলেতা ॥ ৫+৫+৫+৪

উ (৬০) কঙালা তোর | কান্তিহান |  
 বিয়ানে ডালে |  
 শিলছে ॥  
 বিশ্ব বুজে | হারৌহান |  
 খয়াং তোর |  
 তিসছে ॥

উ (৬১) তোরে দেনায় | ফুলর ডাল দরিয়া আতে | থাইলুতা ॥  
 বর্তিগল | ভালকরিয়া | মিঙালে পথ | আইলুতা ॥  
 সঙ্গী নেই | হাকর তলে | আধারহানে | কাদলতা ॥  
 মৃত্যুরঙে | সাতছে তোর | বানায় মোরে | বাধলতা ॥

উ (৬২) আহিগি তোর | বুজে আছিল | কথা ॥  
 মধুর সুর | বুনের বুক | হাবি ॥  
 গোপন এলা | পারিগ বেরা | বেরা ॥  
 ফিজেন্ অর | তোরাং লেই | সাবি ॥



উ (৬৩) বকুল বনে । ছেয়ায় গাঢ় । পথগদে ॥  
 উতলা বউ । অছেতা উদ্য । সিনী ॥  
 পাতার লগে । মাতিরি তেই । কার কথা ॥  
 কার নুপুরে । বাজের কিনি । কিনি ॥

এপেই (উ ৬৩) ৫+৫+৪, ৫+৫+২, ৫+৫+৪, ৫+৫+২ এসাদে করে চরণ সাজাছি ।  
 পঞ্চমাত্রিক মাত্রাবৃত্ত মাত্রা পাচোগিরে ৩ +২ অথবা ২+৩ করে দেনা যাকরের । ঔতাই  
 ৩+২ করে দিলে ছনতে নুংশি অর ।

ছয়গ মাত্রার বা ষন্মাত্রিক মাত্রাবৃত্ত ।

মাত্রাবৃত্ত ছন্দর হাবিৎত প্রচলিত বার কবিয়ে নিয়াম নুঙেই পেইতারা পদ্ধতিহান  
 ষন্মাত্রিক পর্বর মাত্রাবৃত্ত ।

উ (৬৪) মেই ষঙেৎত । সেচেইলে মেই । খুম ॥  
 সেচতই মাম । তোর আহিগির । ডালে ॥  
 সেন্দা হানরে । তেরাগ যেসাদে । আয়া ॥  
 মাঠিয়া দেবতা । ডালহান ডালে । ডালে ॥

উ (৬৫) এলার সুরল । পথগ অছেতা । খং ॥  
 এতার হাদিৎ । ডিতে কিয়া লুকা । ছং ॥

উ (৬৬) মিঙালে মাতের । তাতে নেই, তাতে । নেই ॥ ৬+৬+২  
 আধারে মাতের । মোর বুকগৎ । তেরাগি লাগেয়া । চেই ॥ ৬+৬+৬+২

উ (৬৭) বরনে বাদলে । মেঘ মল্লারে । কার পৌহান । বাহিয়া যারগা । হাকে ॥  
 এপারর লগে হৌপারহান । সামো নুয়ারেছে । সুরঙ্গর লুরি । নানে ॥  
 টেইপাঙ হান । চেপো নুয়ারের । হপনহানর । কাদাং মিকুপ । হান ॥  
 কিতাল বাদানি । থঙহান এরে । আহির পানির । পায় নেই হৌ । পারে ॥

উ (৬৮) বসন্ত বনে । জঙলে ফিজেৎ । তোর ॥  
 খৌরাঙহানে । ঠুনিংসা বেলা । বেলা ॥  
 তোর খুৎতল । মনার লক্ক । রানি ॥

উ (৬৯) দূরে মিকুপ । দেহেছিলু তোর । হনার ইনাফি । আবরণ ॥  
 'নুয়া চম্পক । আভরণ ॥  
 কাদাং চাছু মি । অভিনব করে ॥  
 গাঢ়া নীলুয়া । ইনাফি হানরে ॥  
 চল চপলার । চকিত চমকে । ক্ষয়ের চরণ । বিচরণ ॥  
 কই চম্পক । আভরণ ॥

—রবীন্দ্রনাথ, 'আবির্ভাব' (অনুবাদ)

উ (৭০) সন্ন্যাসী উপ | শুণ্ড ॥  
 মথুরা পুরীর | প্রাচীর তলে | আকদিন আছে | সুণ্ড ॥  
 নগরে বর্তি | নিবেছে পবনে ॥  
 দুয়ার গাটেছি | পৌর ভবনে ॥  
 রাতিকার তেরা | হাওন হাকেকে | গাড় মেঘে অব | সুণ্ড ॥  
 —রবীন্দ্রনাথ, 'অভিসার' (অনুবাদ)

উ (৭১) ঠাইগ বুজিল | বাশির সুরে ॥  
 দূরেই পথর | আহিল ডাক ॥  
 মামছে ছেয়াগ | সাক্ষে বনে ॥  
 এলারে ডালের | মেঘালা হাক ॥

এরে উদাহরণ এহানাৎ (উ ৭১) পূর্ণপদী পর্ব ঔতা ছয়মাত্রার বার অপূর্ণপদী পর্ব হাবিৎ পাচগ করে মাত্রা আছে ।

উ (৭২) কিসাদে চিনানি তোরে এ আধারে |  
 মাতনে মাত ॥  
 তোর বানাহান | পানার সালেদে |  
 পাতেছু আত ॥

এরে উদাহরণ এহানাৎ ১ম বার ৩য় পারেঙর পর্ব ঔগিৎ ছয়হান করে মাত্রা আছে । ২য় বার ৪র্থ পারেঙর অপূর্ণপদী পর্ব ঔগিৎ পাচহান করে মাত্রা

### সপ্তমাত্রিক পর্ব

সপ্তমাত্রিক ছন্দর মূল পর্বগিৎ সাতহান করে মাত্রা থার ।

উ (৭৩) আহির পানি সিটা | করিয়া খুৎতাঙে ॥  
 শাতছে মামহান | দিতৌ কার নাঙে ॥  
 কইতে মেঙশেল | আহির মুঙে কই ॥  
 হাদির ছেয়া এগ | কুরাং অর চই ॥  
 উ (৭৪) মাতিল কথাহানি | মাতিয়া লই নাছে |  
 শাচাক নিকুলিল | গালয়া ॥  
 মিকুপে রাতিহান | লালয়া গেলগাতা |  
 হমাজি যাউরিগা | আলয়া ॥  
 তিঙেছে বৌহান | বানাল আছে তাতে ॥  
 শাতছে দলা তেরা | কি কথা মাতে মাতে ॥  
 বাসাছে তোর সালে | হারৌয়ে খুৎতলে |  
 মাতৌয়ে মঙহানে | পালয়া ॥

এরে উদাহরণ দিয়হানির পয়লকার ঔহানাৎ (উ ৭৩) চরণহানাৎ ৭|৭ করে মাত্রা আছে, অপূর্ণপদী পর্ব নেই। কিন্তু পিছেকার উদাহরণ ঔহানর (উ ৭৪) মূল পর্বগিৎ সাতগ করে মাত্রা আছে। অপূর্ণপদী পর্ব ঔতাৎ আছেতাই তিনগ করে মাত্রা ৭|৭|৭ ৩, ৭|৭, ৭|৭, ৭|৭|৭|৩ এরে পদ্ধতি এহানল মাত্রা যোজনা করেছি।

উ (৭৫) আহিলে মেঘে মেঘে | বরনে বাদলে তি  
 বিজুলি কলকিয়া | ঝারে ঝারে ॥  
 নিকরের এরে | পারিগ হাবিগউ |  
 ঠইগ খলকিয়া | আজি থারে ॥  
 শঙ্কা উপজের | বরন কলরবে ॥  
 মাধবী মল্লিকা | কঙালা পল্লবে ॥  
 চরণ শব্দর | সঘন ঝন ঝন ॥  
 তোর এ মঞ্জীরে | লই নারে ॥

সপ্তমাত্রিক পর্বরে ৩|৪ করে মাত্রা সাজেইলে ছন্দর প্রবহমানতা নষ্ট নার। অবশ্য রবীন্দ্রনাথে ২য় পর্বগৎ ৪|৩ করেউ মাত্রা সাজাছে। ঔহানর অনুকরণে উদাহরণ আহান দেনা যাকরের।

উ (৭৬) শাতছে : বনে বনে | আশাহানি : কুড়ির

এসাদে করিয়া (ছিলাম : নিশিদিন | আশাহীন : প্রবাসী) সপ্তমাত্রিক ছন্দর মসৃণতাহান বাগেদিয়া বৈচিত্র্য সৃষ্টি করেছে। কিন্তু সাধারণভাবে সপ্তমাত্রিক পর্বৎ রবীন্দ্রনাথে ৩+৪ করে মাত্রা যোজনা করিয়াও সৌন্দর্য সৃষ্টি করেছে। প্রাচীন কবিতাৎ সপ্তমাত্রিক মাত্রাবৃত্তর ব্যবহারর দৃষ্টান্ত আহান তলে দিলাৎ।

উ (৭৭) নন্দ নন্দন | চন্দ চন্দন | গন্ধনিমিত্ত | অঙ্গ।

এরে উদাহরণ এহানাৎ ৩ : ৪+৩ : ৪+৩ : ৪+৩ এসাদে মাত্রাযোজনা করেছি।

### সপ্তমাত্রিক মাত্রাবৃত্ত বার সংস্কৃত মন্দাক্রান্তা ছন্দ

সংস্কৃত মন্দাক্রান্তা ছন্দর বিশেষ করে মেঘদূতর অনুবাদ করতেগা অধিকাংশ অনুবাদকে যথা, প্যারীমোহন সেনগুপ্ত, বুদ্ধদেব বসু বার আরতায়ো সপ্তমাত্রিক পর্ব ব্যবহার করেছি। কিন্তু সংস্কৃত ছন্দর লগে বাংলা অসমীয়া বার বিষ্ণুপ্রিয়া মণিপুরী ছন্দর প্রধান পার্থক্যহান অইলতাই সংস্কৃত ছন্দৎ কুম্পেই হ্রস্ব বার কুম্পেই দীর্ঘ ঔহান নির্দিষ্ট।

উ (৭৮) কচ্চিদকান্তা | বিরহগুরুণা | স্বাধিকার | প্রমত্তঃ ॥

এপেই পর্বহানিৎ ৮|৭|৭|৫ এসাদে মাত্রা যোজনা আছেতা শিচিল নাগই, লঘু গুরুর সমাবেশ ঔহানৌ নির্দিষ্ট। রবীন্দ্রনাথে মেঘদূতর ১ম বার ২য় শ্লোক ঔহানি কতধুরম

অনুবাদ করেছে। অনুবাদ আহান এসাদে—

উ (৭৯) কোনো এক যক্ষ সে | প্রভুর সেবা কাজে | প্রমাদ ঘটাইল | উন্নয়ন

এপেই ৮ | ৭ | ৭ | ৪ করে মাত্রা যোজনা করেছে হায়হান (হাদিৎ হেইরাপ মধ্যমিল আহানৌ দেছে) ঔতাউ এহান সংস্কৃত মন্দাক্রান্তাহান নাগই। সংস্কৃত মন্দাক্রান্তাৎ প্রথম পর্বৎ চারিগ শুরু অক্ষর। ২য় পর্বৎ পয়লাকার পাচগ লঘু, পিছেকার ঔগ শুরু (দ্বিমাত্রা) এসাদে করে অয়া যিতইগা। ঔ মাত্রা যোজনায় ব্যতিক্রম অন্য নাকরের। সত্যেন্দ্রনাথ দত্তই সংস্কৃতর লঘু শুরু এহান যথাসম্ভব থয়া স্বরচিত্ত কবিতা আহানাৎ বাংলা মন্দাক্রান্তা এসাদে আনছে—

উ (৮০) পিজল বিহেল | ব্যথিত নভতল | কই গো কই মেঘ | উদয় হও ॥

সন্ধ্যার তন্দ্রার | মুরতি ধরি আজ | মন্দ্র মম্বর | বচন কও ।

(কুহ ও কেকা, 'যক্ষের নিবেদন')

এপেই যথাসম্ভব আনছে, সম্পূর্ণ আনে নুয়ারেছে। কারণ বাংলা, অসমীয়া বার বিষ্ণুপ্রিয়া মণিপুরীৎ স্বভাবগুরু, স্বভাবলঘু সিলেবল নেই। এরে ভাষা এতাৎ পর্বগৎ কইহান মাত্রা থাইতই ঔহান নির্দিষ্ট কিন্তু লঘু গুরুর সমাবেশ নির্দিষ্ট লাগই। কুম্পেই লঘু বার কুম্পেই গুরু ঔহান নিরূপিত নাগই।

উ (৮১) নিদ্রা নেই রাতি মুক্ত দৃষ্টিল, চাউরি অন্তরে । হে প্রিয়তম ॥

এসাদে যুক্তবর্ণ বা গুরু সিলেবলর সমাবেশ করানি যাকরের। অথবা এসাদৌ ইকরানি যাকরের।

উ (৮২) নেয়ছে ঘুমহান, হজাক আহিগিল | চাউরি ঠাইগৎ | হে প্রিয়তম ॥

এসাদে সম্পূর্ণ লঘু সিলেবলর সমাবেশ করলেউ বিষ্ণুপ্রিয়া মণিপুরীৎ ছন্দহান লাল নাইতই। কারণ, দ্বয়হান উদাহরণেউ (উ ৮১, ৮২) ৭+৭+৭+৫ করে মাত্রা সমাবেশ করেছে।

আধুনিক অনুবাদকে ৮+৭+৭+৫ মন্দাক্রান্তার এরে পর্বসমাবেশ এহান নাউ যাকতারার। সাধারণতঃ সপ্তমাত্রিক পর্বল মেঘদূতর মন্দাক্রান্তা ছন্দ ঔহানর অনুকরণ করতারা। এরে পদ্ধতি এহান ইলয়া সংস্কৃত মেঘদূতর অনুবাদ আহান দিলাৎ।

উ (৮৩) তম্বী শ্যামা | শিখর দশনা | পঙ্ক বিদ্যা | ধরোষ্ঠী

মধ্যে ক্ষামা | চকিত হরিণী | প্রেক্ষণা | নিম্ন নাভিঃ ॥

শ্রোণী ভারা | দলস গমনা | স্তোক নম্রা | স্তন্যভ্যাং ।

যা তত্র স্যাদ্ | যুবতী বিষয়ে | সৃষ্টিরাদ্যে | ব ধাতুঃ ॥

(উত্তরমেঘ, শ্লোক ২২)

তলে অনুবাদর ছন্দহান—

উ (৮৪) তম্বী শ্যামা তেই | লিখর দশনাগ | পকু বিশ্বর | সাদানে অট ॥  
কাকালি অতিকীর্ণ | গভীর নাভি উগ | চকিতা অরিঙিগ | আহির পট ॥  
স্তনর ভরিহানে | নঙেছে খানি খানি | শ্রোণীর ভরিহানে | আটানি তাপ ॥  
ধাতাই রচেছেগ | প্রথম যুবতীগ | হাবিতা হবাহানি | করেছে নাপ ॥

এপেই সংস্কৃত রীতির অনুসরণ নাকরেছি। ঔহান করানি সম্ভবৌ নাগই। কিয়া বুললেতে সংস্কৃত বার বিষ্ণুপ্রিয়া মণিপুরী উচ্চারণ পদ্ধতির মৌলিক পার্থক্য থানাই ছন্দ আহানরে আরাক ছন্দ আহানাং আনানি নাউ অইতই। আনানির চেষ্টা করলে ঔহান বিষ্ণুপ্রিয়া মণিপুরীর স্বাভাবিক উচ্চারণর পরিপন্থী বার কৃত্রিম অইতই।

অনুবাদর ছন্দ ঔহানে (উ ৮৪) বার তলর (উ ৮৫) উদাহরণ উহানে ছন্দ আকহান।  
পর্ব আকেই হানাং সাতগ করে মাত্রা আছে অর্থাৎ দ্বিয়হানৌ সপ্তমাত্রিক মাত্রাবৃত্ত ছন্দ।

উ (৮৫) মাতিল কথা নেই | হাওন পৃথিবীং ॥  
মনর গাটহান | মান্না পারগিৎ ॥  
হুদির গজে আজি | ছেয়াগ পুলছেতা ॥  
ঠইগ বুজে তোর | সুরভি খানি দেতা ॥

### অক্ষরবৃত্ত ছন্দ

অক্ষরবৃত্ত ছন্দ এহান গভীর রৌহান শেলুপুঙহানর সাদে। ঔহানে মহাকাব্যং ছন্দ এহান ব্যবহার করতারা কবিয়ে। কতগ ছান্দসিকে অক্ষরবৃত্তরে ধ্রুপদ জাতীয় ছন্দৌ বুলতারা। এলারমা ধ্রুপদ যেসাদে হাবিৎত গভীর, ছন্দরমাউ অক্ষরবৃত্ত হাবিৎত গভীর। অক্ষরবৃত্ত ছন্দর মাত্রা গণনার পদ্ধতিহান অইলতাই শব্দমধ্যস্থিত হসন্ত বা রুদ্ধ সিলেবল্ মাত্রা আগ, শব্দান্তস্থ হসন্ত সিলেবল্ দ্বিমাত্রা লেহানি হাবি স্বরান্ত সিলেবল্ মাত্রা আগ লেহানি।

উ (৮৬) সংসার এহান বুজে | পাছু তোর সং ॥

এপেই ‘সংসার’ শব্দর সং— শব্দগর হাদিৎ আছে হসন্ত বা সিলেবল্গ থাংতে মাত্রা আগ, বার শব্দান্তস্থ হসন্ত সিলেবল্ দ্বিমাত্রা এ— স্বরান্ত সিলেবল্ মাত্রা আগ, হান্— শব্দান্তস্থ হসন্ত সিলেবল্ দ্বিমাত্রা, বু— জে দ্বিমাত্রা। প্রথম পর্বৎ মাত্রা আটগ, দ্বিতীয় পর্বৎ পা— ছু দ্বিমাত্রা। তোর— দ্বিমাত্রা সং— (অর্থহান সঙ্গ) দ্বিমাত্রা। দ্বিতীয় পর্বৎ ছয়গ মাত্রা। হাবিতাই (৮+৬)= ১৪ মাত্রা। এপেই ‘সংসার’ শব্দর সং— সিলেবল্গ শব্দগর হাদিৎ আছে বুলিয়া আগ মাত্রা, কিন্তু ২য় পর্বৎ সং— দ্বিমাত্রা লেহেইলাং।

উ (৮৭) জ্বি এগ লাগিল চানে | বুরুং বুরুং ॥

রুং— দ্বিমাত্রা অছেতা শব্দান্তস্থ হসন্ত সিলেব্লগ আরো ।

অক্ষরবৃত্তরে নাঙ এহান মাংতারাতা ছন্দ এহানাং দৃশ্যমান অক্ষর সংখ্যাল আগেদে মাত্রা লেহেইলা আরো ।

উ (৮৮) দুর্গম পছাগ অক | নায়েনে আছিল ॥

এপেই দৃশ্যমান ১৪গ অক্ষর আছে, মাত্রাউ ১৪গ । কিন্তু অক্ষরল মাত্রা লেহানি এহান বৈজ্ঞানিক পদ্ধতিহান নাগই । সিলেব্ল লেহেয়া মাত্রার হিসাব করলে হাবি সংশয় দূরেই অর ।

### পয়ার

অক্ষরবৃত্তর আদি বার অতি প্রচলিত রূপহান পয়ার । বাংলা রামায়ণ, মহাভারত, মঙ্গলকাব্য কিতা পয়ার ছন্দল লেংকরেছিতা ।

পয়ার এহান অক্ষরবৃত্তর বিশেষ ছন্দোবদ্ধ আহান । এরে ছন্দোবদ্ধ এহানর চরণহানাং চৌদ মাত্রা থার । চরণহানর চৌদ মাত্রারে বার প্রথম পর্বৎ আটগ মাত্রা, দ্বিতীয় পর্বৎ ছয়গ মাত্রা করে বহানি । অক্ষরবৃত্ত ছন্দর হাবিগি পর্বৎ মাত্রাসংখ্যা সমান নার বুলিয়া এহানরে অসম পর্বর ছন্দৌ বুলতারা । হাবি পর্বৎ মাত্রাসংখ্যা সমান নাথার আরো ছন্দ এহান বাকস্পন্দর নিয়াম কাদাকাদি ।

“পয়ারর প্রকৃত রূপহান চৌদগ অক্ষরে নাগই, ঔহান প্রথম অংশর আটগ অক্ষর বার দ্বিতীয় অংশর ছয়গ অক্ষরর পরবর্তী যতি দ্বিয়হানাং”- রবীন্দ্রনাথ, ছন্দ

উ (৮৯) শাতছং আজি | ফাজাবি কাপক লেই ॥

নুংশি হানাং | চারি বারা পর | লেই ॥

এপয়ো (উ ৮৯) চরণহানাং চৌদগ করে মাত্রা আছে । কিন্তু পর্ব ঔতা ৮ | ৬ করে না খেয়েছে বুলিয়া এহান পয়ারহান নাগই । মাত্রাবৃত্ত ছন্দহান ।

উ (৯০) মহাভারতর কথা | অমৃত সমান ॥ ৮+৬

উ (৯১) মেঘ অয়া হুদিগৎ | আয় গিধানক ॥ ৮+৬

ইঙ ধারা দিয়া তিঙা | মিটা দেনে ডক ॥ ৮+৬

গজর উদাহরণর এতাং (উ, ৯০, ৯১) পর্ব দুগ করে আছে । প্রথম পর্বৎ ৮গ মাত্রা (মহাভারতর কথা) বার দ্বিতীয় পর্বৎ ৬গ মাত্রা (অমৃত সমান) ঔহানে এহান পয়ারহান অইল । উ (৯১)ং ১ম পর্ব ‘মেঘ অয়া হুদিগৎ’ আট বার ২য় পর্বৎ ‘আয় গিধানক’ ছয়মাত্রা ।

উ (৯২) বানাপেয়া কানা নেই | আলা আহানর ॥

ঠানা নাকরিয়া মোরে | পানাউ নাদর ॥

উ (৯৩) বকুল বনর নুয়া মলয়ায় আয়া ॥  
মাঠিয়ার তোর গাল | থানি থায়া থায়া ॥

অযুক্তবর্ণল এসাদে কঙালা করে ৮+৬ মাত্রাল পয়ার ইকরানি যাকরের, বার যুক্তবর্ণ দিয়া (শব্দমধ্যস্থ হসন্ত সিলেবল ব্যবহার করিয়া) পয়াররে ঘন করানি যাকরের।

উ (৯৪) লঙ্গরর সঙ্গ পেয়া | মঙ্গলে আহের ॥  
অঙ্গদ বাঙ্গেদে থায়া | দঙ্গরে ডাহের ॥  
বন্ধিমে করে অঙ্ক | মাঙ্কলে গঞ্জিয়া ॥  
মাঙ্কার ঠঙ্কা চেই | বেঙ্কিং বহিয়া ॥  
পাঙ্কাল ঠুময়া গঙ্গা | বুদ্ধ তুঙ্গ হিল ॥  
অঙ্কুটে পেয়া পাঙ্গ পেয়া | ঠঙ্ক দিল কিল ॥  
মুঙ্কর থংচিলে লেঙ্কা | তেঙ্কল অলয়া ॥  
খঙ্কল নাপেয়া য়ারি | ইমে আছি বয়া ॥

পয়াররমা সংস্কৃত শব্দ দিলে গম্ভীর অর—

উ (৯৫) হিরণ্য দুঃখর মণি | পুণ্য বিরহর ॥

আরাকৌ গম্ভীর করানি যাকরের, যুক্তবর্ণ আরাকৌ নিয়াম করে দিয়া।

উ (৯৬) কি হৃন্দর মন্ত্রহান | দুন্দুভি গম্ভীর ॥  
রুদ্রর ডম্বর আজি | অধীর অস্থির ॥

পয়ারর মা যুক্তবর্ণ ব্যবহারর সীমাগ রবীন্দ্রনাথে লেপকরে দেছে।

উ (৯৭) দুর্দান্ত পাণ্ডিত্যপূর্ণ | দুঃসাধ্য সিদ্ধান্ত ॥ (রবীন্দ্রনাথ, হৃন্দ)

রবীন্দ্রনাথর মতে এহান যুক্তবর্ণ ব্যবহারর লয়ইলগা সীমাগ। পয়ারে যুক্তবর্ণ সহ্য করে অক্ষমতা এহানরে রবীন্দ্রনাথে পয়ারর শোষণশক্তি বুলেছে।

যুক্তবর্ণ শোষণ করানির শক্তি এহান মাত্রাবৃত্ত নেই।

পয়ার মূলতঃ স্বরান্ত শব্দর হৃন্দহান। লেরিক দিতে থিকরেকুরাই হসন্ত ঔতারে স্বরান্ত উচ্চারণ করতারা।

উ (৯৮) মহাজ্ঞরতেরো কথা | অমৃত সমানো ॥

অর্থাৎ শব্দান্তস্থ হসন্ত সিলেবল ঔতারে স্বরান্ত উচ্চারণ করতারা।

অমূল্যধন মুখোপাধ্যায়ে মাতেছে— “পয়ারর ধীরশয়র হৃন্দহান। পয়ারর রীতিল কোন কবিতা আহান পাকরতে অক্ষর ধ্বনির গজেউ ডিগল (টানা) সুর আগ আহের এরে ডিগল (টানা) সুর এগ পয়ারর বৈশিষ্ট্যহান। এরে টান (আচুল) এহানরে সংস্কৃতর

‘তান’ শব্দ এগল অভিহিত করৌরি (ইংরেজিঃ VOCAL DRAWAL) । অক্ষরর ধ্বনির লগে এরে টান (আচুল) এহান তিলয়া ধার, হাদি হাদিঃ অক্ষরর ধ্বনিরে জিঙের, যার স্পষ্ট শ্রুতিগোচর অক্ষর । (বাংলা ছন্দের মূলসূত্র)

মোহিতলাল মজুমদারেউ এরে টান (আচুল) এহান দেহ্যাছে—

উ (৯৯) অনুপূর্ণা উত্তরিলি— আ | গাঙ্গিনীর তীরে— এ ॥

মি সুরর ফামহানাঃ ইমে চিহ্ন স্বরূপ— ‘আ’ বার ‘এ’ বহুয়াছুতা । এরে সুর দ্বয়গি যতি স্থানরমাই আছে— প্রথম ঔগৎ খানি যাৎ, দ্বিতীয় ঔগৎ খানি নিয়াম (বাংলা কবিতার ছন্দ) ।

আমারতাউ লেরিক থিকরতে এসাদে হেক আগর আচুল আহান যৌকরতারা ।

### মহাপয়ার

পয়ারর প্রচলিত সাধারণ রূপহান অইলতাই চরণহানাঃ আট | ছয় করে মাত্রা থানা । এরে আটগ ছয়গ মাত্রা বিভাগর পয়ার এহানরে হ্রস্ব পয়ার বুলানি যাকরের | আধুনিক যুগে পয়ারর দীর্ঘ রূপ আহান নিকালাছি কবিয়ে । পয়লাকার পর্বগৎ আটগ মাত্রা বার পিছেকার পর্বগৎ দশগ মাত্রা, চরণ হানাঃ হাবিতাই ১৮গ মাত্রা । (এ বিষয়ে বিস্তারিত পরিশিষ্টর ‘অক্ষরবৃত্ত ছন্দ’ প্রবন্ধ ঔহানাঃ আছে)

উ (১০০) নঙেই নংতল রাতি | মাদানর পহরির পানি ॥

হাবিরাঃ মাগিয়ার । পুনর্জন্ম তোমার কাদাঃ ॥

আমার মাতিল কথা | লইনাছে | তিয়াস খৌরাঙ ॥

তোমায়ে দেহিক মুঙে | আমি বার আহিয়া এপেই ॥

মহাপয়ারর আরাক রূপ আহান অইলতাই পয়লা চরণে আট | দশ করে মাত্রা বার দ্বিতীয় চরণে ছয়গ মাত্রা ।

উ (১০১) বসন্ত ফুলর ধনু | আতে লয়া আহিলে গিরক ॥

লুকেয়া নাথাই ॥

রঙর আচালা সেচা | মায়াজাল এবাকা ছিড়ক ॥

আই মুঙে আই ॥

আট বার দশ মাত্রার চরণ এহানরে এবাকা আরাকৌ ডগল করিয়া আট | আট , ছয় করেও চরণ দিতারা ।

উ (১০২) হনার আচালাহান | নুয়া বেলিহানে দিল | মায়াল বুনিয়া ॥

কুরুহান বুজে দিলা | পুলায়া হেইনৌ ফুল | নূপুর হনিয়া ॥

দীর্ঘ ত্রিপদীঃ মাত্রা যোজনা পদ্ধতিহান অইলতাই ৮ | ৮ | ১০



উ (১০৩) আহের আধারহান | হাকেদে বাহিয়া তাপ ।  
 আহির পানির ধারা অয়া ॥  
 তেয়ায় দেহার পথ | অনন্ত থঙেদে তারে ।  
 বিরহর বর্তিগল বয়া ॥

## অক্ষরবৃত্ত ছন্দর মাত্রা লেহানি : সমস্যাহান

অক্ষরবৃত্ত ছন্দর মাত্রা লেহানির পদ্ধতিহান আগেদে নিংকরলাতাই অক্ষরগৎ অর্থাৎ দৃশ্যমান 'মেয়েকগৎ (যুক্ত বার অযুক্ত) মাত্রা আহান । পয়ারর চরণহানাৎ ১৪গ অক্ষর (৮+৬) বা মেয়েক ঔহানে হসন্ত সিলেবলরে অন্য শব্দর লগে তিলকরিয়া যুক্তবর্ণগ করিয়া অইলৌ ১৪গ অক্ষর বা মেয়েকে বেল্লা । ঔহানে—

উ (১০৪) করবতা কিহান বীর . বেললে খুচু হাবি ॥

না ইকরিয়া এহানরে—

উ (১০৫) করতা কিহান বীর | বেলে খুচু হাবি ॥

এসাদে ইকরিয়া দৃশ্যমান ১৪গ অক্ষর বা মেয়েক হংকরলা আসলে মাত্রা গণনার বৈজ্ঞানিক পদ্ধতি ঔহান হারপেইলে (শব্দমধ্যস্থ হসন্ত সিলেবল্ মাত্রা আগ, শব্দান্তস্থ হসন্ত সিলেবল্ দ্বিমাত্রা) এসাদে পাংকালল যুক্তবর্ণ হংকরিয়া ১৪গ মেয়েক দেহয়ানির প্রয়োজন নেই । ঔহানে করবতা বা করতা যেসাদৌ ইকরিক ক— রব্— তা তিনগ মাত্রা, কি— হান— তিনগ মাত্রা বীর দুগ মাত্রা, ১ম পর্বৎ আটগ মাত্রা দ্বিতীয় পর্বৎ বেল্ মাত্রা আগ, লে মাত্রা আগ, খুচ— মাত্রা আগ, চু— মাত্রা আগ, হা— মাত্রা আগ, বি মাত্রা আগ, হাবিতাই মাত্রা ছয়গ । চরণ হানাৎ হাবিতাই (৮+৬) ১৪গ মাত্রা অইল । দৃশ্যমান মেয়েক যতগউ ধায়া থাক ।

উ (১০৬) মিশ্র শ্রীগোবিন্দ গীতাহার্বক (গীতাহার প্রবক)

আসামী ভাষাল কৈল ॥ (কইল)

শাক্তরী ভাক্তরী টীকা চেয়া লৌরি (লউরি)

বুলিয়া সাক্ষীহাট্টেল ॥ (সাক্ষীহান থইল)

কবি ধীরচন্দ্র চট্টোপাধ্যায় গিরকে অক্ষর সংখ্যার হিসাবল ছন্দহান (লঘু ত্রিপদী ৬+৬+৮) দেহয়ানি মনেয়া শব্দমধ্যস্থ হসন্ত সিলেবল্ ঔতারে যুক্তবর্ণ হংকরেদেছেতা । অক্ষরর হিসাবল তলর উদাহরণ (উ ১০৭) এহানর ছন্দপতন অনার কথা । কিন্তু কানহানরে সাক্ষী থয়া মাতে পারিয়ার এপেই ছন্দপতন নাছে ।

উ (১০৭) টুম্‌করিয়া হাওয়া সিটা      মাত হুনা কানা কিতা  
মাগানা কবিগ অয়া থানা ॥

এপেই 'টুম্‌করিয়া' দৃশ্যমান পাচগ অক্ষর বা মেয়েক অইলেরগায়ো টুম্‌ শব্দমধ্যস্থ হসন্ত সিলেবল্‌গ অনাই মাত্রা আগর মূল্য পাছে। 'হাওয়া'— র ওয়া দৃশ্যমান দুগ অক্ষর অইলৌ ওয়া আসলে মাত্রা আগ, ঔহানে হা—ওয়া দ্বিমাত্রা। ঔহানে হাবিতাই পর্বহানাৎ আটগ করে মাত্রা। লয়নির পর্বগৎ ১০গ মাত্রা।

কিন্তু কবিয়ে এহান সর্বদা যাকরতারাতা ? রবীন্দ্রনাথর কবিতা আহান উদ্ধৃত করিক—

উ (১০৮) গল্প লিখি একেকটি করে

এপেই রবীন্দ্রনাথে 'একেকটি'— শব্দরে চারি মাত্রা ধরেছে। এ— স্বরান্ত মাত্রা আগ, কেঙ্— এরে শব্দমধ্যস্থ হসন্ত সিলেবল্‌ এগরে দ্বি-মাত্রার মূল্য দেছে।

উ (১০৯) আটগ মেয়েক দিয়া | পিছে ছয়গরে ॥

এপেই শব্দমধ্যস্থ হসন্ত সিলেবল্‌— 'আট' বার 'ছয়' এতারে দ্বি দ্বিমাত্রার মূল্য নাদলে পয়ারর চৌদ্দ মাত্রা না সুয়র।

পয়ারর মাত্রা লেহানিৎ আরাক প্রশ্ন আহান উঠের। অই বা ঐ 'মাত্রা আহান না দুহান?'

উ (১১০) উদয় দিগন্তে ঐ | ওত্র শঙ্খ বাজে । (পুরবী)

এপেই 'ঐ'— এরে অন্তিম রুদ্ধ (হসন্ত) সিলেবল্‌ এগরে দ্বি মাত্রা ধরেছি।

উ (১১১) ওই মুখে ওই চক্ষে । ওই হাসিটিতে ॥ (মহুয়া)

এপেই ওই ইকরিয়া দ্বিমাত্রা ধরেছে রবীন্দ্রনাথে ।। বাংলাৎ ঐ বার ওই সর্বদা পরস্পর বিকল্প হিসাবে ব্যবহৃত অর। ...তিনহান ফামেই (উ ১১১) ওই না ইকরিয়া ঐ ইকরানি যাকরলইছ, ঔহানাৎ অক্ষরসংখ্যা কমেইলৌ মাত্রাহানি না ঘটিল অইছ। (প্রবোধচন্দ্র সেন, ছন্দ পরিক্রমা)।

এহানর উত্তরে রবীন্দ্রনাথে মাতেছেতা— "লেখকে (প্রবোধচন্দ্র) মোর ডাঙর ফাকি আহান ধরেছে।" তা মাতেছেতা— "মি মনেইল ঔসাদে আকপেই ঐ ইকরুরি, আকপেই বার ইকরুরিতা ওই, এসাদে উপায় আহানল পাঠকর আহিৎ ভ্রম সৃষ্টি করিয়া মেয়েকর বাটখারার চাতুরীৎ আকহান উচ্চারণরে ফাম হারপেয়া দ্বিরকমর মূল্য দেছ।" (ছন্দ) লয়ইতেগা গিরকে মাতেছে "বাংলা উচ্চারণে স্বরর (স্বরবর্ণর) ধ্বনিহানরে আচুলিয়া অতি সহজে বাড়ানি কমানি যাকরের আরো ছন্দৎ ঔহানর গৌরব বা লাঘবল আজি পেয়া দলাদলি নাছে।" (তদেব) আরাক আকপেই রবীন্দ্রনাথে মাতেছে— "যদি কর্তব্য বোধহান নিতান্তই খটকা লাগানি উচিত অর ঔহান অইলে হাবি বাংলা কাব্যর পনেরো আনা লাইনর এবাকাই প্রুফ সংশোধন করানিৎ বহানি থকইতই।" (তদেব)

রবীন্দ্রনাথের মতহান— “বাংলা ভাষাৎ স্বরবর্ণের ধ্বনিমাত্রা বিকল্পৎ দীর্ঘ বার হ্রস্ব অর ।”  
(তদেব)

বিষ্ণুপ্রিয়া মণিপুরী ছন্দর ক্ষেত্রতৌ কথা এহানি প্রযোজ্য । আমার ভাষাতৌ এরে গুণ  
এহান আছে , ‘ঔ—রে চরণ যারণা’ বার ‘ঔরে ঔপেই চা’ -এরে দ্বিযফামে ঔ— স্বরবর্ণের  
উচ্চারণ দুহান, পয়লাকার ঔ দীর্ঘ বার পিছেকার ঔ হ্রস্ব ,

‘আটগ শিচ্চিল মানু আহেছি’ বার ‘আ— ট্গ হাবি মানু আহেছি’ । এপেই পয়লাকার  
আ—হ্রস্ব বার পিছেকার আ— দীর্ঘ । উচ্চারণর এরে প্রবণতা এহানরে ছন্দৎ ব্যবহার  
করানি য়াকরের ।

উ (১১২) আটগ মানু আয়া চানে | বহেছি ফালুৎ ॥

এপেই (উ ১১২) শব্দমধ্যস্থ হসন্ত সিলেবল্- ‘আট’ মাত্রা আগর মূল্য পাছে ।

উ (১১৩) আটগ মেয়েক দিয়া | পিছে ছরণরে ॥

এপেই (উ ১১৩) আট্ — এরে শব্দমধ্যস্থ হসন্ত সিলেবল্ এগরে দ্বিমাত্রার মূল্য দেছি ।  
রবীন্দ্রনাথের কবিতাৎ এসাদে উদাহরণগ মাহেই আছে

উ (১১৪) বাতাসে দুলিছে যেন | শীর্ষ সমেত ॥

এপেই শীর্ষ — শব্দমধ্যস্থ হসন্ত সিলেবল্ এগ দ্বি মাত্রার সম্মান পাছে ।

উ (১১৫) সুখে দুখে উৎসবে | গান উঠে কলরবে ॥

এপেয়ো শব্দমধ্যস্থ হসন্ত সিলেবল্ উৎ দ্বিমাত্রা আছে ।

বিষ্ণুপ্রিয়া মণিপুরী কবিতাৎ শব্দমধ্যস্থ হসন্ত সিলেবল্ মাত্রা আগ বা দুগর মূল্য পার ।

উ (১১৬) ডিগল চুলগাছি তোর | কি মামর মায়া ॥

এপেই ‘চুলগাছি’ শব্দর চুল্— এরে শব্দমধ্যস্থ হসন্ত সিলেবল্ এগরে মাত্রা আগ ধরেছি ।

উ (১১৭) চুলগাছি বুজে আছে | আদিম রাতির মাম | কই জনমর ॥

এপেই চুলগাছি ৪ মাত্রা । চুল্ সিলেবলর ‘চু’র উচ্চারণ চু উ । কই — সিলেবলৌ  
দ্বিমাত্রা ।

উ (১১৮) এ হাক বাহিয়া আজি | আহিল আধার এরে ।

মোর ঠই এগ বুজা দিয়া ॥

তোর চুল পারা অয়া | ইঙ স্মৃতি থায়া থায়া ।

শকদের হপনে বুঝিয়া ॥

এপেই (উ ১১৮) চুল্ বার ইঙ শব্দান্তস্থ হসন্ত সিলেবল্গি বুলিয়া যেসাদৌ দ্বিমাত্রা  
অইতই ।

উ (১১৯) পৌহানে বৌহান আজি | অছেতা চঞ্চল ॥

এপেই পৌ (পউ), বৌ (বউ) মাত্রা আগ করে লেহাছি।

উ (১২০) পউহানে বউহান | অছেতা চঞ্চল ॥

এপেই (উ ১২০) পউ বার বউ দ্বিমাত্রার মূল্য পাছে।

উ (১২১) আইতই হাওন হাকে | অলয়া বরন ॥

এপেই আই— দ্বিমাত্রা, তই মাত্রা আগর মূল্য পাছে।

উ (১২২) আইতেই অলয়া প্রিয় | কিসাদে হপনে ॥

এপেয়ো আই — দ্বিমাত্রা, তেই— মাত্রা আগর মূল্য পাছে। সংস্কৃতৎ এ-কারর উচ্চারণ দীর্ঘ। কিন্তু বিষ্ণুপ্রিয়া মণিপুরীৎ স্বরবর্ণ অ — বার এ— দ্বয়গির উচ্চারণকাল সমান। তই — সিলেবলরে মাত্রা আগ ধরানি যাকরের। ঔবাকা কবিরে তৈ — ইকরতারা মাত্রা আগ হারপুয়ানিরকা। তেই (এই) এহান আকসাটে ইকরিয়া দেহুয়ানির বর্ণ নেই বা অন্য কোন পদ্ধতিয়ো নেই। ইকরানির পদ্ধতি নেয়ইলৌ তই বার তেই সিলেবলর উচ্চারণকাল মান্না থাংতে দ্বয়হানিরৌ মাত্রা আগ করে ধরানি যাকরতই। ‘মেইথঙ’ শব্দ এগ কবির অভিপ্রায় অনুযায়ী তিনগ বা চারিগ মাত্রা লেহানি সম্ভব।

উ (১২৩) আইতই হাওন হাকে | তোর বানাহান ॥

এপেই আইতই ৩ মাত্রা ধরেছি। ঔসাদে—

উ (১২৪) ঐতেই আধার হাকে | পূর্ণিমা জোনাক ॥

ঐ মাত্রা আগ লেহাছি। তেই দ্বিমাত্রা।

উ (১২৫) ঐতে মাম রাতিহান | তোর ডালে ডাল ॥

এখুরম বার ঐতে — র তৈ—একমাত্রা ধরেছি।

উ (১২৬) ঐতেই প্রিয় এ আধারে | তি মোর মিঙাল ॥

ঐতে—যেসাদে দ্বিমাত্রা লেহাছি ঔসাদে ঐতেই — রেউ দ্বিমাত্রা ধরেছি।

এতারে নিয়ম নাবুলিয়া ব্যতিক্রম বুলানি থকর। ছন্দহানরে বার ভাষার স্বাভাবিক উচ্চারণরে যাকরানি থকর; পাঠকে পাকরতে উছুটন নাহেইবা ঔসাদে অনা থকর। এহান সম্ভব অরতা ডাঙর কবি আগর আতে বার পাংকালপা সাহিত্যৎ, কিন্তু নুয়া সাহিত্য আহানাৎ প্রচলিত রীতিল চলানি ঔহানেই হবা অইব।

## মুক্তক

উ (১২৭) বসন্ত ! হে ঋতুরাজ ! পথে পথে তোর  
পারাহানি পড়েছিল চৈত্র মাদানর  
ছেয়াগৎ । গেরুয়া ফিরালহান হাকে  
সালছিল গুরে দিয়া তোর গারিগর মাচ ।

এপেই পয়ার হন্দহান যতি বার মিলর বন্ধনেত মুক্তি পেইল হাইহান, কিন্তু পারেঙ  
হানাৎ ১৪ মাত্রার বন্ধন ঔহানতে থাকেলগা । এরে বন্ধন এহানাৎতৌ মুক্তি বিসারার  
কবিয়ে । এবাকার কবিয়ে বিসারেয়া পেইল তার মুক্তিহান; ১৪ মাত্রার পারেঙর  
বাধনহানাৎত । আহিল ১৮ মাত্রার মহাপয়ার । লয়ইতেগা এরে পারেঙর সীমাৎত মুক্তি  
পেইল হন্দ এহানরে নাঙ দিলাতা মুক্তক । এরে মুক্তক এহান সমিল বার অমিল  
দ্বিয়হানৌ অনা পারের তিনো রীতির হন্দল মুক্তক লেংকরানি সম্ভব ।

### সমিল মুক্তক (অক্ষরবৃত্ত)

উ (১২৮) কিতা তোরে দেনা আজি ॥  
মাদানে হমাজি । ॥  
লেহাও জরিৎ মায় পড়েছেগা আয়া ॥  
বকুলর তলে থায়া থায়া ॥  
জঙের মাটিং ফুল আধারর পরে ॥  
বিদায়র সুরগরে ॥  
আহিগির পানিল তিঙার , ॥  
বিরহ এহানে হুদিগ বুজিয়া তারে পার ॥

সমিল মুক্তকে অন্ত্যমিল আছে ।

### অমিল মুক্তক(অক্ষরবৃত্ত)

উ (১২৯) জোনাক মিঙালে ধছে রাত্তিহান ॥  
বেড়েইল আয়া এরে ঘুমিয়া আছিল ঠই এগ . ॥  
অনন্তর প্রেমহানে লেঙছে হুদিং ॥  
মিলন মাঠিয়া দিল হপনে হপনে ॥  
কারে বিসারার মন, কারে চেয়া আজি ॥  
শাতছে এ'মিঙালর বিশাল ধাম্পাল এগ ॥  
কারে শকনির সালে এ মাটির হাবিলি কণাৎ ॥  
বিসারানি বাসানি আহান . ॥  
তা বাং আহের তাতে ॥  
মিঙালর নুহশিগতে ইঙাল করিয়া ॥

উ (১৩০) হে হাক! নীলুয়া হাক! দূরেয়ে বাসেয়া ॥  
 ডাহর এ পৃথিবীয়ে ॥  
 পৃথিবীয়ে তোর সালে ॥  
 ঋতুহান লেহে তেই | তঙাল ফিজেতে সাজে সাজে ॥  
 ডাহিরিতা তোরে । ॥  
 দ্বিয়গির হুদিগ তিলছেতাউ | তিলো নুয়ারেছ ॥  
 আহতা জনমহান | ডাহে ডাহে আগরে আগই ॥

উ (১৩১) যে নাছার হুন্দহানে তোর ॥  
 নাহের বিজুলা অয়া | এ বিশ্ব সংসার ॥  
 এহ তেরা বেলি বার | জোনাক এহান ॥  
 ঋতুহানি, বরিষার | নীলুয়া বাদল ॥  
 বসন্তর কুড়িগ অলর | ফুল তোর তালে ॥  
 উহানাং নাছা দেনে | ঠই এগ, জনম এহান ॥

### সমিল মুক্তক (মাত্রাবৃত্ত)

উ (১৩২) অসীম আহির | পানিল লেংক | রিয়া ॥  
 জনম এহান | দ্বিআত বুজেয়া | নুংশিল দিলে | কিয়া ॥  
 দূরেয়েদে মোরে | থইলে বহেয়া, | নাই ॥  
 কুরাংত তোর | হনার হেকল | বাশিগ রহের | তাই ॥  
 আসাংপা বনে | ফুল ॥  
 চুম্পুল চুম্ | পুল ॥  
 শাতয়া নভিয়া | জন্তিয়া পড়িল | পথে ॥  
 মাতেয়া গেলগা | কোন হপনর | গতে ॥

### অমিল মুক্তক (মাত্রাবৃত্ত)

উ (১৩৩) ধাম্পাল গিৎ | হনার মিঙাল | অলয়া ইনাফি | হান ॥  
 নিক্করেরতা | আজি এ বিয়ান | পরে ॥  
 তোর বানাহান | মায়াহান অয়া | বাহের চারিয় | বেদে ॥  
 নুংশি এহান | বুকুদে বেড়েরা ॥  
 খুয়ার বিন্দু | রঙল সাজেয়া | বরা ॥  
 মেইথঙে তোর | আছে নাই চেয়া | আজি ॥  
 পানি এহানাং | লিরি লিরি চুউ ॥  
 খৌরাঙ অয়া | নাহের কল্ক | রিয়া ॥

### সমিল মুক্তক (স্বরবৃত্ত)

উ (১৩৪) লিকছৎক , হ্না গিরক, | ছ দিলেতাউ , কগগ ॥  
নুংশি হানাৎ , বুয়েয়া তি | মুজুরলেতা | মনগ ।  
গোটি আকপেই, , খেলা আকপেই ॥  
দগি দূরেইৎ, | অছিতা খেই ॥  
হাদিৎ আছে | দুঃখহানে , সামকরিয়া থরতা ॥  
কিসাদেতে | খেইকরানি | তোরতা বার | মোরতা ॥

### অমিল মুক্তক (স্বরবৃত্ত)

উ (১৩৫) তুলতুলাছে | রাতি তোরে ॥  
কলা দিতৌ, | মধুর দিতৌ ॥  
ঝানি বাসা, | আশাহান মোর নাউ গুজছে ॥  
আহির গজ্ঞে | পাহিয়াগ | বয়া আছে ॥  
মনহান তি | দেহেছৎতা | দুহান মাতৌ ॥  
মোর হদিগৎ | হ বুজ়েছে, | জনমহানর | ঋণ হুজ়েছে ॥

## মুক্তি

ছন্দর সুনির্দিষ্ট বার নিয়মিত চলন এহানরে অতিক্রম করিয়া নুয়া মুক্তি আহানর সন্ধান করতারা কবিয়ে। ঔহানরে লাল বুলানি থক নেই। কিন্তু কিহানরে আমি মুক্তি বুলতাং? ছন্দরে সম্পূর্ণ অস্বীকার করিয়া গদ্যভাষাং নুয়া স্পন্দ আহান আনানির নাঙ মুক্তি? ছন্দোমুক্তির অর্থহান গদ্য? যেসাদে আমেরিকার কবি ওয়াল্ট হুইটম্যানে করেছে। মুক্তি মানে বন্ধনেত মুক্তি। ছন্দোমুক্তি মানে ছন্দর বন্ধনেত কবিতার মুক্তি। বাক্‌স্পন্দ ইলয়া গদ্যর বেদে গতিহান অনা। গদ্যাল কবিতা ইকরানি নাকরেরতা নাগই। ঔতা বুলিয়া ছন্দর লয়ইলগা পরিণামহান গদ্য অনা নুয়ারের। ছন্দর মা বাক্‌স্পন্দ আনানির প্রয়াস ঔহান আজিকালিকার কবির সাধনাহান। আমার ছন্দচর্চ এবাকাউ প্রাথমিক স্তরে আছে। এবাকাউ আমার কবিয়ে ছন্দং সিদ্ধ নায়া, ছন্দল ইকরানি হিন্‌পেয়া ছন্দর বিরোধিতা করতারা সাধনা আহানাং সিদ্ধ নায়া শাস্ত্রর বিরোধিতা করানি ঔহান সমর্থনযোগ্য নাগই। এবাকা পেয়া ছন্দর হাবি রীতি পদ্ধতিল পরীক্ষা করিয়া বিষ্ণুপ্রিয়া মণিপুরী কবিতার বিভিন্ন সম্ভাবনার পথেদে আমি গিয়া নুয়ারেছিগা। ঔহান নাছে পেয়া ছন্দোসাধনা বার ছন্দোমুক্তি সমান্তরাল পথগদে যানা পারের। কিন্তু বন্ধনর জটিলতা ঔহান শিল্পহান করে নুয়ারেছি পেয়া ছন্দশিথিলতারে মুক্তি বুলে নুয়ারিয়ার।

ইংরেজি কবিতা মুক্তি বিসারেয়া ফ্রি ভার্সর নুয়া দেশ আহান পাছেগা। ফ্রি ভার্সে ছন্দশৃঙ্খলা নাথার, পর্ব বিভাগ নিয়মিত নাগই, সাধারণতঃ অন্ত্যমিলৌ নেই ফ্রি ভার্সর রূপ আকহান নাগই, বিভিন্ন রীতির ফ্রি ভার্স আছে। ফ্রি ভার্স কথা এহান আহেছেতা ফরাসি Vers libre -এত। ফরাসিৎ Vers libres বুলিয়া আরাক মুক্তছন্দ আহানৌ পেয়ার। ইংরেজিরমা ফ্রি ভার্সর আদি উদাহরণ আছেতা রাজা জেমসর বাইবেল অনুবাদে। র্যাক, আর্নল্ড গাছিয়ে ফ্রি ভার্সল পরীক্ষা করেছি। হুইটম্যান, ইলিয়ট বার পাউন্ডর কবিতাং ফ্রি ভার্স শিলয়া আছে। ঊনবিংশ শতাব্দীহান লয়ইতেগা ফ্রান্সর সিম্বলিস্ট কবিয়ে ফ্রি ভার্সল কবিতা ইকরলা। ঔতার আগে ইংরেজি বার ফরাসি কবিতাং ছন্দোবন্ধনর ডিগল গৌরবময় ইতিহাস আছে। বিষ্ণুপ্রিয়া মণিপুরী কবিতাতৌ ফ্রি ভার্সর নাঙে, ছন্দোমুক্তির নাঙে ছন্দোহীন কবিতা ইকরেছি এসাদে উদাহরণ আছে। বরং ছন্দর কবিতাতৌ ছন্দোহীন কবিতার উদাহরণে নিয়াম। ঔহানে এবাকা আমি বন্ধনর সাধনা ঔহান না এরাদিক। মুক্তির সাধনাহান আকসাটে চলক ক্ষতি নেই, কিন্তু ফ্রি ভার্সর মোহং পড়িয়া ছন্দশিথিলতারে ফ্রি ভার্স না নিংকরিক।

মুক্তি আহক ছন্দরমা, শৃঙ্খলারমা। ছন্দ স্বাচ্ছন্দ্যরমা এবাকা বিসারেইক মুক্তি। ছন্দ বিদ্রোহরমা নাগই। বিদ্রোহী ঔতারে অক্ষম বুলিয়া নাচিনকা। আমার বাক্‌রীতি, আমার উচ্চারণ আমার হৃদয়দীর্ঘতারে মান্যতা দিয়া সৃষ্টি করিক নুয়া ছন্দোরীতি আহান।

মুক্তির বয়স এবাকাউ নাহেছে আমারতা। এবাকা সংসার করানির কনাক বয়সহান আমার ছন্দর। ঔ কথা ঔহান না পাহরিক



## কবিতার ছন্দ প্রবেশিকা

কবিতার ছন্দের মূল কথাহান নিয়মিত যতি যতিহান নিয়ন্ত্রিত বার সুবিন্যস্ত অইলে ছন্দহান উৎপন্ন অর। ‘-খাইমুনি | তিতে | লেরিকৌ | নাউচার উনি।’ বাক্য এহানর হাদির যতি বা বিশ্রামহানি নিয়মিত নাছে ঔহানল এহানারমা ছন্দ নেয়ছে। কিন্তু বাক্য এহানরে যদি আমি এসাদে যতি বেলেরার – ‘খাইমুনি | তিতে উনি | নাউ চার লেরিকৌ’ –লগে লগে পার্বত্য স্রোতধিনীর সাদে ছন্দহান নাছানি অকরতই। কারণ, এপেই আমি যতি ঔতারে নিয়মিত বার সুনিয়ন্ত্রিত করলাং। ঔহানল যতি এহানরে ছন্দের ঠইগ বুলানি য়াকরের। ছন্দ এহান ধ্বনিশিল্পহান। ধ্বনিসৃষ্টি বার ধ্বনির বৈচিত্র্য উৎপাদন করানি ঔহান ছন্দের তাৎপর্যহান

(১) পক্‌পাক্ | শকো শকো | কামদুম | নাকুরি।

পারেঙ এহান এসাদে ইকরানি য়াকরের—

(২) পক্‌পাক্ শকো শকো  
কামদুম নাকুরি

এসাদেউ ইকরানি য়াকরের—

(৩) পক্‌পাক্ শকো শকো  
কামদুম নাকুরি।

অথবা অন্য যে কোন আকসাদে পারেঙ এহান ইকরলেও কানহানল হুন্তে আমি কোন পরিবর্তন লক্ষ্য নাকরিয়্যার। কবিতার ছন্দ কানহানল ছনানির জিনিসহান। আহিল দেহানিরহান নাগে।

কনাকে আমি খাটলপাকক্‌ পাহিয়াগর ডাক এহানর লগে ছন্দ মিলেয়া কতি শব্দবিন্যাস রচনা করলাংতা! ‘খাটল পাকক্‌ | চৌবার বাপক্‌।’ খাটল পাকক্‌র নিয়মিত ধ্বনির উচ্চারণ এহানরে বিশ্লেষণ করিয়া চেইক ‘খাটল’-বুলিয়া সামান্য বিশ্রাম আহান আছে, উতার পিছেদে ‘পাকক্‌’ বুলিয়া পূর্ণবিশ্রাম। হাদির উচ্চারণবিরতি যেপেই আছে ঔহানর দিয়বারার ধ্বনির উচ্চারণর সময় ঔহানি সমান। ‘খাটল | পাকক্‌’ এপেই আগেকার উচ্চারণ ঔহান ডিগল অইল বুলিয়া উচ্চারণসৌম্যর সালেদে পিছেকার ধ্বনি ঔহানাং অতিরিক্ত ধ্বনি আগ আনিয়ার।

(৪) খাটল পাকক্‌। চৌবার | বাপক্‌।

এপেই চারিহান কথা আছে ঔতারে বিশ্রাম দিয়া খেই খেই করে মাতিয়া দ্বিধুরম পূর্ণ বিশ্রাম গ্রহণ করিয়্যার। কানহানে য়াকরের।

(৫) খাটল | পাকক | ঙাংবাতলর | বাপক ॥

এখুরুমতে তৃতীয় শব্দ ঔগ উচ্চারণর সময়ৎ কানহান হারৌ নার। কানহানে মাতের 'ঙাংবাতলর' কথা ঔহান খানি কমেয়া উচ্চারণ কর। আমি মাতিয়ার— 'ঙাংবাতলর | বাপক।' হারপেয়ার এপেই ছন্দপতন অইল। উহানল কানহানে গ্রহণ নাকরলতা।

আগেকার ৪নং উদাহরণর পয়লাকার পারেঙ উহান আরাখানি বিশ্লেষণ করলে হারপেইতাঙাই আরাবৌ সূক্ষ্মতর বিরতি আকেইহান হাদিৎ আছে।

(৬) খা : টল | পা : কক্।

এপেই যতির ব্যবধান ঔহান চেইলে হারপেইতাঙাই 'খা' বুলিয়া যতি, উতার পিছেদে 'টল' বুলিয়া দীর্ঘতর যতি আহান আছে। ৪নং উদাহরণর চারিয়গি শব্দৎ এসাদে করে নিয়মিত হুন্স বার দীর্ঘ যতি পড়েছে।

(৭) বরনহান | পড়িল হাতে | হাতে  
কিসাদে ফুল | আছিল তোর | আতে ॥

(৮) মহারাজ তিতে | কি সাজ পিদিয়া | আহিলে ॥

(৯) সিজার জিলক | লেইমা গিদেই |  
কামে নিয়াম | হেইনিং ॥

(১০) পকপাক্ | শকো শকো | কামদুম | নাকুরি।  
ডিক ডিক | আহিলেতে | ওম ওম | বাকুরি ॥

পারেঙহানি লয়ছেগা ঔপেই পূর্ণ বিশ্রাম গ্রহণ করানির আগে, নিয়মিত সময়র ব্যবধানে যে বিশ্রামহানি আছে ঔতারে পর্ব আকেইহান বুলানি যাকরের। ৭নং বার ৮নং উদাহরণে তিনহান করে পর্ব। ৯নং উদাহরণে চারিহান পর্ব। কিন্তু তিনহান উদাহরণেউ লয়নির পর্ব ঔহানির উচ্চারণকাল আগেকার পর্ব ঔতার উচ্চারণকালেৎত কম। ঔহানল লয়নির পর্ব ঔহানরে অপূর্ণপদী পর্ব বুলানি যাকরের, এখুরুম পর্ব আকেইহানরে বিশ্লেষণ করিয়া চেইলে সূক্ষ্মতর যতি আকেইহান পেইতাঙাই।

(১১) পক : পাক্ | শকো : শকো | কাম : দুম | নাকুরি।

এসাদে পর্ব আকেইহানর হাদির যতি আকেইহানরে পর্বাজ বুলানি যাকরের।

পর্ব আকেইহানাৎ পর্বাজ দুহান বা তিনহান থানা যাকরের। ১০নং উদাহরণে পর্ব আকেইহানাৎ পর্বাজ দুহান করে আছে।

(১২) নুয়া : নুয়া : ফুলে | মোর : এলাহান | বানা : বানা : থছু | মি।

এরে উদাহরণ এহানাৎ প্রথম পর্বৎ পর্বাঙ্গ তিনহান, দ্বিতীয় পর্বৎ দুহান বার তৃতীয় পর্বৎ তিনহান পর্বাঙ্গ আছে।

(১৩) আছে ফুল | পহুরীর পারে | ছিড়িকগানে।  
ফুলডাল বানোয়া | অজারাৎ | দিকগানে ॥

এপেই পারেৎ দ্বিয়হানির ছয়হান পর্বর উচ্চারণকাল আকেইহানর লগে আরাক আহানর উচ্চারণকাল সমান নাছে বুলিয়া এপেই ছন্দ নেয়ছে। যদিও পারেৎ দ্বিয়হানির অক্ষর সংখ্যা সমান আছে।

(১৪) মোর গরে | আজি বরনে ॥  
আহিলে তি | পথ লালয়া, ॥  
শাতছেতা | মোর উঠানে ॥  
আগ ফুল | কতি ভালয়া ॥

গজর উদাহরণ এহানাৎতে পারেঙহানর প্রথম পর্ব বার দ্বিতীয় পর্বর উচ্চারণকাল সমান নাইলেয়গায়ো হাবি প্রথম পর্বর উচ্চারণকাল সমান; ঔসাদে হাবি পারেঙর দ্বিতীয় পর্বর উচ্চারণকাল সমান। ঔহানে এপেই ছন্দহান পেয়ার।

কবিতার পর্ববিচার এহান হাবিত মূল্যবান। পর্বর সামঞ্জস্যৎ কবিতার ছন্দহান থার। পর্বর গজে কবিতার ছন্দর রূপহান নির্ভর করের। ৯ বার ১০নং উদাহরণর পারেঙহানলেহে পূর্ণপদী পর্ব তিনগ করে বার অপূর্ণপদী পর্ব আকেইগি করে ব্যবহৃত আছে। অথচ উদাহরণ দ্বিয়হানি পাকরলে হারপেয়ার সম্পূর্ণ তঙাল ছন্দ দুহানর পারেঙ হানি। পারেঙহানির উচ্চারণভঙ্গী তিল নাছে।

(১৫) জিরানি এহান | কপাল হানাৎ, নেই ॥  
আর না চাউরি | দিবারা দিসাৎ ॥  
বুড়া কালে আজি | অয়া খানি সাৎ ॥  
লয়া থাইতৌ | কুঙ্কর নাৎ ॥  
আজিহত পুরি | তোমারতা ভুমি | রাধিয়া পুড়িয়া | খেই ॥

গজর উদাহরণ এহানাৎ পইলাকার পারেঙে দুহান পূর্ণপদী বার আগে অপূর্ণপদী পর্ব। ২য়, ৩য় বার ৪র্থ পারেঙে দুহান করে পূর্ণপদী পর্ব বার ৫ম পারেঙে তিনহান পূর্ণপদী বার আহান অপূর্ণপদী পর্ব। অর্থাৎ হাবি পারেঙে পর্ব সংখ্যা সমান নাছে। সমান নাইলেউ প্রত্যেকহান পর্বর উচ্চারণকাল সমান আছে বুলিয়া ছন্দর কোন ত্রুটি নেয়ছে।

(১৬) মালতীর : ফুলে আজি | বরনে ॥  
লাওনর : এলা নুয়া | হপনে ॥  
কঙালা : কনাক : কুড়ি | নঙেয়া ॥  
নাছের : মেঘালা : সুরে | মাতেয়া ॥

এহানরে আমি এসাদেউ পর্ব ভাগ করানি পারিয়ার—

- (১৭) মালতীর : ফুলে | আজি : বরনে ॥  
 শাওনর : এলা | নুয়া : হপনে ॥  
 কঙালা : কনাক | কুড়ি : নঙেয়া ॥  
 নাছের : মেঘালা | সুরে : মাতেয়া ॥

এপেই কবিতাহানর কোন পরিবর্তন নাকরেছি। কিন্তু পর্বভাগ করানিহান তঙাল অছে  
 বুলিয়া কবিতাহানর ছন্দরূপহানৌ তঙাল অছে। অবশ্য হাবি ফামে এসাদে স্বাধীনতা  
 নেই। ১৫শ উদাহরণর পর্বভাগ করানির আর কোন নিয়ম নেই। এবাকা পেয়া আমি  
 হারপেইলাং যে পর্ববিচার এহান ছন্দর মূল কথাহান। পর্ব আহানর দৈর্ঘ্য মৌয়ানির  
 উপায় এহানরে মাত্রা বুলানি য়াকরের। সংস্কৃত বারো ইংরেজিৎ শব্দ আগর উচ্চারণ  
 যেপেই যেসাদে বহেইলেও পরিবর্তন নার। কিন্তু আমার ঠারে—

- (১৮) নিরাল হানাং | পিদাছিলু তোরে রকতর সাদে | মোর ॥  
 কবিতার সিন্দুর ॥ (কবিতার সিন্ | দূর)  
 (১৯) অংতা হবা | টেংটা হবা কাপেছেতা নিংখি ॥  
 সিন্দুর পি | দিয়া গিদেই | টকি চেইরী | হিন্দী ॥  
 (২০) বেলিহান অছে তোর | নিরালে সিন্দুর । ॥

গজর উদাহরণ তিনোহানিৎ ‘সিন্দুর’ কথা এহানর উচ্চারণ তিন রকম অছে। বার  
 তিনহান পারেঙে ‘সিন্দুর’ কথা এহানার মাত্রাসংখ্যাউ সমান নেই। ১৮শ উদাহরণে  
 সি+ন+দূ+র চারিমাত্রা ধরেছি। অর্থাৎ, ধ্বনিহানাং মাত্রা আগ।

১৯শ উদাহরণে স্বর বা (Syllable) আগৎ মাত্রা আগ ধরিয়া ‘সিন্+ দূর’ দুগ স্বর বা  
 (Syllable) অর্থাৎ মাত্রা দুগ। বার ২০শ উদাহরণে দৃশ্যমান অক্ষরগৎ মাত্রাগ ধরিয়া  
 সি+ন্দু+র তিনগ অক্ষরে মাত্রা তিনগ ধরেছি। (আসলে সিন্- শব্দমধ্যস্থ সিলেবল্গৎ  
 মাত্রা আহান, দূর- শব্দান্তস্থ সিলেবল্গৎ মাত্রা দুহান)।

যে ছন্দহানাং ধ্বনিহানরে (Syllable) মাত্রা আগ ধরতারা উহানর নাঙ মাত্রাবৃত্ত  
 ছন্দ মাত্রাবৃত্ত ছন্দর মাত্রা লেহানি এহান খানি বিশদ আলোচনা করিক। ছন্দ জিনিস  
 এহান আমি আহিল দেহিয়ারতা নাগৈ কানল ছনিয়ারতা। ‘লক্ষ্মী’ কথা এহানর উচ্চারণ  
 বানান অনুযায়ী নায়া আমরাং অরতাই ‘লক্ষ্মী’। এপেই তিনহান ধ্বনি (Syllable) বা  
 তিন মাত্রা। আরাক নিয়মআহানল মাতানি য়াকরের যুক্ত বর্ণর আগেকার বর্ণ উগরে  
 দ্বিমাত্রা ধরানি থকর (সংযুক্তাদ্যৎ স্বরং দীর্ঘং— শ্রুতবোধ)। ‘ক্ষীণ’ কথা এহান দুইমাত্রা,  
 কিয়া বুললে ‘ক্ষ’ এগো যুক্তবর্ণগ, উগর আগে কোন বর্ণ নেই। যুক্তবর্ণগৎ একমাত্রা  
 ধরানি থকর। লক্ষ্মী বুলতে ‘ক্ষী’ এগর আগেকার ‘ল’ উগৎ দুইমাত্রা ধরেছি। হেইনৌ

কথা এহানাং চারিমাাত্রা। 'নৌ' কথা এহানার ঔ-কার আসলে অ+উ অর্থাৎ যুগ্ম স্বরধ্বনি। 'ঔ' এগৌ যুগ্ম স্বরধ্বনি। অনুস্বার (ং) বার বিসর্গযুক্ত (ঃ) বর্ণ এতারৌ দ্বিমাাত্রা করে লেহানি থকর। ১ম উদাহরণে পর্বগং চারিমাাত্রা করে আছে। ১৫শ উদাহরণে পারেঙহানিং ৬|৬|২, ৬|৬, ৬|৬, ৬|৬, ৬|৬|৬|২ এসাদে আছে। ১১শ উদাহরণে ৪|৪|৪|৩ এসাদে আছে। মাাত্রাবৃত্ত ছন্দং মাাত্রাসংখ্যা সমান থাইলে যুক্তবর্ণ আগর ফামে দুগ বিযুক্তবর্ণ ব্যবহার করানি য়াকরের।

(২১) যক্ষ রাজার | শিরাপে : আমার সময় লালর | বিরহর।

(২২) কুবের রাজার , অভিষাপে : হায় | সময় লালর | বিরহর।

২২শ উদাহরণে ১ম পর্বৎ 'যক্ষ'র সাক্ষক কুবের ব্যবহার করেছি। বার ২য় পর্বৎ পর্বাঙ্গ (৪+২)= ৬, এসাদে ব্যবহার করেছি পারেঙহানিং ছয় মাাত্রার পর্ব ব্যবহার করেছি। এহানল এহানরে ছয় মাাত্রার মাাত্রাবৃত্ত ছন্দ বুলানি থকর। পারেঙহানাং হাবিতাই বাইশ হান মাাত্রা আছে বুলিয়া বাইশ মাাত্রার ছন্দ বুলানি কোন ক্রমেউ উচিত নেই।

(২৩) দুঃখর রাতি | তেরাগর সাদে | ভালয়া।

আহিছ তি হায় | মোর লেইরার | ঘরে।

তুলসী পুঙর | বর্তিগ ধরি | যা তি।

কঙালা আহিগি , নঙেরা ডাহিছ মোরে ॥

(দুঃখর-উচ্চারণ দুঃখর)

(২৪) হেইনৌ ফুলে | ক্যাকুল বনর অশোকর গাছে | কঙালা ডেঙর |  
উৎসব আজি | আহক ॥

(২৫) হমাজি তি মোর | জনমর সহ | চরী ॥  
দ্বিয় আতে তিতে বাধিস আলিং গনে ॥

(২৬) মোর মুক্তির | বাহারর সুরে ॥  
মোর কিন্নর | মনর তালর ॥  
অলকানন্দা | সালছে কুরাং ॥  
এরে সমুদ্র | অনন্ত অস্ , থির ॥

২৩শ, ২৪শ, ২৫শ, বারো ২৬শ উদাহরণ হাবি ছন্দউ ছয় মাাত্রারতা। ঔহানল মূলেতে হাবিঔ ছন্দোরীতি আকহান। লক্ষ্যণীয় বিষয়হান, ছয়মাাত্রার পর্ব আকেইগিৎ পর্বাঙ্গ ৪+২=৬, ২+২+২=৬ অথবা ৩+৩=৬ এসাদে করে হংকরেছি। ছন্দর বৈচিত্র্য আনানিরকা মাাত্রাসংখ্যার বৈচিত্র্য আননি থকর এবাকা মাাত্রাবৃত্ত ছন্দর ছন্দোবৈচিত্র্য খানি আলোচনা করানি য়াকরের।

### চারিমাাত্রার ছন্দ

- (২৭) খাই : মুনি | ভিতে : উনি | নাউ : চার | লেরি : কৌ ॥  
 (২৮) পক : জক | বাছে : বাছে | পাতা : জাতা | রাধিয়া ॥  
 লিক : লিক | নিকে : রাহে | ফুতি : ফালি | পিদিয়া ॥  
 (২৯) এহা : নিতে | কিহা : নিতে | আর : তাউ | হন ॥  
 খাল : কর | বয়া : বয়া | লেরি : কর | গণ ॥

এপেই পর্বগৎ চারি মাত্রা করে : পর্বগৎ আকেইগ মাত্রা দুহান করে ।

### পাচ মাত্রার ছন্দ

- (৩০) বসন্তর | বনরফুল | কুমেইহানে | সাজেছে ॥  
 পূর্ণিমার | জোনাকহান | পানির গঞ্জে | বাহেছে ॥  
 (৩১) খুয়ায় তিষ্ঠা | পথর গঞ্জে ॥  
 পড়িয়া খার | সিংগারেই ॥  
 চারিয় বারা | বিহারেয়াও ॥  
 হনার মাচু | প্রিয়াতে নেই ॥  
 (৩২) জন্তের পাতা | ফুলর বনে | রঙনেয়ছে | থাং ॥  
 রকতল মি | ইকরৌরি | আজি নিজর | নাং ॥

এপেই পর্বগৎ পাচ মাত্রা করে বার পর্বগৎ ২+৩ অথবা ৩+২ এসাদে করে করেছে । ৭ম উদাহরণ ঔহান পাঁচ মাত্রার কবিতাহান । ১৪শ উদাহরণর পারেঙহানাৎ পর্ব দুহান করে বার ১ম পর্বৎ চারি মাত্রা, ২য় পর্বৎ পাঁচ মাত্রা করে অয়া গেছেগা ।

ছয়মাত্রার ছন্দ আগেদে আলোচনা করে গেলাংগা । এবাকা সাত মাত্রার ছন্দর আলোচনা করিক ।

- (৩৩) আহিলে : বনে : বনে | বুলিয়া : দিন : রাতি ॥  
 পিদিয়া : বকুলর | খারৌ : থম ॥  
 কঙালা : আহিগি | নঙেয়া : চাহিলেকো ॥  
 লাজেতে : নঙাছিলে | তি মেই : থঙ ॥

এপেই ৩য় বার ৪র্থ পারেঙর ২য় পর্বৎ অপূর্ণপদী পাচহান করে মাত্রা আছে ।

- (৩৪) বরনে বাদলেতে | হৃদয় চঞ্চল ॥  
 তি মোরে প্রেম দিলে | শ্রাবণে খুন্তল ॥  
 ব্যাকুল আহিগিরে | বুজিয়া দিলে ঘুম ॥  
 নিজরে পুড়ে পুড়ে | মৃত্যু কতি ঠুম ॥

এপেই পারেঙহানাৎ পর্বদুহান করে; বার পর্বহান লেহে ৭ হান করে মাত্রা ।

এবাকা স্বরবৃত্ত ছন্দর আলোচনা করিক , স্বরবৃত্ত ছন্দর মাত্রা লেহানির পদ্ধতিহান অইলতাই স্বর আগৎ অর্থাৎ Syllable আগৎ আকেইগ করে মাত্রা ধরানি ।

(৩৫) লুরি : গটা | লয়া : চেইতে | হাবি : আছে | বক্সি  
বাজা : রেংত | আনে : দেছৎ | মাছ বু : লিয়া | মক্ছি ।

এপেই পয়লাকার পর্ব তিনহানাৎ চারিগ করে Syllable অর্থাৎ চারিমাত্রা । শেষ পর্ব ঔহানাৎ মাত্রা দুহান, অগূর্ণ ।

(৩৬) বাত নেয়ছে | হৌ নেয়ছে | নেয়ছেতা | খৌ ॥  
চাকামে হ | মেয়া আজি | দেখলু ইমার | দৌ ॥  
জাঙাক গতে | হিনেইলগা | পড়লু কি জন | জালে  
খাল্করিয়া | কুল না পেয়ার | দ্বিয়গী জাল | মালে ।

‘খাল্করিয়া’ কথা এহানাৎ খাল + ক+রি+য়া এসাদে চারিগো স্বর (Syllable) বা মাত্রা আছে । হি+ নেই+ল+গা এহানাতৌ চারিগ মাত্রা ।

স্বরবৃত্তর বৈশিষ্ট্যহান পর্ব আগৎ সর্বদা চারিগ করে মাত্রা থাইতৈ ।

(৩৭) মারৈ : মাপাৎ | যৌক : রিয়া | হবা : করে | বাজিং ॥  
বাজা : রেংত | আনগা : লয়া , সিকি : আগর | খাজিং ॥

(৩৮) বেংকি : আগ | আড়ির : পানিৎ ,  
তিনকু : ডি দিন | জিঙেয়া ॥  
তিল্ক : রানি | নিজের : পানি ,  
তালু : তাংপায় , হিনেয়া ॥  
ডুয়া : আগৎ | চিক্ক : রিয়া |  
নিক্কা : ফুটি | গিলে ॥  
গগ : রা তি | না চে : লইতেই |  
যেবা : কাউ ঘুম | জিলে ॥

(৩৯) ননীর : সাদে | কঙা : লা বুক | শ্রুতির : কাটাই | বিদিল ।  
আধার : আছে | আহি : দগীৎ | কিতার : পানি | বুজিল ॥

(৪০) সেক্কা : আহিল | তোর উ : ঠানে , ছেয়া : বেলে | যা ।  
নাহিল : নাহিল | যেগর : কা তি | আছৎ : বাছে | যা ॥

এবাকা আরাক ছন্দরূপ আহানর কথা আলোচনা করিক । আমি হাবিঙ ছনেছি ।

(৪১) মহাভারতের কথা | অমৃত সমান ॥

এহানর মাত্রা লেহাছিতা অক্ষর গণিয়া । উহানল ছন্দ এহানর নাঙ মাতে পারিয়ার  
অক্ষরবৃত্ত ছন্দ ৪১শ উদাহরণে পর্ব দুগ । আগৎ ৮গ অক্ষর অর্থাৎ আট মাত্রা বার ২য়  
পর্বৎ ৬গ অক্ষর বা ছয় মাত্রা ।

এখুরুম পর্ব এতার পর্বাক্ত ভাগ করিয়া চেইলে এসাদে পেয়ার—

(৪২) মহা : ভার : তের : কথা | অমৃ : ত স : মান ॥

অর্থাৎ মূলে এহান দুই মাত্রার রূপহান ।

(৪৩) বিহ : রতি : হরি : রিহ | সর : স ব : সন্তে

(৪৪) জয় : রূপ : সনা : তন | ভট্ট : রঘু : নাথ ॥

শ্রী জী : ব গো : পাল : ভট্ট | দাস : রঘু : নাথ ॥

এপেই জিনিস আহান লক্ষ্য করানির বিষয়হান অইলতাই পারেঙ দ্বিয়হানির ২য় পর্ব  
উগিৎ ‘সরস বসন্তে’ বার ‘ভট্ট রঘুনাথ’ কথা এহানির যুক্তাক্ষর ঔগিরেউ মাত্রা  
আকেইহান করে ধরেছি । এপেই ১৮শ, ১৯শ বারো ২০শ উদাহরণ উহানি লক্ষ্য  
করিক ।

(৪৫) অর্জুনর বেয়কর | নাঙ যুধিষ্ঠির ॥ ৮+৬

(৪৬) দুর্যোধন রাজেশ্বর | দুর্মতি অস্থির ॥ ৮+৬

প্রত্যেকগ অক্ষররে মাত্রা আকেইহান করে ধরিয়া পারেঙহানাৎ চৌদ্দমাত্রা করে আছে ।  
বার পর্বাক্ত আকেইগত দ্বিমাত্রা করে । কমৌ নাগৈ, নিয়ামৌ নাগৈ । ঔহানল এহানরে  
চৌদ্দমাত্রার ছন্দ নাবুলিয়া দ্বিমাত্রার রূপহান বুলানি থকর । কারণ দ্বিমাত্রা এহানরে  
বাড়ানি কমানি দ্বিয়হানৌ য়াকরের ।

(৪৭) তোর আহিগীর সাদে | করুণ অলছে ॥

এরে চৌদ্দমাত্রা এহানাৎ আমি আরাকৌ মাত্রা যোগ করে পারিয়ার ।

(৪৮) তোর আহিগীর সাদে | শান্ত অছে | করুণ অলছে ॥

এপেই ১৮ মাত্রা অইল ।

(৪৯) তোর আহিগীর সাদে | রাতির আধারহান | শান্ত অছে করুণ অলছে ॥

এপেই ২৬ মাত্রা অইল । পর্বাহানি অছেতাই ৮+৮+৪+৬ এসাদে । কিন্তু প্রত্যেক  
পর্বাক্তৎ দ্বিমাত্রা করে আছে । পারেঙহানাৎ পর্ব যেসাদৌ বাড়ানি য়াকরের কিন্তু পর্ব  
আকেইহানাৎ ২ অথবা ৪ অথবা ৬ অথবা ৮ অথবা ... এসাদে থানা লাগতৈ ।  
[জীবনানন্দর ‘আট বছর আগের একদিন’- কবিতাহান চেইক ।]



(৫০) আজি মোর | দুয়ারে শাতছে ফুল কিয়া ॥  
 খৌরাঙর | রঙল সাজিয়া ॥  
 চানে ॥

কিহান মাতের মোরে , কানে কানে; ॥  
 কার রথ ॥  
 দালিয়া আহেছে কতি পথ। ॥  
 মৃদঙ্গর তান ॥  
 বুজিল ভুবন বার মোর মনহান ॥

এপেই পর্ব আকেইগৎ নিয়ামে দশ বার কমে দুই পেয়া মাত্রা সংখ্যা আছে। এহানৌ অক্ষরবৃত্ত হান।

(৫১) অশোক মঞ্জরী হাবি সাজেছেতা লেইসাবি  
 তোর সালে বসন্তর দিনে  
 বাজের মধুর তান আর নাকরিনে মান  
 আইনে এপেই পথ চিনে।

এহানৌ দ্বিমাত্রার ছন্দহান, এহানৌ অক্ষরবৃত্তর রূপ আহান (পর্ব ৮+৮+১০)

অক্ষরবৃত্ত ছন্দ এহানর মূলে মাত্রা দুহানর তাল হান আছে। মাত্রাবৃত্তরমাউ দ্বিমাত্রার পর্বাঙ্গ দুগ যোগ করিয়া চারি মাত্রার পর্বাঙ্গ করানি যাকরের।

(৫২) চেই : চেই আচা : নক | হই : মারো | লয় : ছে ॥  
 পহু : রীর | পানি : হাবি কিতা : অয়া | তিঙে : ছে ॥  
 মেরা : জাউ | ধন : সেনা বয়া : কিয়া | আছো : তা ॥  
 তিঙা : পানি এছি : টাতে , তুরা : করে | বাছো : তা ॥

এপেইঔ দ্বিমাত্রার পর্বাঙ্গ দুহান (চেই+ চেই) যোগ করিয়া চারিমাত্রার পর্বহান হংকরেছি। ঔহানে ছন্দ দ্বয়হানরমা বিভ্রান্তি অনা সম্ভব কিন্তু জিনিস আহান লক্ষ থইলে এ বিভ্রান্তি আহান দূরেই অইতৈ।

(৫৩) কুঞ্জপথ পূর্ণিমার | মিঙালে ঙালছে ॥  
 চঞ্চল চরণে তেই | অভিসারে এপথে সালছে ॥

এপেই পয়লাকার পারেঙে দুহান পর্ব। ১ম পর্বৎ ৮ মাত্রা, ২য় পর্বৎ ৬ মাত্রা। যদিঔ পর্বহানি ভাগ করলে এসাদে পেয়ার-

(৫৪) কুঞ্জ : পথ পূর্ণি : মার | মিঙা : লে ঙা : লছে

অর্থাৎ এপেয়ো পর্বাঙ্গহানাৎ দুগ করে মাত্রা আছে। অইলেরগায়ো ৫২ নং উদাহরণ ঔহান মাত্রাবৃত্তরহান বার ৫৩ নং উদাহরণ ঔহান অক্ষরবৃত্তরহান। কিয়াকা বুঝে ৫৩ নং -এ পর্বৎ মাত্রা সাজানির স্বাধীনতা ঔহান অর্থাৎ ১ম পারেঙে ৮+৬ বার ২য়

পারেঙে ৮+১০ এসাদে করে সাজানি ঔহান মাত্রাবৃত্তে সম্ভব নাগৈ । ৫২ নং উদাহরণে পারেঙ চারিহানর পূর্ণপদী পর্ব হাবিগিৎ চারিগ করে মাত্রা আছে । ৫৩ নং উদাহরণ আমি এসাদে ইকরে পারিয়ার—

(৫৫) রাতিকার জোনাকর | মিঙালে ঙালছে  
কঙালা চরণে তেই | অভিসারে এপথে সালছে ।

এপেই পর্ব বিভাগ বার পর্বর মাত্রাসংখ্যা সমান থাইল । ছন্দর পরিবর্তন বা ছন্দপতন নাইল । অর্থাৎ যুক্তবর্ণগ যেসাদে মাত্রা আগ বিযুক্ত বর্ণগৌ ঔসাদে মাত্রা আগ । কিন্তু—

(৫৬) কুঞ্জরাজ | ধনসেনা | বয়া কিয়া | আছোতো ॥

এপেইতে ১ম পারেঙে ১ম পর্বৎ মেরাজাউর সারুক 'কুঞ্জরাজ' দেনাই ছন্দ পতন অইল । কারণ এপেই 'কুঞ্জ' তিন মাত্রা । যুক্তবর্ণর আগেকার বর্ণগ 'কু' মাত্রা দুহান । ঔহানে ৫২ নং উদাহরণ নিশ্চিত মাত্রাবৃত্ত ছন্দহান ।

প্রবন্ধ এহানাৎ ছন্দর প্রাথমিক নিয়ম কতহান শিচ্চিল সহজ করে আলোচনা করলাৎ । ছন্দর মূল কথাহান কানহান । কানহানাৎ বাজানি পারলে মনহানাৎ আগ্রানেউ বাজতৈ । বার লক্ষ করানির জিনিসহান যেগৈ হবা কবিগ ঔগৈ ছন্দর হবা কবিতা ইকরে পারতৈ । অকবির আতে অইতৈতাই ছন্দর কসরৎ ।

জেম ৭ সহই কণঅ— তুলা

ভিল-তুলিঅৎ অঙ্ক— অঙ্কেণ ।

তেম ৭ সহই সবণ— তুলা

অবহন্দং হন্দ ভঙ্গো ॥ (প্রাকৃত পৈঙ্গলম্ ১।১০)

(প্রতিশ্রুতি, ১৩৭৭)

## চারিমাত্রার মাত্রাবৃত্ত ছন্দ

যে ছন্দহানাৎ ধ্বনিহানরে মাত্রা আহান ধরতারা ঔহানরে মাত্রাবৃত্ত ছন্দ বুলতারা। মাত্রাবৃত্ত ছন্দের পর্ব আহানাৎ ৪ মাত্রা, ৫ মাত্রা, ৬ মাত্রা বা ৭ মাত্রা থানা যাকরের। লক্ষ করানির বিষয়হান ঐলতাই পারেংহানাৎ কয়গ মাত্রা আছে ঔহানল ছন্দহান নাগৈ পর্বগৎ কয়হান মাত্রা আছে ঔহানল ছন্দরূপহান গঠন অর।

(১) বরনে বাদলে গেলগা সময় | হান।

(২) জয়মতী তুলসীর | পাতাখানি | ছিড়।

পারেং দ্বিয়হানিতৌ ১৪ হান করে মাত্রা আছে। অথচ পাকরতে হারপেয়ার ছন্দগ তঙাল আছে। ১ম উদাহরণে পর্বগৎ ছয়গ করে মাত্রা আছে (বরনে বাদলে = ৬ মাত্রা), ২য় উদাহরণে পর্বগৎ ৪ হান করে মাত্রা আছে (জয়মতী = ৪ মাত্রা)। ঔহানল ১ম উদাহরণ ৬ মাত্রার মাত্রাবৃত্ত বার ২য় উদাহরণ চারিমাত্রার মাত্রাবৃত্ত। অবশ্য লম্বনির পর্বঔগিৎ পারেঙ দ্বিয়হানিতৌ দু'গ করে মাত্রা আছে। অর্থাৎ, আগেকার পর্বঔগিৎত মাত্রা কমছে ঔহানল ঔহানরে অপূর্ণপদী পর্ব বুলানি থকর। পারেঙর হাদিৎ এসাদে অপূর্ণপদী পর্ব না বহের।

(৩) আইনে এপেই | হমাজি

কঙালা আতর রাঙা ফুলগর | বানাহান মোরে দে আজি।

৩য় উদাহরণর ১ম পারেঙে ৯ মাত্রা বার ২য় পারেঙে ২১ মাত্রা। এহানরেতে কয় মাত্রা বুলানি? পর্ব আকেইগিৎ ৬ হান করে মাত্রা আছে মাহেইতে এহানৌ ৬ মাত্রার ছন্দহান। পারেং দ্বিয়হানিতৌ লম্বনির অপূর্ণপদী পর্বঔগির মাত্রা সংখ্যা ৩।

মাত্রাবৃত্ত ছন্দের মাত্রা লেহানির নিয়মহান আলোচনা করিক। 'কলম' কথা এহানাৎ তিনহান ধ্বনি- ক+ ল+ ম; ঔহানে ৩ মাত্রা। পরিচয় কথা এহানাৎ প+রি+চ+ম= ৪মাত্রা জয়মতী = ৪মাত্রা। এপেই = ৩মাত্রা। 'ওরে' কথা এহানাৎ ৩ মাত্রা; কিয়া বুলেতে 'ঔ' এগ আসলে দু'গ স্বরবর্ণ অ+উ। ঔহানল এগরে যুগ্মস্বরধ্বনি বুলতারা। ঔরে= অ+উ+রে = ৩মাত্রা। ঐ (অ+ই) = ২ মাত্রা, গৌর = ৩ মাত্রা, হিংসা= ৩মাত্রা 'দুঃখ' কথা এহানর উচ্চারণ দু+ক+খ= ৩মাত্রা কুঞ্জ= ৩মাত্রা কারণ যুক্তবর্ণগর আগেকার বর্ণগৎ ২ মাত্রা ধরানি থকর কিন্তু যুক্তবর্ণগত মাত্রা আহান ধরানি কুঞ্জ- শব্দর 'কু' এগ যুক্তবর্ণগর আগেকার বর্ণগ ঔহানল এগৎ ২ মাত্রা বার 'ঞ্জ' এগৎ ১-মাত্রা ধরানি অর্থাৎ ক্রয় বুলে ক্র+য়= ২মাত্রা। কারণ যুক্তবর্ণগত ১মাত্রা বার পিছেকার বর্ণগতৌ ১মাত্রা ধরেছি। কিন্তু 'বিক্রয়' কথা এহানাৎ ৪ মাত্রা আছে। 'বি' এগ যুক্তবর্ণর আগেকার বর্ণগ ঔহানল এগরে ২ মাত্রা ধরেছি। বি+ক্র+য়= ২+১+১=৪ অর্থাৎ সাধারণ নিয়মহান ঐলতাই ধ্বনিহানাৎ মাত্রা আহান, যুগ্মস্বরধ্বনিৎ দু'হান বার যুক্তবর্ণর আগেকার বর্ণগৎ মাত্রা দুহান লেহেইলে ঔহানরে মাত্রাবৃত্ত ছন্দ বুলতারা।

এখুরুম মাত্রাবৃত্ত ছন্দর ৪ মাত্রার ছন্দ এহান আলোচনা করিক । ৪ মাত্রার ছন্দ এহান ক্ষিপ্ত বার চঞ্চল ।

(৪)	সাংহান	ছাতারা ॥	৪+৩
	কিয়া খার	কাকাড়া ॥	৪+৩
	বেরাচেরা	নাকুরি ॥	৪+৩
	খেইতেই	বাকুরি ॥	৪+৩

এপেই ১ম পর্বৎ ৪ মাত্রা, পিছেকার পর্বৎ ৩ মাত্রা । ৫ম উদাহরণর পারেংহান লেহে ১ম পর্বৎ ৪ বার ২য় পর্বৎ ৩ হান করে মাত্রা আছে । এখুরুম আরাক চারিহান করে মাত্রা যোগ করিক ।

(৫)	সাংহান	অছে ভোর	ছাতারা ॥	৪+৪+৩
	কিয়াখার	ধরে ধরে	কাকাড়া ॥	৪+৪+৩
	কাদে কাদে	বেরাচেরা	নাকুরি ॥	৪+৪+৩
	খেইতেই	মোর আতে	বাকুরি ॥	৪+৪+৩

৫ম উদাহরণে ১ম পারেঙে ৪ মাত্রার পর্ব আকেইগি নিয়াম অয়া মাত্রা সংখ্যা ৪+৪+৩ এসাদে করে ঐল । এখুরুম আরাকৌ চারিহান করে মাত্রা যোগ করিক ।

(৬)	সাংহান	অছে ভোর	অমাটিক	ছাতারা ॥	৪+৪+৪+৩
	কিয়া খার	ধরে ধরে	বুড়া বুড়া	কাকাড়া ॥	৪+৪+৪+৩
	কাদে কাদে	এবাকা তি	বেরাচেরা	নাকুরি ॥	৪+৪+৪+৩
	খেইতেই	মোর আতে	জুৎকরে	বাকুরি ॥	৪+৪+৪+৩

৬ষ্ঠ উদাহরণে চারি পারেঙে চারিহান করে পর্ব । ঔতার মাত্রা সংখ্যা এসাদে করে ঐল ৪+৪+৪+৩ ।

লক্ষ করানির বিষয়হান, পর্ব আকেইহান নিয়াম করে করে পারেঙহানি ডিগল করলেউ প্রত্যেক পর্বৎ ৪ হান করে মাত্রা আছে বুলিয়া ছন্দহান তঙাল নাছে পর্বহানাৎ ৪ হান করে মাত্রা আছে বুলিয়া এহানরে চারিমাত্রার মাত্রাবৃত্ত ছন্দ বুলানি থকর ।

লক্ষ করে থাইবাং, গজর উদাহরণ এহানিং যুক্তবর্ণ ব্যবহার নাকরেছি । যুক্তবর্ণ ব্যবহার করলে ছন্দহানর চঞ্চলতাহান আরাকৌ নিয়াম অইতই ।

(৭)	কুঞ্জর	গরে অছে	এমাটিক	জঞ্জাল ॥
	ঙেই দুগ	আয়া আজি	করতার	গঞ্জাল ॥
	মাজিয়ে	মাতেরতা	বেলা দিয়া	যাগানে ॥
	নাম লয়া	মাধুকুরী	করে করে	থাগানে ॥
	পাজি মি	চেইলুতা	খেলহান	এহানেই ॥

অইতই । হাবি হব্যা করতেই যেহানেই ॥  
 মেঞ্জং । নিকুলেছে । কিহানতে । করানি ॥  
 গরে থাই । লেতে ইমে । জিংতাং । মরানি ॥  
 তাঞ্জাগ । চেয়া আজি । ভেক লছু । খুলনে ॥  
 কিয়া লাজা । পারতা তি । থতাহানা । খুলনে ॥  
 গঞ্জর । মন্দিরে । কুঞ্জই । আছেগা ॥  
 খঞ্জনী । খুড়িরে তা । ঔপেই । পাছেগা ॥  
 চারিবেদে । আছি বয়া । কানা বার । খঞ্জ ॥  
 সমালানি । হিনছেক । ঔতার । জঞ্জ ॥  
 ইঞ্জাও । বুড়া আছে । দৌগরে । রাহিয়া ॥  
 সাংসাপা । নেয়েছতা । মেঞ্জর । নাহিয়া ॥  
 তিনজরা । পথগৎ । বছি যেতা । ডক্ত ॥  
 মাংতারা । কুঞ্জর । মনহান । শক্ত ॥  
 খেঞ্জঙে । মাতেরতা । দুয়াহান । নাচেয়ো ॥  
 কাদতই । ঔহান । খানি করে । বাসেয়ো ॥  
 পাঞ্জা খে : লেয়া আছি । শৌ দুগ । ঔপেই ॥  
 কিয়া থাঙ । লিটকেয়া । আহিতারা । বৌনেই ॥  
 থায়া থায়া । কুঞ্জই । দেরতাক । চিকারি ॥  
 তঞ্জাও । সেনা নাগা । হজকৌ । দ্বিকারি ॥  
 চাতা হুনা । গুঞ্জাগ । অছেতানা । নাছেতা ॥  
 নিয়ালর । নামসাগ । হবা অয়া । আছেতা ॥

৭ম উদাহরণে পারেংহানি লমছেগা পর্বঙিগি কোন সময় ৪ মাত্রা, কোন সময় ৩ মাত্রা ।  
 যেপেই ৪ মাত্রা আছে ঔপেই পিছেকার পারেঙৌ ৪ মাত্রা, বার যেপেইত ৩ মাত্রা  
 ঔপেইত পিছেকার পারেঙৌ ৩ মাত্রা । এসাদে স্বাধীনতা অপূর্ণপদী পর্বগিৎ লনা  
 যাকরের কিন্তু ১ম পারেঙে অপূর্ণপদী পর্বগিতৌ ঔতা থানা থকর

এখুরুম চারিমাত্রার ছন্দ এহানর আরাক কতহান উদাহরণ চেইক-

(৮) চঞ্চল বৌহানে বনে বনে নাছেছে ॥  
 অশোকর । ডেঙে ডেঙে । বসন্ত । আহেছে ॥  
 পূর্ণিমা । জোনকর । মিঙালর । হপনে ॥  
 মিলনর । এলাহান বাজেরতা । গোপনে ॥

৮ম উদাহরণে ১ম পারেঙর ১ম পর্বৎ বার ২য় পারেঙর ৩য় পর্বৎ যুক্তবর্ণ আছে । অর্থাৎ  
 যুক্তবর্ণ ব্যবহার যেকোন পর্বৎ যাকরের

লক্ষ খনার বিষয়হান ঐলতাই যুক্তবর্ণর আগেকার বর্ণগরে মাত্রা দুহান ধরানি। ৩য় পারেঙর ১ম পর্বৎ 'পূর্ণিমা' শব্দ ৪ মাত্রা। এপেইং 'পূর্ণিমার' দিলে ছন্দহান ভুল ঐতৈ।

এখুরুম চারি মাত্রার দুগ পর্বল হংকরেছি ছন্দরূপ আহান চেইক—

- (৯) বনে বনে | তমালর ॥  
 নুয়া মেঘ | মাম অর ॥  
 মল্লার | সুরে সুরে ॥  
 কথাহানি | গুরে গুরে ॥  
 আনেদের | কি গোপন ॥  
 পৌহানে | ভাল মন ॥

৯ম উদাহরণে পারেংহান লেহে পর্ব দু'গ করে আছে। বার পর্বগৎ চারিহান করে মাত্রা আছে।

- (১০) কিয়া বয়া | আছ আজি | ক্ষত্রিয় | সন্তান ॥ ৪+৪+৪+৪  
 হাবিয়ে এ | কতা অয়া | বাধ বাধ | মনহান ॥ ৪+৪+৪+৪

১০ম উদাহরণে ২য় পারেঙে যেসাদে করে পর্বভাগ করেছি আমি সাধারণতঃ ঔসাদে না পাকরিয়ার। আমি পর্বর যতি ঔহান লোপ করিয়া পাকরিয়ার।

- (১১) হাবিয়ে এ : কতা অয়া | বাধ বাধ | মনহান ॥

ছন্দ হিকানির শ্রেষ্ঠ উপায়হান কবিতার ছন্দহান থয়া লৌদিয়া পাকরানি। ঔহান ঐলে কানহানাৎ বাজতৈ। ঢাক বাড়ানি, এলা দেনা যেসাদে হিকানি লাগের, কবিতার ব্যাকরণৌ ঔসাদে না হিক্লে কবিতা হিকানি নার। অকবিয়ে ছন্দ শুদ্ধ করানি নুয়ারতাই কিন্তু প্রকৃত কবি ঔতাই ছন্দহানরে ক্রীতদাসগর সাদে ব্যবহার করে পারতারা।

(পাক্ষজন্য, ১৩৭৮ বাংলা)

## স্বরবৃত্ত ছন্দ

### ভূমিকা

বর্তমান লেখকের 'কবিতার ছন্দ প্রবেশিকা' (প্রতিশ্রুতি, ৪র্থ সংকলন) প্রবন্ধ ঔহানাৎ Syllabic ছন্দ এহানর নাঙহান আছিলতা স্বরবৃত্ত ছন্দ। কিন্তু Syllabic ছন্দরে স্বরবৃত্ত ছন্দ বুলানি য়াকরের না নাকরের, এহানাৎ তর্কর অবকাশ আছে বার নাঙ এহান বর্তমান লেখকরতাউ অতৃপ্তির কারণ বাংলাৎ এহানরে ছড়ার ছন্দৌ বুলতারা, কিন্তু 'ছড়ার ছন্দ' কথা এহান আমারাৎ মূল্যহীন। কারণ আমারাৎ ছড়া বুলিয়া কোন বিশেষ ধরনর কবিতা নেই বাংলার অনুকরণে কোন কোনগৈ শৌর কবিতারে 'ছড়া' বুলতারা কিন্তু হাবি শৌর কবিতা ছড়া নাগৈ লোকসাহিত্যর কবিতাৎ বর্তমান ছন্দ এহানর প্রচলন নিয়াম বুলিয়া এহানরে 'লৌকিক ছন্দ' বুলতারা কিন্তু লৌকিক ছন্দ বুললে ছন্দ এহানর উৎপত্তিগত নাঙহান অর, তার প্রকৃতির পরিচয় নাদের স্বাসাঘাতপ্রধান ছন্দ বুললে ছন্দ এহানর প্রকৃতি আহান নির্দেশ করে হায়হান কিন্তু মূলে, ছন্দ এহান সিলেবলর গজে নির্ভরশীল ঔহানে স্বাসাঘাতপ্রধান ছন্দ বুলানি এহান তৃপ্তিদায়ক নাগৈ। হাবি ছন্দবিজ্ঞানীয়েউ নাঙ এহানরে সর্বসম্মতিক্রমে গ্রহণ নাকরেছি। 'দলবৃত্ত' কথা এহানর দল শব্দ এগ তৎসমগ অইলেই পরিভাষাহান হিসাবে গম্ভীর নাটগ। যেতাউ অক, উপযুক্ত পরিভাষার অভাবে আগে ব্যবহার করেছিলাং নাঙ ঔহান (স্বরবৃত্ত) ব্যবহৃত অইল।

### পরিভাষা প্রসঙ্গ

Syllable কথা এহানর কোন সর্বজনগ্রাহ্য পরিভাষা নেই। ধ্বন্যাঘাত, বর্ণনির্মাণ, ইত্যাদি বিভিন্ন পরিভাষা ব্যবহৃত অয়া বিভ্রান্তির সৃষ্টি করেছে। অক্ষর কথা এহানরে কোন কোন লেখকে সিলেবল্ অর্থৎ ব্যবহারর পক্ষপাতী, কারণ সংস্কৃতৎ অক্ষর কথা এহান বর্ণনির্মাণ অর্থৎ সিলেবলর প্রতিশব্দহান হিসাবে আছে। মণিঅর উইলিআমসর অভিধানে আছে— অক্ষর— a Syllable, a letter, বাচস্পত্য অভিধানে আছেতা 'অক্ষরৎ বর্ণনির্মারৎ বর্ণপ্যক্ষরৎ বিদু' অর্থৎ অক্ষর কথা এহান বর্ণ বার বর্ণনির্মাণ (Syllable) দ্বয়হান অর্থতৌ ব্যবহৃত আছে অক্ষরাণামকারোন্মি (গীতা ১০।৩৩) বার ওমিত্যেকাক্ষরৎ ব্রহ্ম (গীতা ৮।৩৩) এপেই অক্ষর কথা এহান পয়লাকার খুরম বর্ণ বার পিছেকার খুরম সিলেবল্ হিসাবে ব্যবহৃত আছে। ছান্দোগ্য উপনিষদেউ অক্ষর কথা এহান সিলেবল্ অর্থৎ ব্যবহৃত আছে (আদিরিতি দ্ব্যক্ষরৎ প্রতিহার ইতি চতুরক্ষরম্ ॥ ২।১০।২)। কিন্তু অক্ষর কথা এহানরে সিলেবলর প্রতিশব্দ হিসাবে এবাকা আর গ্রহণ করানি সম্ভব নাগৈ। কারণ ঔহান অইলে ডাঙর বিভ্রান্তি আহান অনার সম্ভাবনা। সংস্কৃত ছন্দোগ্রন্থৎ অক্ষর শব্দ এগরে বর্ণর প্রতিশব্দগ হিসাবে ব্যবহার করেছি। শ্রুতবোধ বার ছন্দোমঞ্জরী গ্রন্থদ্বয়হানিরতাউ মত আকহান। প্রাচীন শাস্ত্রকারে অক্ষর বারো বর্ণ কথাদ্বয়হানিয়ৌ শব্দাংশ (Syllable) অর্থৎ ব্যবহার করেছি। ঔহানে সিলেবল্ কথা

এহানর বর্তমানে ব্যবহারযোগ্য প্রতিশব্দ প্রাচীন গ্রন্থত বিসারিয়া পানা চিল। 'লেরিক' কথা এহানর অক্ষর তিনগ – লে.রিক. কিন্তু শ্রুতিবিভাগ বা সিলেবল দুগ-লে. রিক। শ্রুতিবিভাগর অংশ আকেইহানরে কিতা বুলানি? অন্য প্রতিশব্দর অভাবে স্বর কথা এহান ব্যবহার করলাং। সিলেবিক ছন্দরে মাতলাংতাই স্বরবৃত্ত ছন্দ। কারণ শব্দাংশ আগৎ সাধারণতঃ স্বর আগ থার।

**মুক্তস্বর (Open Syllable)** – যে স্বরর পিছেদে আশ্রিত ব্যঞ্জন নাথার ঔহানরে মুক্তস্বর বুলানি যাকরের। যথাঃ লে.রিক- কথা এহানর প্রথম সিলেবল লে- কথা এহানর পিছেদে কোন আশ্রিত ব্যঞ্জন নেই। এগ মুক্ত স্বরগ।

**বন্ধস্বর (Closed Syllable)** – যে স্বরর পিছেদে আশ্রিত ব্যঞ্জন থার ঔহানরে বন্ধস্বর বুলানি যাকরের। যথা লে. রিক. – কথা এহানর পিছেকার সিলেবল রিক। এপেই ক- এগ সিলেবলগ লয়নির আশ্রিত ব্যঞ্জনগ।

## ছন্দ পরিচয়

(১) কনাক পুরী | জেলা অয়া | এইলি হাকর | জোনাক ॥  
তারামণির | ফুলর ডালে | গারিগো ডাক | ডাক ॥  
(সেনারূপ সিংহ)

(২) খাল পারর | কাঙ  
যেইতেগাতে | আকতা অয়া | আলৈতে ঠাং | ঠাং।  
(মদনমোহন মুখোপাধ্যায়)

(৩) কাম হদেয়া | গরে আনার | পরহান এল | গেলগা।  
উতা পেয়া | নাহের আজি | কুরাং কিতা | অইলগা ॥  
(চন্দ্রবদন সিংহ)

(৪) ছনতে ইতাও | মাংতু কিতা | মদন চিঙর | বিপদহান ॥  
চর দুগরে | চরকরিয়া | মারল গাঙর | মানুর মান ॥

গজর চারিয়হান উদাহরণে পারেঙহান লেহে তিনগ পূর্ণপদী বার আগ অপূর্ণপদী পর্ব ব্যবহৃত আছে (ব্যতিক্রম ২য় উদাহরণর ১ম পারেঙ ; ঔপেই আগ পূর্ণপদী বার আগ অপূর্ণপদী পর্ব আছে)। প্রত্যেক পর্বৎ চারিগ করে স্বর বা সিলেবল আছে। এহান স্বরবৃত্ত ছন্দর বিশেষত্বহান। স্বরবৃত্ত ছন্দর কবিতাৎ সাধারণত পারেঙহানাৎ চারিহান পর্ব (তিনগ পূর্ণপদী বার আগ অপূর্ণপদী) বার পর্বহানলেহে চারিহান করে স্বর বা সিলেবল থার। স্বর বা সিলেবল আগরে মাত্রা আহান ধরিয়া প্রত্যেক পর্বৎ চারিহান করে মাত্রা ধাইতে। পারেঙহান লয়নির অপূর্ণপদী পর্ব ঔতাৎ ১ম উদাহরণর ১ম পারেঙে দুগ স্বর (Syllable) বা মাত্রা, ২য় পারেঙে আকগ স্বর বা মাত্রা। ২য় উদাহরণে আকেইগ করে মাত্রা। ৩য় উদাহরণে দুগ করে মাত্রা। ৪র্থ উদাহরণে তিনগ করে মাত্রা। অর্থাৎ অপূর্ণপদী পর্বগৎ আহান, দুহান অথবা তিনহান স্বর বা সিলেবল থানা যাকরের।



পূর্ণপদী পর্বহান লেহে চারিগ করে স্বর বা মাত্রা ধায়া ছন্দ এহানর সৌম্য রক্ষা অর ।  
পর্বহানলেহে দুহান করে পর্বাজ থানা এহান ছন্দ এহানর বিশেষত্বহান ।

(৫) কনাক : পুরী | জেলা : অয়া এইলি : হাকর জোনাক  
তারা : মণির | ফুলর : ডালে | গারি : গো ডাক ডাক ।

(৬) কিসা : দে মি | থাইতু : গরে | তারে : নাদে | হিয়া  
এমা : টিক ডি | লইতে : নাহের | হনার : ঠইগো , কিয়া?

(চন্দ্রবদন সিংহ)

গজর উদাহরণ এহানি লক্ষ করলে দেহিয়ার প্রত্যেক পর্বৎ পর্বাজ দুহান করে আছে  
বার পর্বাজহান লেহে দুহান করে মাত্রা (স্বর বা সিলেবল্) অর্থাৎ ছন্দ এহানর লক্ষণহান  
অইলতাই স্বর (সিলেবল্) আগৎ একমাত্রা করে মাত্রা দুহানল পর্বাজ আহান বার পর্বাজ  
দুহান, অর্থাৎ চারিহান মাত্রাল পর্ব আহান গঠিত অর । ৫ম উদাহরণর ২য় পারেঙর ৩য়  
পর্ব ঔহান লক্ষ করিক (গা+রি : গো+ডাক) 'গারিগো' শব্দ এগর পয়লাকার সিলেবল্  
দুহানে পর্বাজ আহান আছে বার শব্দগর ৩য় সিলেবল্ উগ ২য় পর্বাজৎ গেছেগা । ৬ষ্ঠ  
উদাহরণে পর্ব বিভাগ ঔহান লক্ষ করিক

এমাটিক ডি | লইতে নাহের | হনার ঠইগ | কিয়া ॥

এরে পারেঙ এহানর ১ম পর্বৎ এ+মা+টিক- এরে পূর্ণ শব্দ এগই তিনহান সিলেবল্  
অবত্যাংতে পিছেকার শব্দগর (ডি+লৈ+তে) ১ম সিলেবল্ (ডি) আনিয়া ১ম পর্বর  
চারিহান সিলেবল্ পূর্ণ আছে । শব্দ আগরে খেইকরিয়া দুহান পর্বৎ ব্যবহার করানি এহান  
অন্য ছন্দৎ নার । কিন্তু স্বরবৃত্ত ছন্দৎ যেহেতু পর্ব আহানাৎ চারিহান সিলেবল্ থানা থকর  
ঔহানল শব্দ আগরে বাগিয়া দুহান পর্বৎ ব্যবহার করানি যাকরের । আরাকৌ উদাহরণ  
লক্ষ্য করিক-

(৭) বাত নে : য়ছে হৌ নে : য়ছে নেয় : ছেতা | থৌ ।  
চাকা : মেহ | মেয়া : আজি | দেখলু : ইমার | দৌ ॥

(৮) পাকা : টি তান | দিয়া : মরিল আমার : মুঙর নন্দ ॥  
হবা : নেই দিন | পড়লে : কপাল | আপ্পা : নে অর | মন্দ ॥

গজর উদাহরণ এহানিতৌ পর্বহানাৎ চারিহান মাত্রা সুকরানির সালেদে শব্দ আকেইগি  
বাগিয়া দুহান পর্বৎ ব্যবহার করেছি । যথা : 'চাকামে হ | মেয়া' বার 'পাকাটি তান  
দিয়া'

স্বরবৃত্ত ছন্দর আরাক লক্ষণ আহান অইলতাই ছন্দ এহানর চলনহান নিয়াম ক্ষিপ্ত । ঔ  
ক্ষিপ্ততা ঔহানর সালেদে ছন্দহানর শ্রুতিগুণহান নিয়াম অর এবাকা ঔ ক্ষিপ্ততা  
ঔহানর কারণহান ব্যাখ্যা করিক-

- (৯)      সেইমাতলে | কাম করিঁ | চেইগা হাবি | চেইগা  
             লাজ নেইতা | ডেইনি গাছি | কাম হিকোগা | যেইগা

গজর পারেঙ এহানির কোন কোন স্বরর গজে পড়েছে জাতা এহান পিছেকার হাবি স্বর ঔতাহতৌ স্পষ্ট অয়া হনিয়ার। এরে জাতা এহানর স্পষ্টতা বা বৃদ্ধি এহানরে শ্বাসাঘাত বা স্বরাঘাত বুলানি যাকরের। যে যে স্বরর (syllable) গজে (') রেফ চিহ্ন এহান দেছি ঔপেই চেয়া শ্বাসাঘাত পড়েছে। ঔহানর সাপেদে বাগ্যন্তর গতিহান ক্ষিপ্ত অর। এরে শ্বাসাঘাত এহান এরে ছন্দর কবিতার ফামে ফামে, সাধারণতঃ রুদ্রস্বরর গজে পড়ের। যুক্তস্বরর গজে পড়লে স্বর ঔতারে খানি দীর্ঘ করিয়া উচ্চারণ করানি থকর। বার রুদ্রস্বরর গজে শ্বাসাঘাত পড়লে স্বর ঔগর হ্রস্বীকরণ অর। এরে শ্বাসাঘাত এহানৌ ছন্দ এহানর বিশেষত্বহান। কোন কোন সময় লয়নির অপূর্ণপদী পর্ব ঔগর গজে ছন্দ এহানর প্রতিষ্ঠান নির্ভর করের।

- (১০)    চম্পাবতীর | কানে ঝম্কা | কতিতে ঝল্ | কার্ ॥  
             লেহাওর সাপে | আঙুলিগি | পানিরে ঝল্ | কার্ ॥

এপেই লয়নির অপূর্ণপদী পর্বঔহানিৎ সিলেবল্ আকেইগি করে (কার্) আছে। অপূর্ণপদী পর্ব ঔহানির অমুক্তস্বর ঔগির গজে শ্বাসঘাত পড়েছে।

- (১১)    লপুক বুজে | হাওন মাহার | বরন আছে | ছে ॥  
             ধলেশ্বরীর | পার ঘিয়গি | চপ্প পাহে | ছে ॥  
             সেহা আহিল | হাবি গদে | ইমাম মাম | যা ॥  
             দৌঅর বর্তি | তুলসি পুজে | লাগের ডাল | যা ॥

এপেই লয়নির অপূর্ণপদী পর্বর সিলেবল্ ঔগি (ছে,ছে,য়া,য়া) যুক্তস্বর অনাই সম্পূর্ণ পারেঙহানর ভরিহান ঔহানাৎ পড়েছেগা আরো ঔ অপূর্ণপদী পর্বঔতাই ভরিহান সম্পূর্ণ ভাক্করেছে পারা। ১০ম বার ১১শ উদাহরণ লয়নির অপূর্ণপদী পর্ব ঔহানি সিলেবল্ আকেইহানিরতা অইলেরগায়ো ১০ম উদাহরণে অমুক্তস্বর বার ১১শ উদাহরণে যুক্তস্বর অনাই সুন্দর তড়াল আহানর সৃষ্টি আছে। ঔহানর কারণহান অইলতাই ১১শ উদাহরণর অপূর্ণপদী পর্ব ঔতার গজে শ্বাসাঘাত পড়িয়া দীর্ঘকরণ ঘটেছে বুলিয়া হনতে তড়াল লাগেরতা। ১০ম উদাহরণর অপূর্ণপদী পর্বৎ শ্বাসাঘাত পড়লেউ ঔতারে দীর্ঘ করানির প্রয়োজন নাহে।

- (১২)    তাখন : চাউবীর | কিজেন : চেইতে | আহি : অঙ্ক | কার ॥  
             ইনা : ফিহান | মাঙ : হে খাং | লাগিল : তঙ্ক | কার : ॥  
             মাংকন : মচুর | তল : ফুতি | খেলমা : চিরৌ | আঙেই ॥  
             আজির : কাহে | উরা : নি নাই | আইলা : নুয়া | জাঙেই ॥

এপেই ১ম পারেঙর ১ম পর্বৎ তা+থেন্+ চাউ+ বীর্- এরে চারিগ সিলেবলরমা -  
থেন, চাউ, বীর্, এরে রুদ্ধ সিলেবল্ এপিৎ উচ্চারণর সময় স্বাসাঘাত (stress)  
পড়েরথাংতে উচ্চারণ করানি খানি হিনর। কারণ সিলেবল্ আগৎ স্বাসাঘাত পড়লে  
পিছেদে জুহানে খানি বিশ্রাম মাগের। কিন্তু এপেই কাদাকাদি তিনগ রুদ্ধস্বর থানাই ঔ  
বিশ্রাম ঔহান সম্ভব নার বুলিয়া ছনতে নুঙেই না লাগের। তাথেন চাউবীর্ ফামে 'চাউবী  
তাথেন' বুলিয়া পাকরলে তঙালহান কানহানাৎ স্পষ্ট অইতৈ।

(১৩) এলা কসুম | চুম্পুল চুম্পুল | অয়া পত্নী | পথে (সেনারূপ সিংহ)

এপেই ২য় পর্বৎ চুম্+ পুল্+চুম্+ পুল্ এসাদে চারিগ অমুক্তস্বর আকপেই থানাই পর্ব  
এগ অন্যান্য পর্বৎত ভরি অছে পারা।

পর্বহানাৎ চারিগ সিলেবল্ বার পবার্জ আহানাৎ দুহান সিলেবল্ থানা ছন্দ এহানর  
বিশেষত্বহান এখুরুম ছন্দ এহানর ব্যতিক্রম খানি লক্ষ্য করিয়া চেইক-

(১৪) অ : বইতল হেমা : ভুতা | মাক্ক : গো না | মইচগো তি ॥  
মরলে : তিতে | বাহার : তলর | কালা : দৌগ | অইছকো তি ॥

(১৫) অবাই : হনা | পড়লে : তাতে | আই এ : পেই আই | উঠাদিং ॥  
দুহেই : লেতা | না খাল : করি | পাইঙে : লেতে | অইঙ্গে সিং ॥

(১৬) মৌ : নাহা | পুরী : জেলেই ॥  
সৌ : থকে | বহক : লকেই ॥  
সৌসু : মারা | গাওরা : পুরেই ॥  
ঘর ফু : কয়া | গাঙ।

(মদনমোহন মুখোপাধ্যায়)

১৪শ উদাহরণর ১ম পারেঙর ১ম পর্বৎ তিনগ সিলেবল্ (অ+ বই+তল), ১৬শ  
উদাহরণর ১ম পারেঙর ১ম পর্বৎ তিনগ (মৌ+ না+ হা), ২য় পারেঙর ১ম পর্বৎ তিনগ  
সিলেবল্ (সৌ+থ+কে), অথচ এপেই কোন ফামেও ছন্দপতন নাছে। এহানতে  
কিসাদে সম্ভব অইল? কারণ আমি আগেদে মাতিয়া গেছিগা স্বরবৃত্ত ছন্দৎ চারিহান মাত্রা  
বা চারিহান সিলেবল্ যেসাদেউ থানা থকর। ১৬শ উদাহরণ ঔহান লক্ষ্য করিক।  
'গাভুরাপুরেই' শব্দ এগৎ গা+ভু+রা+পু+য়েই এসাদে পাচহান সিলেবল্ আছে থাংতে  
পর্ব আহানাৎ শব্দ এগ ব্যবহার করলে ছন্দপতন অর যেহান কবির কানহানে স্বীকার  
নাকরের ঔহানে শব্দ ঔগর সিলেবল্ আগ কমেয়া ইকরেছে গাও+রা+পু+য়েই  
এসাদে চারিগ সিলেবল্ হংকরিয়া ছন্দপতনেৎত রক্ষা করেছে

(১৭) তিঙিয়া তুঙিয়া খিট খিটিয়া থুরথুরার আত | জাঙ।

(মদনমোহন মুখোপাধ্যায়)

এপেই ১ম পর্বৎ (তি+ডি+য়া+তু+ডি+য়া) ছয়হান সিলেবল্ আছে। পিছেকার পর্বহানাতৌ চারিগ সিলেবল্ থানাই ১ম পর্বর অতিরিক্ত দুহান সিলেবল্ ২য়পর্বৎ দেনা নাকরল। এপেই যদি আমি 'তিড্যা তুড্যা' এসাদে উচ্চারণ নাকরিয়ার ঔহান অইলে ছন্দপতন অইতৈ। অর্থাৎ ছয়হান সিলেবলরে চারিহান সিলেবল্ করে উচ্চারণ করানি লাগতৈ।

ঔহান অইলেতে ১৪শ বার ১৬শ উদাহরণর তিনমাত্রার পর্ব ঔতারে কিসাদে ব্যাখ্যা করানি? ১৫শ উদাহরণর ১ম পর্বর (অবাই হনা) অ ঔগর উচ্চারণ বার ১৪শ উদাহরণর ১ম পর্বর (অ বইতল) অ-ঔগর উচ্চারণ তুলনা করলে এহান পরিষ্কার অইতৈ। ১৪শ উদাহরণর অ-ঔগৎ স্বাসাঘাত বা (stress) পড়েছে। ঔহানে অ-ঔগর উচ্চারণ দীর্ঘ অয়া সিলেবল্ দুহানর কাম করেছে। কিন্তু পিছেকার 'অবাই হনা'র অ-ঔগ দীর্ঘ নাছে থাংতে এপেই সিলেবল্ আহানর কাম করেছে। 'মৌ নাহাঃ' 'সৌখকে' বুলতে 'মৌ' 'সৌ' কথা দ্বয়হানিৎ স্বাসাঘাত পড়িয়া মাত্রা দুহান করে আছে। কিন্তু লক্ষ করিক ১৬শ উদাহরণর 'সৌ সুমারা' বুলতে 'সৌ' কথা এহানতে দীর্ঘ নাছে। পর্বহানাৎ সম্পূর্ণ চারিহান সিলেবল্ থানাই 'সৌ সুমারা'র সৌ কথা এহান একমাত্রার স্বাভাবিক উচ্চারণ আছে।

(১৮) অংতা হবা | টেংটা হবা | কাপেছেতা | নিংখি ॥  
সিন্দুর পি | দিয়া গিদেই | টকী চেইরী | হিন্দী ॥

(১৯) ওঁ ক্রীং ফট | কিলিং কিলিং | ইরিং পারিং | খিরিং খিরিং ॥  
খাং না লাগি | ছুঃ ছুঃ ছুঃ | টৌনাটিঙে | জিরিং জিরিং ॥

১৮শ উদাহরণর ২য় পারেঙর ১ম পর্বৎ সিন্+দূর্+পি এসাদে তিনগ সিলেবল্ অর্থাৎ তিনহান মাত্রা আছে। ১৯শ উদাহরণর ১ম পারেঙর ১ম পর্বৎ ওঁ+ক্রীং+ফট্ বার ২য় পারেঙর ২য় পর্বৎ ছুঃ+ ছুঃ +ছুঃ এসাদে তিনহান করে স্বর (সিলেবল্) বা মাত্রা আছে। অথচ ছন্দপতন আছে বুলানি থক নেই। ১৮শ উদাহরণর ২য় পারেঙর ১ম পর্বর ১ম পর্বৎ কাদাকাদি দুগ রুদ্ধস্বর (সিন্+দূর্) থানাই পিছেকার অমুচ্চস্বর (দূর্) ঔগর দীর্ঘ উচ্চারণ অর। এসাদে ওঁ+ক্রীং +ফট্ বুলতে তিনগ রুদ্ধস্বর (closed syllable) অনাই পর্বহান ভরি আছে বুলিয়া ৪র্থ সিলেবল্গ দেনার প্রয়োজন নার। ছুঃ +ছুঃ+ছুঃ এরে তিনোগিরমাউ আগৎ স্বাসাঘাত পড়িয়া দীর্ঘ অইলক পুরি ১ম বা ৩য় সিলেবলর যে কোন আঁগে সিলেবল্ দুহানর কাম করিয়া চারিমাত্রা অরগা।

### পরিশিষ্ট

এ ছন্দ এহানাৎ লক্ষ করানির বিষয়হান অইলতাই স্বাসাঘাত পড়িয়া, উচ্চারণ সংকুচিত-প্রসারিত অয়া ক্ষিপ্ত চলন আহানল চলের বুলিয়া এ ছন্দ এহানাৎ কবিতার বক্তব্য হানাথৌ ছন্দর দাবীহানে নিয়াম। ঔহানল যেতা কবিতাৎ অর্থগৌরবেৎ

ছন্দচাতুর্য ঔহানে নিয়াম প্রয়োজনীয় অর্থাৎ শৌর কবিতা, ফাগির কবিতার প্রধান বাহন  
এরে ছন্দ এহান। এহানর চলন এহান স্পষ্ট বার কানহানাৎ চালাক অয়া বাজের বুলিয়া  
লৌকিক কবিতা, যেতা খতাল রচিত অর, ঔ কবিতারতা এরে ছন্দ এহান প্রধান  
অবলম্বন, ছন্দ এহানর সাধারণ রূপহান— সাধারণতঃ পারেঙহানাৎ তিনহান পূর্ণপদী  
বার আহান অপূর্ণপদী পর্ব খার প্রত্যেক পূর্ণপদী পর্বৎ চারিহান স্বর বা সিলেবল।  
প্রত্যেক পর্বৎ দুহান পর্বাস খার। এবাকা পারেঙহানাৎ পর্বসংখ্যা সমান নাথয়াউ ছন্দ  
এহানরে ব্যবহার করতারা। এসাদে অসম পর্ব ব্যবহার করেছি উদাহরণ এহানি লক্ষ  
করিক—

(২০)

গজরাজো মামা!

জনম এহান গেলগাতা তার ধর্ম কামা কামা।  
গারিগরমা সদাই আছে নামসা নুকুন কাঠি।  
শতনামহান জনম এহান খৌনু এগৎ গাঠি।  
দৌ হমাদের ঔবাকা তি মাছর যারি দিলে  
না আংকেরে— “একাকারগাই যেইতুগা মি বিলে?”  
একাদশীৎ আকদিনৌ তা চরেদে বাত নাহার।

চৈত্র মাহার

সাকলসেলে খেইল মিরামিষ;  
সাবন এতা আহিঙ্গির বিষ।  
আজিকালির ডেমা শৌতে নামানলা গৌড়িয়া  
স্বভাবহানি নিয়ামতে চৌরিয়া,—  
মিয়াঙর ঘরে চাহা পিনা; নুকুনকাঠি নেই  
মামার জিপ্ত হাবিগিরে চেই।  
মানুর ডেকি নাগৈ  
মারে বেলেও হোটেলরমা নাহেইতারা আনৈ;  
বাছতারা মাঙ সেং,  
বিদেশ বাড়ি গেছিগাতাও গারিগরমা থছি জাতর জেং।

গজর উদাহরণে হাবি পারেঙে পর্বসংখ্যা সমান নাছে।

২১শ উদাহরণ এহানৌ ঔসাদে আছে—

(২১)

আতর তারাৎ ফুলগ শাতর তোব  
মায়াহানৌ পেইলে বরনর  
শিলছে তোরি তিঙা চুলে বাদলহানর পৌ  
আনের স্মৃতির বৌ।  
তুলতুলাছে গারিগরে বেড়েরা থর এলা  
শিচুমগিতৌ খনুকহানর খেলা।

## অক্ষরবৃত্ত ছন্দ

### ১ম পর্ব

যেয়েক দিয়নে আট | পিছে দিয় ছয় ।  
 পয়ার ছন্দল হুনা | অই তুমি গই ॥  
 তিনর পিছেদে তিন | দুগ চারি অর ।  
 দুগ দিলে দ্বিগিরে | দেনাহে থকর ॥  
 জুড়া দিলে জুড়া দেনা | বেজুড়ে বেজুড় ।  
 ছন্দর সূত্রর কথা | কতিল মধুর ॥  
 অযুক্ত বর্ণর সাদে | যুক্তর মহিমা ।  
 ইচ্ছু অয়া নুঙের , নেই চানে সীমা ॥  
 দুগ তিনগ তিনগ | দেনা হবা নেই ।  
 এসাদে করিয়া অনা | মানুরাং লেই ॥  
 এতা কথা অবহেলা | তুমি নাকরিয় ।  
 তিনগ দুগ তিনগ | এসাদে না দিয় ॥

গজর পদ্য এহান পয়ারর ছন্দসূত্রহান বার উদাহরণহান । সাধারণতঃ পয়ারর পারেঙহানাং চৌদ্দমাত্রা থার । ১ম বার ২য় পারেঙে অন্ত্যমিল থার । কিন্তু পারেঙহানর মাত্রা সংখ্যাল কবিতার ছন্দ অরতা নাগৈ । পর্বগং কই মাত্রা থার ঔতাল ছন্দহান । পয়ারর পারেঙহানাং পর্ব দুগ; ১ম পর্বং ৮গ মাত্রা বার ২য় পর্বং ৬গ মাত্রা । এসাদে করে চৌদ্দ মাত্রা এহান আসলে ৮ বার ৬ মাত্রার যোগফলহান । ১ম পর্বং ৮ মাত্রাউ যেনতেন প্রকারেণ বহানি নাগৈ ।  $৩+৩+২=৮$  অথবা  $৪+৪=৮$  অথবা  $২+২+২+২=৮$  এসাদে বহানি । ৫ম পারেঙে মাতেছি জুড়া অর্থাৎ জুড়া অক্ষরর শব্দ (২,৪) দিলে পিছেদৌ জুড়া অক্ষর শব্দ দেনা । পয়লা বেজুড় অক্ষরর শব্দ দিলে পিছেদেউ বেজুড় অক্ষরর শব্দ দেনা । ঔহানে  $২+৩+৩=৮$  করে অথবা  $৩+২+৩=৮$  এসাদে দিলে ছন্দ পতন অইতৈ । এসাদে করে অক্ষর বহাছি আরো ৯ম বার ১২শ পারেঙে ঔহানি ছন্দদুষ্ট আছে । পয়ারর ছন্দং যুক্তবর্ণ বার অযুক্তবর্ণর মাত্রা সংখ্যা সমান

মাটির গোপন কথা | ফুলর কেথকে ।  
 শাতয়া জঙিল বার | এ মাটির ডকে ॥

এপেই অযুক্তবর্ণল  $৮+৬=১৪$  করেছি ।

মৃত্তিকার সঙ্গোপন | বার্তাহান কারে ।  
 পুষ্পিত লাবণ্য অয়া | দিল বারে বারে ॥

এপেই যুক্তবর্ণ ব্যবহার করিয়া ৮+৬= ১৪ করেছি দ্বিয়হানৌ পয়ারে চলের। আসলে মনেইল ঐসাদে করে পারেঙহানাৎ ১৪ মাত্রা বহেইলেই পয়ার নার কারণ চৌদ্দগ অক্ষরে পূর্ণ যতি পড়ানি ঐহান পয়ারর আসল লক্ষণহান নাগৈ। ১ম পর্বৎ আটগ বার ২য় পর্বৎ ছয়গ অক্ষর থানা ঐহানই পয়ারর রূপহান।

পাতায় ৪ নুয়া ফুল | বেড়াছে ৪ মায়াহানে | ৭+৭=১৪  
কিসাদে ৪ য়ারিহানি দিতারা ৪ কানে কানে ॥ ৭+৭=১৪

এপেই ঐ পারেঙ দ্বিয়হানাৎ ১৪হান করে মাত্রা কিন্তু মাত্রা ঐতা ১ম পর্বৎ ৭ বার ২য় পর্বতৌ ৭ করে আছে। ঐহানে এহানরে আমি পয়ার বলে নুয়ারিয়ার এসাদে ইকরলেতে-

মায়াহানে নুয়াফুল | বেড়াছে পাতারে ॥ ৮+৬=১৪  
সাজাছে যতন করে কিতার আশারে ॥ ৮+৬=১৪

পারেঙহানাৎ ৮+৬ করে মাত্রা থার। ঐহান অইলে আমি এহানরে পয়ার বলে পারিয়ার। কারণ ৭+৭ করে চৌদ্দ অইলে ঐ পারেঙ ঐহানে যুক্তাক্ষরর ভরিহান জারে নুয়ারতই যুক্তবর্ণ জারে পারানি ঐহান পয়ারর শোষণ শক্তিহান।

ফাল্লুনে পুন্নাপ করে বসন্তর রঙ  
তেল্লাম সাজেয়া দিল | তোর মেইথঙ ॥

এপেই আট-ছয় যতি বেলানিয়ে যুক্তবর্ণর আঘাত সহ্য করে পারল। কিন্তু

পল্লবে নুয়াপুন্স | করেছে আবেষ্টন।  
বুজেয়া দেছে অর্ঘ্য | পুন্নাপ করে বন ॥

এপেইতে ৮ বার ৬ এ যতি নাপড়িল থাংতে পয়ারহান নাইল ঐহানে পয়ারর শোষণশক্তির অভাবে যুক্তবর্ণর ভরহান দেনাই ছন্দহান নঙিয়া ছন্দোভঙ্গ অইলতা

নুয়া পুন্স আবেষ্টন | করেছে পল্লবে ।  
বুজেয়া পুন্নাপ করে , দেছে অর্ঘ্য বনে ॥

এখুরমতে ৮ , ৬ যতি পড়ানিয়ে পয়ার হান অইল ঐহানে ছন্দহানে যুক্তাক্ষর শোষণ করে পারল আরো ছন্দপতন নাইলতা পয়ারর শোষণ শক্তিহান বলেছিলা যুক্তবর্ণর আঘাত সহ্য করে পারানির ক্ষমতা ঐহানরে পয়ারজাতর হাবি ছন্দৎ এরে শোষণ শক্তি এহান আছে-বুলিয়া পয়ার ছন্দ এহানাৎ গাঙ্গির্ষ নিয়াম।

এখুরম পয়ার জাতর ছন্দল লঘু ত্রিপদীর সূত্রহান উল্লেখ করিয়া উদাহরণ দিক -

ছয়গ ছয়গ বহানে ঠইগ  
দিয়া পিছে আটগরে ।

ত্ৰিপদী ছন্দৰ লঘু নিয়মৰে  
ইকৰ যতন কৰে ॥

লঘু ত্ৰিপদীঃ পৰ্ব তিনহান ধাৰ—

ছয়গ ছয়গ | বহানে ঠাইগ | দিয়া পিছে আটগৰে ।

১ম বার ২য় পৰ্বঃ ৬গ কৰে মাত্ৰা বার ৩য় পৰ্বঃ ৮ গ মাত্ৰা । পৰ্বগিঃ মাত্ৰা যোজনায়  
পদ্ধতি পয়াৰৰ অনুসারী ।

কথা চুম্ভ তার দিশা চুম্ভ আর  
কৌলি পালি কিতা নেই ।  
জেলৈই মুনীয়ে অধম গুণীয়ে  
লগে অছি তার চেই ॥

(গোপীমোহন সিংহ, “মহতৰ লক্ষণ”)

অথবা,

মিশ্ৰশ্ৰীগোবিন্দ গীতাহাৰ্ণবন্ধ  
আসামী ভাষাল কৈল ।  
শাক্তী ভাক্তী টীকা চেয়া লৌরী  
বুলিয়া সাক্ষীহাইল ॥  
(ধীৰচন্দ্র চট্টোপাধ্যায়)

গজৰ উদ্ধৃতি এতা লঘু ত্ৰিপদীৰ উদাহৰণ । প্ৰত্যেকহান উদাহৰণ ৬+৬+৮ কৰে মাত্ৰা  
(অক্ষৰ) যোজনা কৰেছি । এখুৱম দীৰ্ঘ ত্ৰিপদীৰ সূত্ৰহানে উদাহৰণহানে চেইক—

নিধানক সৰস্বতী তোৰ পদে থাক মতি  
ইকৰিয়া ত্ৰিপদী ভিগল ।  
আট আট দশ দিয়া মণিপুৰী বিষ্ণুপ্ৰিয়া  
দীৰ্ঘছন্দ কৰেদে সৰল ॥  
এতা যেগ নাকৰেৰ নিয়মৰে পাহৰেৰ  
ঠাংচা থাচি জ্ঞান যেগ নেই ।  
লৈরিক জানিয়া কিতা পাকৰক ভীমগীতা  
কবিগ অয়াও অর লেই ॥  
সম্পাদকে তার পদ্য ফিৰেয়া দিতই অন্য  
মন্দভাগ্য নেই ছন্দজ্ঞান ।  
বিষ্ণুপ্ৰিয়া নায়ো পাঙ ভুল ছন্দ কাব্য মাঙ  
আৰ্যবংশ কক্ৰিয় সন্তান ॥  
পুড়ে পুড়ে হাওয়া সিটা মাত হনা কানা কিতা  
মাগানা কবিগ অয়া থানা ।



বহেছ আমার মানু                      মি অধমে নাউ জানু  
 এ জনমে নাছু মিতে কানা ॥  
 মহারাজা ভাগ্যচন্দ্র                      মাতেছিল - “হে ব্রজেন্দ্র  
 হপনেদে দিলুতা আদেশ  
 বিষ্ণুপ্রিয়া মণিপুরী                      টেপানান্ত বুড়াবুড়ি  
 ছন্দ পেয়া দুঃখ অকা শেষ ॥”

গজর দীর্ঘ ত্রিপদীর সূত্র বার রূপ এহানাৎ তিনগ করে পর্ব আছে :

আট আট দশ দিয়া | মণিপুরী বিষ্ণুপ্রিয়া | দীর্ঘছন্দ করেদে সরল ॥

১ম বার ২য় পর্বৎ ৮গ করে মাত্রা বার ৩য় পর্বৎ ১০গ মাত্রা থার । পর্বৎ মাত্রা বা অক্ষর যোজন্যর পদ্ধতি পয়ারর রীতি অনুসারী ।

আবহমান কালেৎত পুরি এরে তিনহান ছন্দোবদ্ধল কবিয়ে কবিতা ইকরিয়া আহিতারা । কিন্তু পয়ার জাতর ছন্দর পৌনঃপুনিকতা এহান অর্থাৎ নিয়মিত যতি পড়ানি এহান আধুনিক কবিরে ভৃষ্টি দেনা নুয়ারল । আধুনিক কবির আতে পয়ারর মুক্তি অইল ।

পাণ্ডব অর্জুন পার্শ্ব\* গাঙ্গীবর গিরি\*  
 মহাবাহু\* \* মণিপুর \* মণিবুজা দেশে\*  
 বিজয় ফিরালহান\* নঙেয়া আহিল;\*  
 পরাজয় কলঙ্কর গ্ৰানিহান বয়া\*\* ।

এপেই পয়ারর চিরাচরিত রীতি অনুযায়ী ১৪ অক্ষরর পিছেদে যতিহান না পড়িয়া ভাব অনুযায়ী আরাক পারেঙ আহানর হাদিৎ গিয়া (মহাবাহু—শব্দর পিছেদে) যতিহান পড়িলগা । অর্ধ বিভাগ বার ছন্দোবিভাগ পরস্পর সমান নাছে এপেই—

পাণ্ডব অর্জুন পার্শ্ব , গাঙ্গীবর গিরি মহাবাহু \*\* ॥

এসাদে করে আঠার অক্ষরর পিছেদে গিয়া যতিহান পড়েছে পারেঙহানির পিছেদে অন্ত্যমিল আছে না নেয়ছে ঔহানল ছন্দহান অছেতা নাগৈ , কারণ কবিতার অন্ত্যমিল থানা এহান ছন্দৎত তঙাল কলা কৌশল আহান ।

মৈবন্তর ধ্বনি তোর\* আমারে হজাক  
 করে দিল;\*\* গীতিস্থায়ী! \*\* আয়া দিলে ডাক\*  
 কলঙ্কয় নঙা মুর তুলানির সালে\*  
 আটেল হেজিত আমি আছিলোং কালে । \*\*

এপেই পারেঙ হানির পিছেদে অন্ত্যমিল থাইলেও প্রাচীন রীতির পয়ারহান নাগৈ; কারণ ১৪ অক্ষরর পিছেদে যতি না পড়িয়া পারেঙহান আরাকৌ ডিগল অয়া প্রবাহিত অয়া গেছেগা ।

পয়ারর এরে প্রবহমানতা এখানে ছন্দ এহানর নুয়া নুয়া দিগন্তরে উদ্ভাসিত করে দিল ।  
কবির মুণ্ডে নুয়া নুয়া সম্ভাবনার পথ নিকুলিল ।

পাণ্ডব অর্জুন পার্থ | গাণ্ডীবর গিরি মহাবাহু ॥

পয়ারর পারেঙহানরে ৮, ৬ এসাদে পর্বৎ বিভক্ত নাকরিয়া ৮ | ১০ করে ডিগল করানি  
য়াকরল ।

ফাঙ্কুর কুঞ্জবনে | কুঞ্জাবলী অছেতা হজাক; ॥

কম্পিত মালতী ডেঙে | হে অতিথি! আয়া দিলে ডাক । ॥

এখুরম পারেঙহানরে আরাকৌ ডিগল করিয়া ৮ | ৮ | ৬ মাত্রা বহানি য়াকরল ।

লাজে রাঙা অছে আজি | অশোকর নুয়াপাতা | কঙালা মঞ্জুরী,

বৌহানে বেড়েয়া থয়া | মাতের—‘গারিগ তোর | পাতালো নাওরি’ ।

পারেঙ বার স্তবকে বৈচিত্র্য সৃষ্টি করানি সম্ভব আইল ।

১ম পারেঙে ৮ | ১০ বার ২য় পারেঙে ৬ মাত্রা দেনার উদাহরণ—

মৃত্যুর তীর্থর পথে | পদযাত্রা অকরিয়া চেই; ॥

দুর্বলর সাদে ॥

নিষ্কাকার লেহে আর | মরে মরে থয়া কানা নেই ॥

নেয়য়া লেহাদে ॥

হে বীর! আইনে মুণ্ডে | হজাক করেদে হাবিহান ॥

কঠিন আঘাতে ॥

মৈবঙর ধ্বনি আন | আন বজ্র হুংকার রব ॥

নেই কিয়াকাতে? ॥

কবি চন্দ্রবদন সিংহই বিষ্ণুপ্রিয়া মণিপুরী ছন্দরে নানা পরীক্ষা নিরীক্ষাল সমৃদ্ধ করিয়া  
গেছেগা । এপেই বর্তমান ছন্দোন্নতি এহানল রচিত তার স্তবক আহান উদ্ধৃত করিক—

আহো আজি কনাকশৌ |

৮

হাবি আভা অয়া ॥

৬

কাকেই মুণ্ডেদ কারো |

৮

জয়ধ্বনি দিয়া ॥

৬

ফিরাল ধরিয়া ॥

৬

গারি ঝাকারেয়া উঠো |

৮

বলী থয়া মনে; ॥

৬

ভারত ইমার কাম |

৮

করো হাবিহানে ॥

৬

খুতাপুতি নায়া ॥

৬

(ফাগু, ৪র্থ বর্ষ ৬ষ্ঠ - ৮ম সংখ্যা)

এহান আসলে এরে রূপ এহান –

আহো আজি কনাকশৌ   হাবি অস্ত্র অয়া ॥	৮+৬= ১৪
কাকেই ঘুঙেদে কারো   জরখনি দিয়া ॥	৮+৬= ১৪
ফিরাল ধরিয়া ॥	০+৬= ৬
গারি ঝাকারেয়া উঠো বলী থায়া মনে ॥	৮+৬= ১৪
ভরত ইমার কাম   করো হাবি হানে ॥	৮+৬= ১৪
খুতাখুতি নায়া ॥	০+৬= ৬

কবি গোপীমোহন সিংহই ছন্দ এহানরে নিম্নলিখিত ভাবে ব্যবহার করেছে-

আহেদে নে গুরু	তিহে কল্পতরু
যুগে যুগে আয়া	পাপ মাফরিয়া
	উদ্ধার করলে তোর সৃষ্টি (হে) ॥

পর্বহানাং ৬গ করে অক্ষর ব্যবহার করিয়া অন্তিম পর্বগং ১০গ অক্ষর দেছে পয়ারজাতর ছন্দ এহানর আরাক বৈশিষ্ট্য আহান অইলতাই পারেঙহানার পর্বগিৎ মাত্রাসংখ্যা সমান নাইলেউ চলের। দুই অথবা দুইয়র গুণিতক যে কোন সংখ্যার (২,৪,৬,৮,১০) অক্ষরসমষ্টি পর্ব গঠন করানি যাকরের।

কুঞ্জপথ   পূর্ণিমার মিঙালে ভালছে ॥	৪ + ১০
চঞ্চল চরণে তেই   অভিসারে এপথে সাদছে ॥	৮ + ১০

১ম পারেঙে ১ম পর্বৎ ৪গ বার ২য় পর্বৎ ১০গ অক্ষর আছে অর্থাৎ ১ম পর্ব দ্বিগিৎ অক্ষর সংখ্যা সমান নাছে। এরে পথ এগ ইলয়া ইকরানি যাকবল।

পৃথিবীর আনন্দর বানী ছেয়ায় মিঙালে মায়া রচনা করিয়া  
 মোর হরু ঠইগৎ তার দান দিয়া  
 মাতেয়া গেছেগা ইচ্ছদিন।  
 হাবিগদে পাছু তার চিন।  
 এরে মুক্ত আহি দ্বিগি থয়া দিল অমৃত নির্ঝরে,  
 মোর আতে ধরে ধরে  
 ভাহেছিল নাচিনু পথেদে  
 হপন রথেদে।  
 মিতে  
 প্রতিদান দিতে দিতে  
 পাছরিয়া বিবুলা অলয়া  
 আতর বীণাগ আজি কুরাঙ আহেছু থয়া;  
 মেই সুর এবাকা মোরাং  
 তোর সুর হনিয়া এপেই বয়া থাং।

এরে কবিতা এহানাং ১ম ঔহান দীর্ঘতম পারেঙহান । ৯ম ঔহান হ্রস্বতম পারেঙহান ।  
এরে কবিতা এহানর ছন্দোলিপি করলে দেখতাড়াই দুই বার দুইয়র গুণিতক দশ পেয়া  
অক্ষর সংখ্যা ব্যবহার করেছি পর্ব আকেইহানাং । বার দুইয়র গুণিতকর বিভিন্ন দৈর্ঘ্যর  
পর্ব ব্যবহার করিয়া পারেঙহানি হংকরেছি । পারেঙহান লয়ইতেগা অন্ত্যমিল ব্যবহার  
করেছি । এসাদে সমিল অসম দৈর্ঘ্যর পারেঙ ব্যবহার করেছি পয়ারজাতর কবিতা  
আরাক আহান চেইক--

মাটির গোপন কথা ।	৮+০
হাবি আকুলতা ।	০+৬
ফুল অয়া শাতছিল   এরে বনে বনে— ॥	৮+৬
দুরেই পথর বাণী—   লাগেছিল মনে, ॥	৮+৬
গরিগদে ॥	০+৪
কঙালা পাতায় বার   নুয়া লতে ॥	৮+ ৪
কানে— ॥	০+২
কি সুর কিগই জানে ॥	৮+০
বারে বারে আয়া ॥	০+৬
মাতাছিল ইচুদিন থায়া ॥	৮+০

মিল দিয়া অথবা নাদিয়া এসাদে অসম দৈর্ঘ্যর পর্ব দিয়া পারেঙ ইকরানি যাকরের পয়ার  
জাতর ছন্দল । পর্বৎ অক্ষর যোজনা সর্বদা পয়ারর অনুগামী অইতই । পয়লা সূত্রহানাং  
পর্বৎ অক্ষর যোজনায় যে নিয়মহানির উল্লেখ করেছিলাং ঔহানির ব্যতিক্রম করলে  
ছন্দপতন অইতই । গজর উদাহরণ এহানাং শিচ্চিল নাগৈ পয়ার জাতর ছন্দৎ অক্ষর  
যোজনায় রীতি যেপেই লঙ্ঘন করেছি ঔপেই ছন্দদুষ্ট আছে । কারণ, এরে ছন্দ এহান  
অক্ষরর গজে নির্ভরশীল অইলেরগায়ো অক্ষর সংখ্যার সমতার গজে নাগৈ পর্বগঠনর  
রীতির গজে নির্ভর করে । পর্বগৎ অক্ষর যোজনায় নিয়মর ব্যতিক্রম অইলে ছন্দপতন  
অইতই । বিষ্ণুপ্রিয়া মণিপুরী কবিতাং পয়ার জাতর ছন্দ ব্যবহার করেছি ঔতাৎত  
ছন্দদুষ্টতার উদাহরণ বাহ্য নিংকরিয়া নাদলাং । লক্ষ করানির বিষয়হান বর্তমান  
আলোচনা এহানর প্রথম সূত্র ঔহানাং যে যে ছন্দদুষ্টতার উদাহরণ উল্লেখ করেছি  
(২+৩+৩ বার ৩+২+৩) ঔতা যেপেই ব্যবহার করলৌ ছন্দপতন অইতই । গজর  
উদ্ধৃতি এহানাং -‘কথা গোপন মাটির’ অথবা ‘মাটির কথা গোপন’ বুললে ছন্দপতন  
অইতই । পয়ারজাতর ছন্দর আরাক গুণ আহান অইলতাই যতি ঔহান ভাবর অনুযায়ী  
অনায় কথ্যছন্দর নাটকীয়তা আনানি যাকরের । পয়াররীতির অসমদৈর্ঘ্যর পারেঙ  
ব্যবহার করিয়া কাব্যনাটকে ছন্দ এহানর বহুল ব্যবহার আছে । ঔহানর উদাহরণ  
আহান দেনা যাকরের ।

বক্রবাহন :	মি বক্রবাহন	৬+০
	চিত্রাঙ্গদা, গন্ধর্বর সিজা,	১০+০
	তেই ইমা মোর ।	০+৬
	হে বীর পাণ্ডব পার্থ!	৮+০
	ইচুদিন তোর কীর্তি হুনেছিলু কানে! ॥	৮+৬
	আছিল দেখি আজি ।	৮+০
	অবলার বল খতাহান ;	১০
	বীরর পাঙ্কালহান   জুহানাং নাথার অর্জুন ।	৮+১০
অর্জুন :	সাধু! সাধু!	২+২
	পাণ্ডব ধনুর গিরি   অর্জুনের মুণ্ডে	৮+৬
	যুদ্ধর সালেদে তিতে   উবা অয়া	৮+৪
	বীরত্বর পরিচয় দিলে!	৮+০
	তোরে মোর সাধুবাদ ।	৮+০
	যজ্ঞর গরাগ আন ;	৮+০
	কঙালা ফুলর সাদে   কনাক কিশোর ।	৮+৬
	মালকর উরে বয়া   যজ্ঞর কুমেই চানা	৮+৮
	দিলুতা বার্তন ;	০+৬
বক্রবাহন :	চিত্রাঙ্গদা ইমার পুতকে	১০
	ধরেছে গরাগ দেনা!   ঠইগ নাদিয়া?	৮+৬
	অসম্ভব হে অর্জুন!	৮+০
	জীবন এহানে বার   গরাগ তোরাং	৮+৬
	দেনার সঙ্কল্প মোর ।	৮
	কিন্তু আজি কনাকর আতে	১০
	কুরুক্ষেত্র সময় বিজয়ী   চতুর পাণ্ডব!	১০+৬
	পাণ্ডবর কীর্তিনাশা   এরে মণিপুরে	৮+৬
	বীরত্বর প্রবল পাঙ্কালে ।	৮
	বিজয়ী নিরালে আজি   কলঙ্কর সাকা লাগাদিঙ ॥	৮+১০

এরে ছন্দরীতি এহান কথা উচ্চারণর কাদাকাতি, কারণ পর্বগর যে কোন কামে ২, ৪, ৬, ৮ বা ১০ মাত্রার পিছেদে যতি বহানি যাকরের বার পর্বর মাত্রা সংখ্যাউ সমান নাগৈ ঔহানে নাটকর ছন্দহান হিসাবে ছন্দ এহান চলিয়া আহেছে। ঔতার গজে যুক্তবর্ণর আঘাত সহ্য করানি পারের বুজিয়া গান্ধীর্ষ রক্ষা করানি সম্ভব বার সংস্কৃত শব্দর ব্যবহার করিয়া ছন্দ এহানরে আরাকৌ শক্তিশালী করানি যাকরের।

গজর আলোচনা এহানাং নুয়া শিক্ষার্থীর সালেদে সহজ নিয়ম কতহান ইকরলাং। কিন্তু অক্ষরর গজে পৃথিবীর কোন ভাষার ছন্দো নির্ভর নাকরের। বিষ্ণুপ্রিয়া মণিপুরী ভাষাহান

রোমান অক্ষরল ইকরলেতে মাত্রা কিসাদে লেহেইতাঙাই? কোন ছান্দসিকেউ অক্ষরল মাত্রা লেহানি এহান স্বীকার নাকরতারা। ছন্দ এহানাং মাত্রা লেহানির অন্য পদ্ধতি আছে বার ঔহানর নানান বিতর্ক আছে।

বর্তমান আলোচনাং কোন বিতর্কর উল্লেখ নাকরলাং। ভবিষ্যতে বিতর্ক ঔহানর বিস্তৃত আলোচনা করতাঙাই। কিন্তু এবাকা ঔতাল আলোচনা করলে প্রাথমিক শিক্ষার্থীয়ে খানি অসুবিধাং পড়তাই আরো ঔহানাংত বিরত থাইলাং।

(প্রতিশ্রুতি, কার্তিক ১৩৮০ বাংলা)

## অক্ষরবৃত্ত ছন্দর বিতর্ক আহান

“মিঙালে সাজেয়া দিলে    এ বিয়ানে কোন কথা হানি  
আধার আহিৎ দিলে    |    অনিয়া কিসাদে নুয়া বাণী ॥  
মালতীর ডেঙে ডেঙে    |    কি এলা বানেয়া  
বাগেদিলে যুমহান কুড়িরে জানেয়া  
কিসাদে রচিয়া সুর    |    তোর লগে কথাও মাতানি ॥  
ছনার কুপাও বুজে    |    তোর সালে আনেছু বকুল  
তি আয়া নিজর আতে    |    বানাপেয়া আগ দুগ তুল ॥  
তোর মাটিকর দান    |    মোরাং নেয়ছে  
তোর সাজে আর হাবি    |    কতিও পেয়ছে  
তি নিজে না মিলা দিলে    |    তোর সুরে কিসাদে মিলানি ॥”

এহান তথাকথিত অক্ষরবৃত্ত রীতিল রচনা করেছি এলাহান। ১ম, ২য়, ৫ম, ৬ষ্ঠ, ৭ম, ১০ম পারেঙে ৮+১০, বার ৩য়, ৪র্থ, ৮ম, ৯ম পারেঙে ৮+৬ করে অক্ষর আছে। গণিতর হিসাবে ভুল নেয়ছে কারণ ২ অথবা ২য়র গুণিতক অক্ষরসংখ্যা থানা ঔহান অক্ষরবৃত্তর নিয়মহান। ঔসাদে অক্ষরল হিসাব করলে

“মাতানি মনাছু কথা পাছবেছু হাবি”

পয়ারর পারেঙহান।

“চঞ্চল বসন্ত বনে আহিলে অতিথি”

এহানৌ পয়ারর পারেঙহান। কারণ পারেঙে দিয়হানাতৌ ১৪গ করে অক্ষর আছে।

কিন্তু সমস্যাহান উপস্থিত অর কারণহান অক্ষরর সংজ্ঞা ঔহান নির্দিষ্ট নাই। কিগরে অক্ষরগ বলিয়ারতা? ‘খুৎতল’— কথা এহানাৎ দৃশ্যমান ৪গ অক্ষর, খুৎতল— ইকরলে ৩গ অক্ষর, বার রোমান মেয়েকল KHUTTAL ইকরলে ৭গ অক্ষর ঔসাদে অইলেতে ১৪গ অক্ষর বুলতে কিহান হারপেইতাঙাই। তৎসম শব্দ ইকরানির পদ্ধতি নির্দিষ্ট। কিন্তু তদ্ভব বা বিষ্ণুপ্রিয়া মণিপুরী শব্দ আগ লেখকর ইচ্ছাহানল বানানহান নির্দিষ্ট অর ঔপেই সমস্যাহান ডাঙর অর। এরে সমস্যা এহানাৎত মুক্তির পথগ কুরাং বিসারানি?

পুরানা যুক্তিআহান উত্থাপন করিয়া মাতানি যাকরের, কানল ছনিয়া হিসাব করানির পথ আগ বিসারানি। অক্ষর কথা এহান ব্যবহার না করিয়া, সিলেবল হিসাব করলে পথগ সহজ অর। ‘চঞ্চল’ কথা এহানাৎ তিনগ অক্ষর আছে নাবুলিয়া (চন্- চল) দুগ সিলেবল আছে বুলিক। ঔহান অইলে CHANCHAL, চঞ্চল অথবা চন্চল যেসাদৌ ইকরিক ৩গ সিলেবল পেইতাঙাই। ব, সন্, ত,- বসন্ত, BASANTA— অক্ষর নাই, সিলেবল তিনগ আছে। খুৎতল— শব্দং দুগ সিলেবল পেয়ার।

মুক্ত সিলেবল (open syllable) বা স্বরান্ত সিলেবল মাত্রা আহান, অমুক্ত সিলেবল (closed syllable) বা হসন্ত সিলেবল শব্দগর হাদিৎ থাইলে মাত্রা আহান, বার শব্দগ লয়ইতেগা থাইলে মাত্রা দুহান লেহানি ।

খুৎতল আনিয়া আজি পূর্ণ করে বরণ করক

এপেই খুৎ— মাত্রা আহান, তল্— মাত্রা দুহান, পুর— মাত্রা আহান, রণ— মাত্রা দুহান, রক্— মাত্রা দুহান । এসাদে করে সিলেবলর হিসাব করলে হসন্তমধ্য শব্দর সমস্যাৎত মুক্তি পানা যাকরের । অক্ষর লেহানির অসুবিধা ঔহান এসাদে করে দূরেই করানি যাকরের ।

লেহাও খুৎতল লছে পুন্নিং বুজিয়া

অথবা,

লেহাও খুৎতল লছে পুন্নিং বুজিয়া

দ্বিয়হানো ইকরানি যাকরের দৃশ্যমান অক্ষর সংখ্যার অসামঞ্জস্য থাইলেউ কবি আগৈ দ্বিধাহীন অনা পারের ।

অংতা লাক্তা সাক্তা চেয়া হারপাছে গিরকে  
তুক্তা খউরা মুক্তা সিং আছে টাটি ভকে ॥

ইকরাতা না—

অংতা লাক্তা সাক্তা চেয়া হারপাছে গিরকে  
তুক্তা খৌরা মুক্তা সিং আছে টাটি ভকে ॥

খালকরিয়া সমস্যায় নাপড়তই । হাবি সমস্যার সমাধান অইতই ।

হুতুমেউ অইতইতা ? হসন্তমধ্য শব্দরে ডাঙর ডাঙর ছন্দবোধসম্পন্ন কবিয়ে যেবাকা মাত্রা দুহান ধরতারা ঔবাকা আমি আরাক নুয়া সমস্যা আহানাৎ পড়িয়ার । কবি চন্দ্রবদন সিংহই—

কনাক কঙালা গারি | মন তুলতুলা ॥

বুলিয়া ইকরলে কিহান মাতানি? ছন্দ তুল করেছে! না স্বাধীনতা নেছেগাতা! তুলতুলার তুল্ এগ আলাদা তঙাল শব্দগ না তুলতুলা শব্দর হসন্তমধ্য সিলেবল্গ! অথবা —

আহো হাবি কনাকশৌ হাবি আক্তা অয়া (চন্দ্রবদন)

কনাকশৌ— কইগ শব্দ? 'কনাক— শৌ' দুগ শব্দ, না কনাকশৌ আক্গ শব্দ? প্রশ্ন হান থাইল মাহেইতে কবি আগৈ শব্দ আগ অথবা দুগ ধরিয়া সুযোগ ঔহান লইতই ।

মাযার্থরে থায়া তত্তুরে ভাবিয়া (ধীরচন্দ্র)



সুযোগহান আছে বুলিয়া কবিয়ে এপেই 'মায়া'র ঘরে' কথা এহানরে শব্দ আগ হিসাবে ব্যবহার করেছে। এহানরে চরম দৃষ্টান্তহান বুলিয়া গ্রহণ করানি যাকরের।

প্রবন্ধহান অকরতে উদ্ধৃত করেছি এলা ঔহানর ঔর্ধ্ব পারেঙে আছে 'ঘুমহান' শব্দ ঔগর ঘুম সিলেবল্ ঔগরে মাত্রা দুহান ধরেছি। ব্যাকরণর নিয়ম অনুযায়ী প্রত্যয়গরে তঙাল শব্দ আগ ধরে নুয়ারিয়ার অর্থাৎ 'ঘুমহান' শব্দ দুগ নাগৈ শব্দ আগ। ঔহান অইলেতে শব্দগর হাদির অমুক্ত সিলেবল্গরে মাত্রা আহান ধরানির নিয়ম ঔহান ঠিক নাখাইল।

- ১। ফুলেৎত নুয়া ফুলে গেলগা বুলিয়া
- ২। খুৎতল আননে আজি, আন নুয়া পৌ।
- ৩। অউরে আহিল রাতি আধারে বাহিয়া
- ৪। ঔরে তোর মায়াহান শিলছে বনেদে।

এসাদে পারেঙ এতারে কিতা বুলতাং ? গোজামিল! 'ফুলেৎত' বুলতে শব্দর হাদির হসন্ত সিলেবল্ ঔগ অর্থাৎ অমুক্ত স্বর 'লেৎ'— মাত্রা দুহান। পিছেকার পারেঙে 'খুৎ'

মাত্রা আহান। 'অউরে' মাত্রা তিনহান, কিন্তু 'ঔরে' মাত্রা দুহান। এসাদে করে কোন নিয়মর অনুবর্তী নায়া কবিগর সুবিধা অনুযায়ী 'সংকুচিত-প্রসারিত' উচ্চারণর নির্দেশ দিয়া ইকরলে ঔ স্বেচ্ছাচারিতা ঔহানরে স্বলনহান বুলতাং না নিরঙ্কুশ কবিগর স্বাধীনতাহান বুলিয়া স্বীকার করতাং। স্বাধীনতাহান বুলিয়া যাকরলে ঔ স্বাধীনতা ঔহানর সীমাগ থাইতইতা! কবিগর স্বাধীনতা ঔহান অকবিগর বিশৃঙ্খলার কৈফংহান অইতই। অর্থাৎ ছন্দহান অনিয়মর উৎপাত আহান— নিরূপিত নাগৈ ব্যক্তিগতহান বুলিয়া নিংকরাং পড়িয়ার। আপাত অনিয়ম আহানর হাদিৎত নিয়ম আহান বিসারেয়া পানা ঔহান বৈজ্ঞানিক আগর; বৈয়াকরণ আগর; ছান্দসিক আগর দায়িত্বহান।

কবি আগই কানহান সাক্ষী থয়া মাৎতই কথা ঔহান ছান্দসিকে কিসাদে যাকরতাইতা! কানহানাং নুংশি লাগলে— ছনতে নুঙেই লাগলে ঔহানরে শুদ্ধহান, চুমহান বুলিয়া গ্রহণ করানি থকর। ছন্দর নিয়ম ঔহান কবি আগৈ সৃষ্টি করেছেহান, ঔহান কবিগর শাসনহান ঔপেই কবিগর কথাহানেই লয়ইলগা কথাহান।

শব্দগর হাদির হসন্ত বর্ণ ঔগরে মাত্রা আগ লেহানি মনেইলে কবিগই খেইকরিয়া দেহেইতই (ফুলেৎত)। কিন্তু ঔহান মাত্রা দুগ লেহানি মনেইলে বর্ণগি যুক্ত করিয়া দেহেইতই (ফুলেত্ত)। কবিগর অভিরুচিহান, কবিগর কামনাহান হারপেয়া পাঠকগৈ ঔসাদে পাকরতই অর্থাৎ পাঠকগৈ কবির অভিপ্রায়হানরে অনুসরণ করানি।

ছান্দসিকর প্রশ্নহান ঔহান অইলেতে, নিয়ম আহান শৃঙ্খলা আহান নাথার, কবির কানহানে পাঠকর কানহানে আকতা নাইলে হাবি সময় পাঠকরে লাল বুলানি ঔহান সুবিচারহান নাগৈ। ঔতার গজে, এসাদে ছন্দর স্বাভাবিক উচ্চারণ পদ্ধতির, কথ্যবীতির

গজে অত্যাচার করতে হাবি পাঠকে যাকরতাই বুলানি ঔহান দুরাশাহান। ছন্দর নিরূপিত নিয়ম ঔহান না মানের কবি ঔগ অক্ষমগ, বার পাঠকরাং অন্যায় দাবী আহান করেৱতা। এহানরে হাবিসময় ছন্দপতনর নিদর্শন বুলিয়া গ্রহণ করানি থকর। এরে বিতর্ক এহানাং কাৱে যাকরতাং কবিগৱে না ছান্দসিকগৱে। ব্যাকরণর চিরাছি সমান মসৃণ তজ্জা, না কবিগৱ সামঞ্জস্যহীন পাতা লত ডেঙপাল ফুল্ল বুজেছে গাছজার? কবি আগর পক্ষপাত কবি আগর প্রতি কিন্তু ঔ কবি ঔগে নিজে নিজর কবিকৃতির জবাব দিতই ঔপেইতে ছান্দসিকগ নাই! ঔপেই তর্কং নাগিয়া পাঠকৱে সাক্ষীথনা? ছান্দসিক ঔগৎত জিঙে ছন্দর হবা বোদ্ধা পাঠক আরতা আছিতা?

কবি বার ছান্দসিকর এৱে বিরোধ এহানরে আমি কবি আগর ছন্দসতর্ক পদক্ষেপ হানি বুলে পারিয়ার। অর্থাং ছান্দসিকর নিয়মেংত মুক্তি আহান, শিল্পী আগর স্বেচ্ছাচার ঔহান সময় সময়ে দিকৃত অইলৈৱগায়ো ভবিষ্যতর নুয়া পথ আগর ইঙ্গিতহান বুলিয়া গ্রহণ করে পারিয়ার। ধীরচন্দ্র চট্টোপাধ্যায়র অতি সংক্ষিপ্ত গীতার মঙ্গলাচরণ ঔহান, চন্দ্রবদন সিংহর কবিতাবলীং, গোপীমোহন সিংহর কবিতাং এসাদে বিস্তৃত ছন্দর নিয়মেংত ব্যতিক্রম ঔতারে অর্ধমনস্ক স্বলন বুলিয়া না নিংকরিয়া অক্ষরবৃত্ত ছন্দর নুয়া পথ আগ, নুয়া মিঙাল আহান বুলিয়া গ্রহণ করে পারিয়ার। তানুর ছন্দ ঔতা সতর্ক, মনস্ক, অনুশীলন বুলিয়া খালকরিয়া ঔ ইঙ্গিত ঔগ যাকরলে সম্ভবতঃ নুয়া দিগন্ত আহান উদ্ভাসিত অইতই; বিষ্ণুপ্রিয়া মণিপুরী ছন্দর জন্মাত্তর আহান অইতই।

এপেই সামান্য পরিশিষ্ট আহান যোগ করানি যাকরব। বিষ্ণুপ্রিয়া মণিপুরী অক্ষরবৃত্ত ছন্দর নিরূপিত রূপ ঔহান এবাকাউ হবাকরে প্রতিষ্ঠিত নাছে। অর্থাং বাংলাং যেসাদে ছন্দ বুলতে পয়ার ত্রিপদী বুলিয়া হারপেইলা ঔসাদে অবস্থা ঔহান আমাৱাং নাহেছে। ঔহানে এবাকা আমাৱতা নিয়ম আহানর অধীনে থানা নিয়াম দরকার।

দক্ষ কবি আগৈ চুলর থংহানর গজে আটিয়া যানা পারের। ঔহান হাবিয়ে নুয়ারতাই। অপটু শিল্পী আগৈ স্বাধীনতা নিলেগা ঔহান অরাজকতাং পর্যবাসিত অনার সম্ভাবনা নিয়াম।

## অন্ত্যমিল

আমার ভাষাৎ বার আবার পরিচিত অন্যান্য ভাষাৎ পদ্যর অন্ত্যমিল (rhyme) এহান পদ্যর স্বাভাবিক অঙ্গহান। কিন্তু সংস্কৃতৎ সাধারণতঃ অন্ত্যমিল নাধার অন্ত্যমিল এহানরে অন্ত্যানুপ্রাস বুলিয়া তত্তাল শব্দালংকারহান হিসাবে নির্দেশ করেছি অন্ত্যমিল এহান ধনি সৃষ্টির উপায় আহান।

কালো চুলে  
রাঙা ফুলে  
হপনর রঙ।

এপেই আহিল দেহিয়ারতা তিনহান পারেঙ আছে। ১ম বার ২য় পারেঙর লয়নির শব্দগি 'চুলে' বার 'ফুলে'র মিল বা শ্রুতিসাম্য আছে। কিন্তু এহান আসলে অন্ত্যমিল বা অন্ত্যানুপ্রাস নাগৈ। কারণ এপেই ছত্ৰমেতে পারেঙ আক্হান আছে বুলিয়া ছন্দহানে মাতের। পারেঙহান বাগিয়া ইকরিয়া মধ্যমিল ঔহানি পাঠকর আহিগৎ বেলাদেহিতা।

কালো চুলে রাঙা ফুলে হপনর রঙ  
আহিগৎ আছে বুজে এমাটিক মঙ ॥

এখুরুমেতে পারেঙ (পংক্তি বা চরণ) দুহান আইল। চরণ দ্বয়হান লয়নির 'রঙ' বারো 'মঙ' শব্দদ্বয়গির মিল বা শ্রুতিসাম্য আছে। এহানরে আমি অন্ত্যমিল বা অন্ত্যানুপ্রাস বুলে পারিয়ার।

ইমা ইমা তোর মহিমা কিতা মাৎতু শৌগ মি (গীতিস্বামী)

এরে পারেঙ এহানাতেই মিল যেহানি আছে (নিম্নরেখ শব্দগুণি লক্ষ্য করিক) ঔহানি মধ্য মিলহানি।

কবিতাৎ মধ্যমিল দেনা বাধ্যতামূলক নাগৈ। কিন্তু অন্ত্যমিল ব্যবহার করানি এহান সাধারণ বিধিহান। বার নিয়ম কতহান পালন করানি লাগের অবশ্য আজিকালি অন্ত্যমিল বর্জন করানির দৃষ্টান্তেই নিয়াম অয়া আছে।

আয় তিতে মোর হাওনে ধলেশ্বরী।  
তোর তিঙা চুলে সমুদ্র হাতহান।  
তোর আহিগৎ হাওনর মেঘমালা  
তোর গাব্বিগৌ মিঙালে হিরন্যায়,  
জনমে জনমে তিতে মোর খৌরাঙ,  
দিয় আতল তি কলকর আয়ুহান

গজর কবিতাংশ এহান ৬ মাত্রার মাত্রাবৃত্তহান (৬+৬+২) নিখুত ছন্দর কবিতাহান আইলেরগায়ো অন্ত্যমিল বর্জন করেছি। এসাদে মিলবর্জনের দৃষ্টান্ত আমার ভাষাৎ বার

অন্যান্য ভাষাং আছে। অবশ্য সাধারণ নিয়মহান কবিতাং অন্ত্যমিল থানা থকর। বার অন্ত্যমিল দেনার পারদর্শিতা অর্জন করিয়া পিছেদে মিল বর্জন করানি থকর।  
আমার ঠারর পৌরেই কিতাং, লৌকিক কবিতাং অন্ত্যমিল বার মধ্যমিলর দৃষ্টান্ত নিয়াম অয়া আছে। তলর পৌরেই এহানির অন্ত্যমিল লক্ষ করিক—

সেই দেখলে সেই | মেই দেখলে মেই ॥  
থতাই মাথক | কামে আলথক ॥  
দেখলে গিদেই | নাদেখলে দশেই ॥  
শৌভে শৌ | পাথারি গান্তর দৌ।

পৌরেইরমা মধ্যমিলর দৃষ্টান্তই আছে। তলর পৌরেই এহানিং মধ্যমিলর প্রবণতা ঔহান দেহিয়ার।

অঙার বার নঙারাং সেচানি ॥  
জির গজে ঘি ডালানি ॥  
ঝেরর জি বেড়ে লাগানি ॥  
এরেছে টেইপাং উড়াহে বুল ॥

লৌকিক কবিতাং অন্ত্যমিলর দৃষ্টান্ত পেয়ার।

অ বাইরে নিংতারাগা  
মনর শিখু খেইতারাগা।  
অ বাইরে নিংতারাগা  
বেকুরী জারিং টাংতারাগা ॥  
হজকুলিগৌ কদমলতা  
পান পানুতা পানুতা গিদেইলতা খেলতা ॥

খানি পুরানা কবিতাং মধ্য বার অন্ত্যমিলর উদাহরণ এসাদে আছে—

আহান নাগৈ দুহান নাগৈ জ্বালার গজে জ্বালা  
এতা হাবি জ্বালাংততে মরানিয়ে বালা ॥ (এলা)  
রুকর মাজে বনাক  
কুটুমর মাজে মামাক  
জিলক দিয়া পেইল জাঙাক  
ছনাক পূর্ণিমার জোনাক।  
জিপুত নাতি নাতল হাবি কনাক কনাক ॥

(আমুসেনা সিংহ)

এবাকাতে পাঠকে অন্ত্যমিল বিষয় এহান হারপাথাইবাং, কবিতার অন্ত্যমিল অইলতাই কবিতার চরণহানির লয়ছেগা শব্দ ঔগির শ্রুতিসাম্য বা মিল ঔহান।

খাল পারর | কাঙ,

যেইতেগাতে | আকতা অয়া আলইতে ঠাং ঠাং ।

(মদনমোহন মুখোপাধ্যায়)

লক্ষ্য করিয়া চাইক ১ম বার ২য় পারেঙর লয়ইলগা শব্দগুণি সিলেবল্ (syllable) আকেইগির শব্দগি (কাঙ, ঠাং) শব্দ দ্বয়গির ১ম বর্ণর স্বরধ্বনি (আ) বার ২য় বর্ণর ব্যঞ্জন ধ্বনির (ঙ) শ্রুতিসাম্য আছে

আলাপক আগরতা কইহান ঠেং ।

খুমকর কিয়া খাঙ চার রেং রেং ॥

এপেই প্রথম পারেঙর শেষ শব্দগ (ঠেং) বার ২য় পারেঙর শেষ শব্দগ (রেং) সিলেবল্ আগরগ । শব্দগির ১ম স্বরধ্বনি (এ) বার ২য় ব্যঞ্জনধ্বনির (ং) শ্রুতিসাম্য আছে । অর্থাৎ শেষ শব্দগ সিলেবল্ আকেইগিরগি অইলে শব্দগর ১ম স্বর বার ২য় ব্যঞ্জনর সম্পূর্ণ শ্রুতিসাম্য থানা থকর

এখুরুম সিলেবল্ আগর আরাক অন্ত্যমিল জাত আহানর দৃষ্টান্ত ।

গেদাই মাতের গেদি চা ।

রাধলু মেঠেল এহান খা ॥

এপেইয়ো লয়নির শব্দ গুণি (চা, খা) সিলেবল্ আকেইগির শব্দগি এপেইতে ব্যঞ্জনবর্ণগির (চ্, খ) মিল নাদিয়া স্বরধ্বনি ঔহানির (আ) শিচ্চিল মিল দেছি ।

সিলেবল্ আগর অন্ত্যমিল দেনার সাধারণ নিয়মহান অইলতাই

(ক) অন্ত্য সিলেবল্ ঔগ হসন্তগ অইলে (ঠেং রেং) স্বরবর্ণ বার পিছেকার ব্যঞ্জনবর্ণ (আশ্রিত ব্যঞ্জনবর্ণ) ঔগির মিল দেনা ।

যথাঃ— এং— এং

(খ) অন্ত্য সিলেবল্গ স্বরান্তগ অইলে (চা—খা) লয়ইলগা স্বর ঔগিরতা শিচ্চিল মিলাদেনা ।

যথাঃ— আ— আ

কৃষ্ণর আতে তিনগ লারৌ ।

পিদেছেতা দুগাছ খারৌ ॥

গজ্জর উদাহরণ এহানর অন্ত্যশব্দগির সিলেবল্ সংখ্যা দুগ (লা— রৌ বার খা রৌ) ১ম সিলেবল্গর স্বরধ্বনি (আ) বার পিছেকার সিলেবল্গর স্বর ব্যঞ্জনধ্বনির (রৌ) মিল আছে এতারে পূর্ণ মিল বুলানি থক

মাইর মাপাং যৌকরিয়া হবা করে বাজিং,

বাজারেংত আনগা লয়া সিকি আগর খাজিং ।

এহানৌ সিলেবল্ দুহানর অন্ত্যমিল। এপেই ১ম সিলেবলর স্বরধ্বনি (আ) বার  
পিছেকার সিলেবলর যথাক্রমে ব্যঞ্জন (জ) স্বর (ই) ব্যঞ্জন (ং) ধ্বনির মিল আছে।

মেংশেল চেয়া চেয়া লক্ষী  
মাদানেদে অইরিতা গুক্ষি।

এপেই ১ম সিলেবলর স্বরধ্বনি (অ) বার যথাক্রমে পিছেকার সিলেবলর ব্যঞ্জন (ক্ষ)  
বার স্বরধ্বনির (ই) মিল আছে।

গুয়া খেইলে যৌকরিয়া নিয়াম করে তুজা  
মুরে ধরিল আরো তিতে পড়লে তাকো বুজা।

এপেইউ ১ম সিলেবলর স্বরধ্বনি (উ) বার যথাক্রমে পিছেকার ব্যঞ্জন (জ) বার  
স্বরধ্বনির (আ) মিল আছে।

এখুরম দুগ সিলেবলর মিল আহান লক্ষ করিয়া চেইক—

মোর কপালে আছেতা মরণ,  
মিকুপ আহান নাপাছু জিরন।

এপেইতে অন্ত্যশব্দগিৎ দুগ করে সিলেবল্ আছে। ২য় সিলেবলে ‘রণ’ ঔহানর মিল  
আছে কিন্তু ১ম সিলেবলে ১ম পারেঙে (ম) অ স্বরধ্বনি পিছেকার পারেঙর স্বরধ্বনিহান  
(জ) ই। অর্থাৎ ১ম সিলেবলর স্বরধ্বনির সাম্য নেয়ছে। ঔহানল্ এহানরে দুর্বল বা  
অপূর্ণ মিল বুলানি থকর।

কবিতাৎ মধ্যমিলে এসাদে দুর্বলতা কোন কোন ফামে দেনা যাকরলেউ অন্ত্যমিল কোন  
সময়ৌ এসাদে অন্য উচিত নেই।

পছরি পারর মালতী জারর কঙালা পাতার সাদে।

এপেই পারর-জারর- শুদ্ধ মধ্যমিল। কিন্তু জারর পাতার দুর্বল মধ্যমিল।

কৌলি করের ঔলি জৌলি খেয়া চৌলি বাত।

এপেইতে মধ্যমিলর কোন দুর্বলতা নেই।

লয়ছে—খামছে, প্রাণ—মন, নঙা—ডাঙা, দেখল দিল, এতা দুর্বল মিলর উদাহরণ।  
মধ্যমিলে কোন সময় চল্লেরগায়ো অন্ত্যমিলে এসাদে এতা বর্জন করানি থকর। অবশ্য  
এসাদে মিলর দৃষ্টান্ত কোন কোন সময় ডাঙর কবিরাজৌ পেয়ার।

মোর কপালে আহক মরণ  
লয়ইতেগা পেইংগা চরণ।

এহানাৎ ১ম সিলেবলৰ স্বৰধ্বনি (অ) বার পিছেকার যথাক্রমে ব্যঞ্জন (র) স্বৰ (অ) বার ব্যঞ্জন (ন) ধ্বনি মিল আছে বুলিয়া এহানরে সিলেবল দুগৰ পূৰ্ণমিলৰ উদাহরণ বুলানি থকব

যেতা আছে সেলকম হাবি দিলু পুত্ৰাপ,  
চাম্ফুতে চিনিখানি দিয়াদিছ হেইরাপ ।

এহান সিলেবল দুগৰ অপূৰ্ণ মিলহান

লক্ষীয়ে কাকালিৎ বাদেছেতা সুরানি  
হৌবকে ঔহান মনরতা গুরানি ।

এপেই লয়নির শব্দঔগিরতা সিলেবল তিনহান ১ম সিলেবলৰ স্বৰধ্বনি (উ), ২য় সিলেবলৰ স্বৰব্যঞ্জন (রা) বার ৩য় সিলেবলৰ স্বৰব্যঞ্জন (নি) যথাক্রমে মিলেছে ঔহানল এহানরে তিন সিলেবলৰ পূৰ্ণমিল বুলানি থকব

খাম্বাতলে বিয়ার দিনে আনেছিলতা খুচাপি ।  
কুরাংত থাৎ বিছারেয়া খলেই আহান ঙাচুপি ॥

এপেই অন্ত্যশব্দগরতা সিলেবল তিনহান । কিন্তু ১ম সিলেবলৰ স্বৰধ্বনি পারেঙ দিয়হানাৎ তঙাল (খ+উ, ঙ্+আ), ২য় সিলেবলে ঔ তঙাল (চ+আ, চ+উ) মাত্ৰা ৩য় সিলেবলে স্বৰব্যঞ্জন ধ্বনি মিলেছেতা এহানতে তিন সিলেবলৰ অন্তক মিলৰ নিদর্শন

খাম্বাতলে বিয়ার দিনে আনেছিলতা খুচাপি  
কইনাগতে নাপেইলগা পেইল আগ হিন্চাপি ॥

এপেইতে ১ম সিলেবলে (খু বারো হিন) না মিলেছে । কিন্তু ২য় বার ৩য় সিলেবলে শ্রুতিসাম্য আছে । তিনগ সিলেবলরমা লয়নির দ্বয়গি (চাপি) শিচ্চিল মিলেছে এহানরে তিন সিলেবলৰ অপূৰ্ণ মিল বলে পারিয়ার ।

খাম্বাতলে বিয়ার দিনে আনেছিলতা খুচাপি  
কইনা ঔগৈ রাধানিরকা দ্বিকুড়িগ উকাপি ।

এপেইতে ১ম সিলেবলৰ স্বৰধ্বনি (উ), ২য় সিলেবলৰ স্বৰধ্বনি (আ) বার ৩য় সিলেবলৰ স্বৰব্যঞ্জনৰ শ্রুতিসাম্য আছে । অইলৌ এহানরে পূৰ্ণমিলৰ উদাহরণ বলে নুয়ারিয়ার ।

মোর আতে ইচুদিন খেয়া হবা চাকচা  
বুড়া কালে আজি তিতে কররতা লাকচা ।

এহানতে পূৰ্ণ মিলৰ উদাহরণহান

সাধারণতঃ লক্ষ করানি থকব মিলহান সম্পূৰ্ণ সম্পর্কহীন শব্দ দুগৰ অপ্রত্যাশিত শ্রুতিসাম্য অনা উচিৎ ঔহান অর্থাৎ পিছেকার পারেঙহানাৎ কি শব্দগল মিল দেখি

ঔহান পারেঔহান লয়নির আগে পাঠকে কল্পনাউ করে নুয়ারানি । অন্ত্যমিল অপ্রত্যাশিত  
অনা, ঔহানাং অন্ত্যমিলর সার্থকতাহান ।

অংতা হবা টেংটা হবা কাপেছেতা নিংখি ।  
সিন্দূর পিদিয়া গিদেই টকি চেইরি হিন্দী ॥

গজর উদাহরণে আছে অন্ত্যমিল ঔহানি দুগ অপ্রত্যাশিত শব্দল দেছি ।

বাবুসিং খুড়া আজি একাদশী করিয়া  
মড়াগ মালয়া আছে মাংকলে পড়িয়া ॥  
কামড় আহান ভাত মুঙে তুমি দেইগা  
প্রসাদী করলে পিছে তুমিয়ৌ খেইগা ॥  
মাদানেদে নুয়া করে চারা এলকরিয়া  
পুণ্য কামেইতই একাদশী ধরিয়া ॥

গজর উদাহরণ এহানাং হাবি পূর্ণমিল মিলর মা কোন ত্রুটি নেই । ঔতাউ এতারে হবা  
মিলর উদাহরণ বুলে নুয়ারিয়ার , এসাদে ক্রিয়া পদর মিল এতা হবা কবিয়ে বর্জন  
করতারা । ক্রিয়াপদর মিল এতা অক্ষমর মিল ।

আমার ভাষাং প্রায় কবিয়ে সহজ অন্ত্যমিল আহান পাছি গ-বার হান প্রত্যয় এতা  
যে কোন শব্দর লগে মিল দেনা যাকরের । ঔহানে প্রায় কবিয়ে এতা প্রত্যয়ল মিল  
দিতারা

হাগহানাদে কতিতে হবা জোনাকহান  
মিঙালহানে বুজেছে এরে পৃথিবীহান ॥  
বিয়ানপরে মুঙেদে চেয়ো শাচাকগ  
চারিয়বেদে মলয়া বৌ দিতইগ ॥

এতা দুর্বল বার অশুদ্ধ মিলর নিকৃষ্ট উদাহরণ এতা যে কোন কবি আগর পক্ষে বর্জন  
করানি উচিত (গ- বার হান- প্রত্যয় সম্পর্কে গজর বক্তব্য এহানরকা মি কবি  
সেনারূপ সিংহরাং ঋণী) । গ- বার হান- প্রত্যয়ল মিল দেনাহান অইলে আগেকার  
শব্দ ঔগর লগে শ্রুতিসাম্য থাইলে দেনা যাকরের ।

নঙার পুতক অঙা উগ সাকতা চেইতে মাক্কুগ  
চরিত মিহান কিতা মাংতু হাবির গজর ডাক্কুগ ॥  
চরকরেছিল গেলগা কালি পিয়নকর বক্চাহান ।  
লেমপা লকেইর টেমপাকে তার ফুটা দিল খক্চাহান ॥

এপেই গ- বার হান- প্রত্যয়ল মিল দিলেরগায়ো আগেকার দুগ সিলেবলর ( মাক্কু-  
ডাক্কু, বক্চা-খক্চা) পূর্ণমিল থানাই মিলহান দুর্বল নাছে বরং এহানরে পূর্ণমিলর  
উদাহরণহান বুলানি থক



গাটর পানি দেখলে মমতের পুণ্যবতী গঙ্গাহান,  
ভক্তহাবি তারে চেয়া করতারা তা যাম বাখান ।  
মরলে লগে নাযারগাতা হুনা মণি মুক্তা,  
ভক্তহাবি মাণ্ডারাতা পড়লাংতাক বুজা ।  
রূপা পইসা মোরাং থয়া কামেই তুমি পুণ্য  
চেইতে চেইতে ভক্তহাবি অইলাতাতে শূন্য ।

এপেই পইলাকার পারেঙর 'গঙ্গাহান' শব্দর লগে ২য় পারেঙর 'বাখান' শব্দ মিল দেখি ।  
অন্যান্য মিল ঔহানিতে পূর্ণ মিলহানি এসাদে করে হান প্রত্যায়ান্ত শব্দর লগে-আন  
ভাগান্ত শব্দ মিল দিলে মিলহান সাক্তি না লাগের যদিয়ো মিলহানতে দুর্বল আছে

চংদে চংদে খেলতেগা চা শৌগ পড়িল উঠানে ।  
পাংগ সায়া বয়া না থাই, খানিক করে উঠা নে ॥  
তিয়ো বার কিতার কা থাং অকরলেতা নাছানি ।  
উপুর ক্ষুতি নিকালেয়া দেনে উতা না ছানি ॥  
বেলিহানাং আঙেই এহান খানিক করে মেলাদে ।  
মাদান পরে উরিয়া তি যেইবেগাতা মেলাদে ॥  
পহুরিগর পারে আছে ছিড়গা ঔতা মালতী ।  
ডাল গিঠিয়া পিদগা উতা, অলরাগ মাল তি ॥

গজর উদাহরণ এহান আসলে যমক অলঙ্কারর নিদর্শন হান, মিলর নিদর্শনহান নাগই ।  
শব্দ আগ দ্বিখুরুম ব্যবহৃত অয়া দুহান অর্থ প্রকাশ করলে ঔহানরে যমক অলঙ্কার  
বুলতারা এপেই প্রথম বার দ্বিতীয় চরণে লয়ইলগা শব্দগি- উঠানে প্রথম চরণে  
উঠানে অর্থ- উঠানহানাং, দ্বিতীয় চরণে উঠা নে অর্থ- তুলেদে । ৩য় চরণে নাছানি অর্থ  
নৃত্য করানি, ৪র্থ চরণে না ছানি অর্থ অপরিষ্কার নাকরি । ৫ম চরণে মেলাদে অর্থ  
মালকরেদে, ৬ষ্ঠ চরণে মেলাদে অর্থ মেলার ঔগদে । ৭ম চরণে মালতী ফুলজাত  
আহান, ৮ম চরণে মাল তি অর্থ ঔগ পাবা অ তি যমক হাস্যরস, কৌতুক সৃষ্টি  
করানির কামে লাগের প্রকৃত কবিতাং যমকর উপযোগিতা নেই যমক এহান  
অমার্চিক হবা অলঙ্কারহান নাগই ।

কবিয়ে বিভিন্ন আকৃতির স্তবক সৃষ্টি করিয়া বিভিন্ন ফামে অন্ত্যমিল দিয়া বৈচিত্র্য সৃষ্টি  
করতারা

হাদি হাদিয়েদে আহির পানির সুর ॥  
ঠইগরে আয়া কলকরেছেগা নাই ॥  
দুঃখ আহিল তোরা পৌহান অয়া ॥  
চিনলু হমাজি মোরে যাতেইবতাই ॥

এপেই ২য় বার ৪র্থ চরণে মিল আছে ।

সেন্দা আহিল চারিবারা হাপদিয়া ॥  
পশ্চিম হাকে পুছে দিয়া ছনা রঙ ॥  
আধারহানাৎ ঙ্গালইলতা ঝলকিয়া ॥  
হে ভীষণ তোর এ বিশাল মেইথঙ ॥

এপেই ১ম-৩য় বার ২য়-৪র্থ চরণে অন্ত্যমিল আছে ।

আকদিন বেলিটিকে অয়া প্রজাপতি  
ফুলে ফুলে বুলে বুলে থাইতৌ কতি  
ছনা রঙা বেলিহানে দিতই মিঙাল  
ছলছি কঙালা পাতা  
অয়া মি উতার কাদা  
বানা পেইতৌ ফুল শকো দিয়া গাল ॥

এপেই ১ম ২য় মিল ৩য়-৬ষ্ঠ মিল বার ৪র্থ ৫মে মিল ঔহান সম্মান বর্ণরহান  
নাগই, বর্ণ আগর বর্ণ দুগ । এসাদে মিল হাদি হাদিৎ দেনা যাকরের ।

এতা হাবি কথা থায়াও হমাজি কথা মাতানিতে নার ।  
বুকগর কথা বুকুদে পুলয়া কাদিয়া কাদিয়া ধার ॥  
লাহলে শাতয়া ফুলগি জঙের  
লাজহানে মোর আহিগি নঙের  
ফুলডাল আতে ধরিয়াও তারে দেনা নারলু মি আর ॥

এপেই ১ম, ২য়, বার ৫ম চরণে মিল বার ৩য়-৪র্থ চরণে মিল আছে

বরনে চরণে ধনি নুয়া নুপুরে ।  
ডালেছে কঙালা এলা মেঘালা সুরে ॥  
কিসাদে গেছেগা রথ  
লালয়া মুঙর পথ  
মামহানে চারিবারা আছিল গুরে  
পথ এগ আছিলতা আধারে বুুরে ॥

এপেই ১ম, ২য়, ৫ম বার ৬ষ্ঠ পারেঙে মিল আছে, ৩য় বার ৪র্থ পারেঙে মিল আছে ।

কিহানাদে মোরে কুংগ জিংতাই!  
দ্বিদিনে দ্বিদিনে আঙালুরিহান,  
মিকুপ হানাৎ দ্বিগাহালি ধান-  
মানুয়ে আমারে করলা বাখান  
আমার গারিৎ নেয়ছে জনমে  
নুয়ারা পানির দাই ॥

এপেই ১ম বার ৬ষ্ঠ পারোঙে মিল আছে, ২য়, ৩য় বার ৪র্থ পারোঙে মিল আছে। ৫ম চরণ ঔহান অন্য কোন চরণর লগে মিল নাদেছি।

কবিয়ে এসাদে নানান ধরনর, নানান আকৃতির স্তবক ইকরিয়া মিলর বৈচিত্র্য সৃষ্টি করতারা। এহানৌ কবিগরাং খেলা জাত আহান, নিজরে নিজে করতারা পরীক্ষা জাত আহান। ছন্দমিলর বন্ধনরমা থায়া শিল্পরস সৃষ্টি করানির চেষ্টা আহান।

এখুরুম মধ্য বার অন্ত্যমিলর কবিতা আহান চেইক

দাদারকাতে আদা আছে ইমার কাতে ডিমা কই।  
মই আহেছে নাবই যাগা দ্বিলপ পারা জিঙা খই ॥  
জুড়া আহান মুড়া আছিল কুরাং উতা মাঙছে।  
গতি নেইতা অতিথ এহান, আঙাঙতে নাউ সাঙছে ॥  
জিয়া জিপুত নেই পিয়াগ লিফাক হানাং ভাছেগা,  
নেইপা লকেইর মেইপা আগ খেইপা অয়া আছেগা ॥  
আবক সিজার কাপক নারা কিতার পালি করানি  
খুলা উগ লেরিক উলা কতিলতে বরানি ॥  
চুড়ামণি বুড়ার বাপক ধলা বুড়ার অংতা চেই।  
মানুর মিহান চেইতে বিহান কিহান করের হাটন নেই ॥  
সালইলিতা মালইনুতে পালই গাছি ছিড়ানিৎ।  
জালক উগর মালক উগ সিংতা কথা বিরানিৎ ॥  
সেনাই থেছে তেনাহানি নেনা মনার মেরাইতে  
নীল খানি ঠিলছেতা এতার বেরা চেরাইতে ॥  
বরর লগে পরর মানু গরর তাতে নাহেছি।  
এতাই বার ডাঙর সায়া গাঙরতা না ভাহেছি।  
সুমে খাছি খুম্গ পারা কুম্গ কালা লগরগ।  
তাঙা লকেইর জাঙাকগনা কিগ আগ থকরগ ॥  
দামান উগর মামাক আগই নাগই মানু পাছেগা।  
ঘটগতে নেই সিঙইতেগা কটগ খেয়াও নাহেগা ॥  
শরাং আহান করাং গিয়া মরাং পড়লা সাকেইগি।  
দাপাহানৌ থাপাখালি জবর অছি আকেইগি ॥  
গরে বর্যা দিনহান আছে নাছে গোপাল ইসাংগ  
থৌপু উগ দুগর তুল নাগই মান্না মিচাংক ॥  
আনা আহান কানা নাছে সেবারিগ পাছিগা,  
চেয়া খেয়া থেঙইতেগা হবাক স খাছিগা ॥

ৰাজ্যৰ জিপুং পানা অয়া মানা কৰলা দুয়াৰগ ।  
 আকগ আছিল বাঘগ পাৰা ভাবক ৰাৱপুয়াৰগ ॥  
 তাৰে চেয়া উঙাইলাতা মুঙৰ উতা খানিতে ।  
 মাতের “কামহান সাম না কৰি কইতে ঘটৰ পানিতে ॥  
 অকৰেছ গেটি খেলা, জেঠিমাৰে আংকৰো ।  
 লাহলাদে বাহুল নাযো, ভাংখাহানি নাংকৰো ॥  
 জ্ঞানু এহান মানুৰ মুঙে কিসাদেতে মাতানি ।  
 হাৰপাদেকা দেহিয়া মোৰ গীতা কিতা আতানি ॥  
 বলী অহুং অজা আজি সলি মলি কিতাউ নেই  
 মাতে বেলা হাতেক কৰে মাতেক আহান দিতাউ নেই ॥”  
 দলৰ মানু নেয়া আজি বলৰ বাপক কলছে  
 এমাটিকৰ বেকা এগই মেকা বাতগ অলছে ॥  
 হালক উগই গালারতাতে ডিলইল পালা বমানি ,  
 ঠুনা নাছে মানু এগই সৌনা সৌনি কৰানি ॥  
 দৰা অছে বৰাচাউবা আহিৰ পানি ফুটি নেই ।  
 এলা এতা হেলা কৰেৰ লগে প্ৰেমৰ ফুটি নেই ॥  
 পিছে খেয়া বাজা নেয়া নুঙেই নাছি জাঙেইহান ।  
 ছনাৰ জ্বালা দুনা অছে চুনা নায়া আঙেইহান ॥  
 দাৰিৎ বয়া য়াৰি দিতে ডাকৰ বাৰি অকৰলা ।  
 লৌ হনিয়া বৌয়েই উতাই তানুৰ শৌগি খকৰলা ॥  
 তাঙ বুলতে পাঙগ সায়া লাঙইলেতা কিয়া থাং  
 মিতে ইমে হজক পিয়া য়াৰি দিয়া দিয়া থাং ॥

ছন্দ ৰাৱ মিল কবি আগৰ উপকৰণ ॥ এতা ব্যবহার নাকৰতারা কবিয়েউ দ্বিয়হানৰ  
 দক্ষতা অৰ্জন কৰতারা । নাজানিয়া নাগই, জানিয়া বৰ্জন কৰানি থক । এতা নাজানি ঔগ  
 ব্যৰ্থ কবিগ

ছন্দমিলৰ চমৎকাৰিতুল কবিগ মাহেই বিখ্যাত অয়া আহি । ছন্দ মিললৌ রস সৃষ্টি  
 কৰানি সম্ভব কবি আগই নানান পৰীক্ষা নিরীক্ষাল নিজৰে প্ৰমাণ কৰেৰ । ছন্দ মিলব  
 দক্ষতা থাইলে নানান রসৰ কবিতা ইকৰে পাৰেৰ নাজানে ঔগরাং ছন্দ মিল ডাঙৰ  
 বাধা আহান । জানে ঔগরাং সৌন্দৰ্য সৃষ্টিৰ উপায় আহান ,


গোপী আগরাং ফালুৰ মানুয়ে নাৱগ ৰাৱ তালহান দ্বিয়হানৌ দাবী কৰতারা ,  
 কবিঔগরাঙৌ ঔহান দাবী কৰতারা ।

(প্ৰতিশ্ৰুতি, আশ্বিন- ১৩৭৮)

## এছপঞ্জী

মুখোপাধ্যায়, অমূল্যধন	ঃ বাংলা ছন্দের মূলসূত্র
ঠাকুর, রবীন্দ্রনাথ	ঃ ছন্দ
সেন, প্রবোধচন্দ্র	ঃ ছন্দ পরিক্রমা
	ঃ নূতন ছন্দ পরিক্রমা
	ঃ বাংলা ছন্দের রূপকার রবীন্দ্রনাথ
	ঃ বাংলা ছন্দচিত্তার ক্রমবিকাশ
মজুমদার, মোহিতলাল	ঃ বাংলা কবিতার ছন্দ
কলিকাতা বিশ্ববিদ্যালয়	ঃ বাংলা ছন্দ সমীক্ষা
দত্ত, সত্যেন্দ্রনাথ	ঃ ছন্দ সরস্বতী
ঘোষ, শঞ্জী	ঃ ছন্দের বারান্দা
তেওয়ারী, রামবহাল	ঃ রবীন্দ্রনাথ ও পূর্বাঞ্চলীয় চার ভাষার ছন্দ
রক্ষিত, বীরেন্দ্রনাথ	ঃ বাংলা ও অসমীয়া ছন্দের ঐক্য ও বৈচিত্র্য
কালিদাস	ঃ শ্রুতবোধ
গঙ্গাদাস	ঃ ছন্দোমঞ্জরী













বিকুশ্ৰিয়া মণিপুরী ঠাৱৰ নাটশাল্লা কবি ব্ৰজেন্দ্ৰকুমাৰ সিংহৰ জন্ম ১৯৩৮ সালৰ ফেব্ৰুৱাৰি মাহৰ ১২ তাৰিখে, কাছাড জিলাৰ শিলচৰৰ পাকইৰপাৰ গাৱে। গিৰকৰ বৰ্তমান নিবাস - হাইলাকান্দি মডেল টাউনৰ আশ্ৰম ৰোডে। অৰ্থনীতি বিষয়'ল কলিকাতা বিশ্ববিদ্যালয়েৰে ভাতকোত্তৰ ডিগ্ৰী নেদাৰ গিছে হাইলাকান্দি এসএস কলেজে অৰ্থনীতিৰ শিক্ষকগো হিচাবে বোণ দিল। নিজেমে ঠৈ কলেজৰ অধ্যক্ষৰ পদকালে খাদ্য অকসৰ গ্ৰহণ কৰল। গিৰকে হাইস্কুল জীৱনেৰে লেখালেখিৰ লগে জড়িত। এবাক পেন্দ্ৰা তেৰোহান কাব্যগ্ৰন্থ, চাৰিহান নাটক, গল্পগ্ৰন্থ আহান বাৰো সম্পাদনা গ্ৰন্থ দুহান প্ৰকাশিত অসে। গিৰকৰ সম্পাদনাৰ 'প্ৰতিপ্ৰতি' বুলিয়া বিকুশ্ৰিয়া মণিপুরী ঠাৱৰ সাহিত্য পত্ৰিকা আহাম নিকুলেসিল। বিকুশ্ৰিয়া মণিপুরী সাহিত্যহান পালকৰানিং বাৰো লেখক হতকৰানিং পত্ৰিকা এহানৰ অকলান নিয়াহপাৰা।

ব্যক্তিগত জীৱনে কবি গিৰক তিনসো জিনুতৰ আপকগো। গিৰকৰ বৰগিৰামক শ্ৰীযতি সুখদা সিংহেই সমাজকৰ্মী আলো।

নানান বুঢ়াৰা পানিৰ হিন লালোং পড়িয়াউ এ বৃদ্ধ বয়সে মিলনভাবে ইকৰিয়া ঘাৰপা বিকুশ্ৰিয়া মণিপুরী সাহিত্যৰ ভাতকগো বুজিল- বৰা কৰানিৰ সালে।



